

# তুর্গাদাস

নাটক

দ্বিজেন্দ্রলাল রায়

গুরুদাস চট্টোপাধ্যায় এণ্ড সন্স,  
২০৩/১১, কৰ্ণওয়ালিস্ ষ্ট্রীট, কলিকাতা

# ছই টাকা

একাদশ সংস্করণ  
কাঙ্ক্ষিক. — ১৩৪১

# উৎসর্গ

যাঁহার দেবচরিত্র সম্মুখে রাখিয়া

আমি এই

দুর্গাদাস-চরিত্র

অঙ্কিত করিয়াছি,

সেই চিরান্নাথ্য পিতৃদেব

৩ কার্তিকেয়চন্দ্র রায় দেবশর্মার

চরণকমলে

এই ভক্তি-পুষ্পাঞ্জলি

অর্পণ করিলাম ।



নবকুমার

# দুর্গাদাস

প্রথম অঙ্ক

প্রথম দৃশ্য

স্থান—দিল্লীর শাসাদভবনে সম্রাটের দরবার কক্ষ। কাল—প্রহরাধিক প্রভাত।  
সিংহাসনে ভারতসম্রাট ঔরঞ্জীব উপবিষ্ট ছিলেন। বামপার্শ্বে বিকানীরের মহারাজা  
শামসিংহ আসীন। তাঁহার দক্ষিণপার্শ্বে তাঁহার জনৈক সৈন্যাধ্যক্ষ তাহবর খাঁ এবং দুইজন  
প্রহরী নিবিষ্টভাবে দণ্ডায়মান। সম্মুখে রাঠোর সেনাপতি দুর্গাদাস ও তাঁহার ভ্রাতা  
সমরদাস দণ্ডায়মান।

ঔরঞ্জীব। দুর্গাদাস! যশোবন্তসিংহের মৃত্যু মোগল-সাম্রাজ্যের  
দুর্ভাগ্য!

দুর্গাদাস। জাঁহাপনা! সাম্রাজ্যের কল্যাণের জ্ঞান, রাজাজ্ঞা  
পালনের জ্ঞান মরা প্রত্যেক প্রজার গৌরবের বিষয়।

ঔরঞ্জীব। তুমি উচিত কথা বলে'ছো, দুর্গাদাস! যশোবন্তসিংহ  
ভিন্ন আর কে সেই দুর্জয় বিদ্রোহী কাবুলীদের দমন ক'র্ত্তে পার্ভ? তাঁর  
কাছে যে আমি কত দূর ঋণী—সে ঋণ আমি জীবনে পরিশোধ ক'র্ত্তে পার্ব  
না—( শামসিংহকে ) কি বলেন, মহারাজ?

শাম। নিঃসন্দেহ।

সমর। কেন? জাঁহাপনা ত সে ঋণ যশোবন্তসিংহের পুত্র পৃথ্বীসিংহের  
প্রাণ সংহার ক'রে পরিশোধ ক'রেছেন!

ঔরঞ্জীব । আমি তার প্রাণ সংহার করে'ছি ! যুবক ! তুমি কি ব'ল্ছো, তুমি জানো না । আমি তার প্রাণ সংহার করে'ছি ! আমি পৃথ্বীসিংহকে নিজের পুত্রের মত ভালোবাস্তাম । আমি তাকে স্বহস্তে সম্মান-পরিচ্ছদ পরিবে দিযেছিলাম ।

সমর । সম্রাট ! সেই অবোধ বালকও তাই ভেবেছিল । কিন্তু সে সম্মান-পরিচ্ছদ যে বিষাক্ত, তা' সরল বেচারী পৃথ্বীসিংহ জান্ত না !

শ্যামসিংহ । যুবক ! তুমি কার সঙ্গে কথা ক'চ্ছ—জানো ?

সমর । জানি, মহারাজ বিকানীর ! আপনার প্রভুর সঙ্গে—আমার নয় ।

ঔরঞ্জীব একটু চমকিত হইলেন । তাঁহার সম্মুখে একপ দোষারোপে তিনি কোনকালে অভ্যস্ত ছিলেন না । তাঁহার ক্রয়ুগল ঈষৎ আকুঞ্চিত হইল । কিন্তু তৎক্ষণাৎ তিনি আত্মসংবরণ করিয়া কহিলেন

ঔরং । কে বলে যে সম্মান-পরিচ্ছদ বিষাক্ত ?

দুর্গা । না, জাঁহাপনা ! তার কোন প্রমাণ নাই । সে সম্মান-পরিচ্ছদ যে বিষাক্ত তা' সাধারণের অনুমান মাত্র ।

সমর । ( সক্রোধে ) অনুমান ! তার পরদণ্ডেই বিধে জর্জরিত হ'য়ে দাকণ যন্ত্রণায় বেচারীর মৃত্যু হয় । আমি কি সে মৃত্যু স্বচক্ষে দেখিনি ?—অনুমান ! তবে যশোবন্তসিংহকে আফগানিস্থানে পাঠিয়ে হত্যা করাও অনুমান ! আর আজ তাঁর রাণী আর পুত্রকে দিল্লীতে অবরোধ করাও অনুমান ! তবে তুমি অনুমান ; আমি অনুমান ; সম্রাট ঔরঞ্জীব অনুমান ; মোগল সাম্রাজ্য অনুমান ; এ নিখিল বিশ্ব অনুমান ! এ অনুমান নয়, দুর্গাদাস !—এ ধ্রুব, স্থল, প্রত্যক্ষ ।

দুর্গা । ক্ষান্ত হও, দাদা—মনে কর, কি প্রতিজ্ঞা করে এসেছিলে ।

সমর । আচ্ছা ! এই চুপ ক'রলাম ! কিন্তু এক কথা বলে' রাখি,

জনাব! মনে ভাববেন না যে, আমরা একেবারে দুঃখপোষ শিশু, কিছুই বুঝি না! কিছু কিছু বুঝি।

দুর্গা। রাজাধিরাজ! আমার উগ্র ভ্রাতাকে ক্ষমা করুন। জাঁহাপনা, আমার আজ এক বিনীত প্রার্থনা সম্রাটপদে নিবেদন ক'র্তে এসেছি।

ঔরং। উত্তম! নিবেদন কর।

শ্যাম। বল, দুর্গাদাস! ভয় কি? সম্রাট উদার। তিনি তোমার ভাইয়েব উগ্র ব্যবহার ক্ষমা ক'রেছেন। তোমার ভয়ের কোন কারণ নাই।

দুর্গা। আমার বিনীত নিবেদন এই যে, মৃত যোধপুরের মহারাণী তাঁর শিশু-পুত্র-কন্যাদের নিয়ে স্ববাজ্যে ফিরে যেতে চান! সে সম্বন্ধে সম্রাটের অনুমতি ভিক্ষা করি।

ঔরং। আমার অনুমতির প্রয়োজন?

দুর্গা। জাঁহাপনার অনুমতির প্রয়োজন কি, তা' আমিও জানি না। কিন্তু মোগল সৈন্যাধ্যক্ষ—তাহবর খাঁ—সম্রাটের বিনা অনুমতিতে তাঁকে ছেড়ে দিতে চাইছেন না।

ঔরংজীব তাহবরের দিকে চাহিয়া জিজ্ঞাসা করিলেন

ঔরং। কি জন্ত তাহবর খাঁ?

তাহবর। জাঁহাপনার সেইরূপ আজ্ঞা ব'লেই জেনেছিলাম।

ঔরং। ও—হাঁ, আমি বলে'ছিলাম বটে যে যশোবন্তসিংহের পরিবারকে তাঁদের দিল্লী হ'তে যাবার পূর্বে আমি পুরস্কৃত ক'র্তে চাই। যে অনুগ্রহ মহারাজ যশোবন্তসিংহের প্রতি দেখাতে কার্পণ্য করি নাই, সে অনুগ্রহ হ'তে তাঁব পরিবারবর্গকে বঞ্চিত ক'র্ব না—কি বলেন মহারাজ?

শ্রাম । সম্রাটের চিরদিনই এই যশোবস্তুর পরিবারের প্রতি অসীম  
অনুগ্রহ ।

সমর । সম্রাট ! আমি না ব'লে থাকতে পারছি না, দুর্গাদাস—  
সম্রাট ! অনুগ্রহ করবেন না, এইটুকু অনুগ্রহ করুন । আপনাদের  
ক্রকুঞ্চন দেখে বড় ভীত হই না, কারণ সেটা বুঝতে পারি । কিন্তু হাসি  
দেখে বড় ভয় পাই জনাব ! কারণ সেটা বুঝতে পারি না । সোজা  
ভাষায় বলুন যে, যশোবস্তুসিংহের প্রতি প্রতিহিংসা চান—তাঁকে যেমন বধ  
করে'ছেন, তাঁর জ্যেষ্ঠপুত্রকে পৃথ্বীসিংহকে যে রূপ বধ ক'রেছেন, সেইরূপ  
তাঁর রাণী আর কনিষ্ঠপুত্রকে বধ ক'র্বেন । বলুন—সোজা ভাষায় যে,  
যশোবস্তুসিংহের কুলের কাউকে বাধবেন না । বলুন—আমরা বুঝতে  
পারি । কেবল অনুগ্রহ ক'র্বেন না, জনাব, এই ভিক্ষা চাই । আপনাদের  
শক্রতার চেয়ে বন্ধুত্ব ভয়ঙ্কর !

দুর্গা । দাদা ! তুমি কি আমার প্রার্থনা ব্যর্থ ক'র্তে এসেছো ? তুমি  
ফিরে যাও ।

সমর । যাচ্ছি, দুর্গাদাস । আব এক কথা—একটি কথা মাত্র ।  
মহাশয়ের পূর্বপুরুষ আকবরের চেয়ে মহাশয়কে এক বিষয়ে অধিক শ্রদ্ধা  
করি । কারণ, মহাশয় আকবরের মত ভণ্ড নহেন । মহাশয় খাঁটি  
মুসলমান—সরল গোঁষাব ধার্মিক মুসলমান । সম্রাট তাঁর মত বিবাহচ্ছেলে  
হিন্দুর হিন্দুত্ব নাশ করেন না । সোজা পরিষ্কার শাণিত সনাতন মুসলমান  
প্রথায় স্বধর্ম প্রচার করেন ।—করুন, তা'তে ডরাই না । তবে অনুগ্রহ  
ক'র্বেন না । যা অনুগ্রহ ক'রেছেন, যথেষ্ট ! তা'তে এখনো জর্জরিত  
হ'য়ে আছি । আর অনুগ্রহ ক'র্বেন না । দোহাই—

প্রস্থান

তাহবর খাঁ তাহাকে রোধ করিতে যাইলে ঔরংজীব নিষেধ করিলেন



ঔরং। দুর্গাদাস! তোমার খাতিরে তোমার উগ্র ভাইকে ক্ষমা ক'রলাম। কিন্তু তোমার ভাই একটি কথা সত্য বলেছেন যে, আমি ভণ্ড নছি। আমি অন্তবে বাহিবে মুসলমান। এই সনাতন ধর্ম ভারতবর্ষে প্রচার করবার জন্য এই রাজ্যভার নিইছি। রাজ্যভাব গ্রহণ করবার পূর্বে যাই ক'বে থাকি—রাজ্যভাব গ্রহণ করে অবধি এই ধর্মের ফকিরী ক'র্ছি।

দুর্গা। তা' সম্পূর্ণ মানি, জাঁহাপনা। তার পবেও যদি আপনি কখন শাঠ্য কবে' থাকেন, সে শঠ্য প্রতি। তা' গহিত হয় নি। উদার না হ'তে পারে, অমুর্চিত হয় নি।

ঔরং। স্বীকার কর?

দুর্গা। করি! কিন্তু জাঁহাপনা। মহারাজ যশোবন্তসিংহ যদি ভ্রমবশে কখন আপনাব প্রতিকূল আচরণ করে' থাকেন, তাঁব বিধবা পত্নী ও নিরীহ সন্তান সম্রাটের প্রতিহিংসাব পাত্র নয়। তারা কোন অপরাধ করে নি।

ঔরং। দুর্গাদাস। আমি তাঁদের পীড়ন ক'র্তে চাই না। পুরস্কৃত ক'র্তে চাই।

শ্যাম। সম্রাট তাঁদের পুরস্কৃত ক'র্তে চান, দুর্গাদাস।

দুর্গা। সম্রাটের ইচ্ছায়ই মহাবাণী পুরস্কৃত হয়েছেন। এখন অনুমতি দিন।

সম্রাট মহারাজ বিকানীরকে কহিলেন

ঔরং। মহারাজ, এখন আপনি আমার নিভৃত কক্ষে অপেক্ষা করুন গিয়ে। আমি আসছি।

শ্যামসিংহ চলিয়া গেলে ঔরংজীব দুর্গাদাসকে কহিলেন

দুর্গাদাস! তুমি দেখ'ছি শুদ্ধ প্রভুভক্ত ভৃত্য নও; তুমি চতুর রাজনৈতিক। তোমার সঙ্গে চাতুরী নিফল। শোন তবে সত্য কথা। আমি যশোবন্তসিংহের রাণীকে আর তাঁর সন্তানকে চাই।

দুর্গা। জাঁহাপনা ! তা' পূর্বেই জানি। কিন্তু কারণ কি জানি না। মহারাণী নারী, আর যশোবন্তের পুত্র সন্তোজাত শিশু। তাঁদের নিষে সত্ৰাটের কি প্রয়োজন হ'তে পারে ?

ঔরং। দুর্গাদাস। ভাবতসত্ৰাট তাঁব প্রত্যেক প্রজাব কাছে প্রত্যেক কার্যের প্রয়োজন ব্যক্ত ক'র্তে বাধ্য নহেন বোধ হয়।

দুর্গাদাস ক্ষণেক চিন্তা করিয়া কহিলেন

দুর্গা। তবে জাঁহাপনা, আমার যাক্সা নিফল ?

ঔরং। সম্পূর্ণ নিফল।

দুর্গা। তবে আর আমাব কিছু বক্তব্য নাই।

ঔরং। তুমি যশোবন্তের বাণীকে আমাব হাতে সমর্পণ ক'র্তে প্রস্তুত নও ?

দুর্গা। প্রাণ থাকতে নয়।

ঔরং। শোন, দুর্গাদাস। তুমি যশোবন্তের বাণীকে আর তার সন্তানকে আমার হাতে দাও। প্রচুর পুস্কার দিব।

দুর্গাদাস হাসিয়া কহিলেন

দুর্গা। সত্ৰাট—আমি সে শ্রেণীর লোকের একটু উপরে। দুর্গাদাস জীবনে কর্তব্য মাত্র চেনে ; দুর্গাদাস জীবিত থাকতে কারো সাধ্য নাই যে তার মৃত প্রভু যশোবন্তসিংহের পরিবারস্থ কাহারো গায়ে কেহ হস্তক্ষেপ করে !—তবে আসি জাঁহাপনা ! আদাব।

ঔরং। দাঁড়াও।—দুর্গাদাস জীবিত থাকতে তা' সম্ভব না হ'তে পারে। কিন্তু দুর্গাদাসের মৃত্যুর পব তা' সম্ভব। তাহবর খাঁ—বন্দী কর।

তাহবর অগ্রসর হইলে দুর্গাদাস সহসা তরবারি খুলিয়া কহিলেন

দুর্গা। খববদার। এর জন্ত ও প্রস্তুত হয়ে এসেছি, সত্ৰাট—

এই বলিয়া দুর্গাদাস কটিবিলম্বিত তুরী তুলিয়া বাজাইলেন

মুহুর্তে পাঁচজন সশস্ত্র ব্যক্তি নগ্ন তরবারি হস্তে দরবার-কক্ষে প্রবেশ করিল

দুর্গা। এই পাঁচজন দেখছেন সত্ৰাট! আর এক তুরীধ্বনিতে পাঁচ  
শ' সৈনিক দরবার-কক্ষে প্রবেশ ক'ৰ্বে—বুঝে কাজ ক'ৰ্বেন।

ঔরং। যাও।

সসৈনিক দুর্গাদাস চলিয়া গেলেন

ঔরংজীব মুহুর্তকাল স্তম্ভিত হইয়া রহিলেন; পরে কহিলেন

ঔরং। দুর্গাদাস! ঠান্ডাম, তুমি প্রভুভক্ত, চতুর, সাহসী, বীর!  
কিন্তু তোমার এতদূর স্পর্ধা হবে তা' ভাবিনি। ( তিনি পবে তাহবরকে  
—ডাকিলেন )—তাহবর খাঁ!

তাহবর। খোদাবন্দ!

ঔরং। সেনাপতি দিল্লীর খাঁকে বল যে, আমার হুকুম—সেনাপতি  
এই মুহুর্তেই সসৈন্যে যশোবন্তের গৃহ অবরোধ করেন। যাও।

পট পরিবর্তন

### দ্বিতীয় দৃশ্য

স্থান—দিল্লীর প্রাসাদ অন্তঃপুরে সম্রাজ্ঞী গুলনিয়ারের বসিবার কক্ষ। কাল—

দ্বিপ্রহর। সম্রাজ্ঞী সেই কক্ষে পাদচারণ করিতেছিলেন

সম্রাজ্ঞী। যোধপুরমহিষী! তুমি একদিন গর্বিত হ'য়ে আমাকে  
ক্রীতদাসী ঘবনী বলে' ডেকেছিলে। সে গর্ব চূর্ণ ক'রেছি কি না?  
তোমার স্বামীকে কাবুলে পাঠিয়ে হত্যা করিইছি; তোমার জ্যেষ্ঠপুত্রকে  
বিষপ্রয়োগে হত্যা করিইছি; তোমার সমক্ষে তোমার কনিষ্ঠ পুত্রকে  
হত্যা ক'ৰ্ব। তোমাকে আমার পাদোদক খাওয়াবো। পরে তোমায়

জীবন্তে কবর দিব। জেনো, যোধপুরাণি! যে এই ক্রৌতদাসী  
 যবনী সম্রাজ্ঞীই আজ এই সুবিস্তীর্ণ মোগল-সাম্রাজ্য শাসন  
 কর্ছে।—ঔরঞ্জীব? ঔরঞ্জীব ত আমার এই তর্জনীসংলগ্নরশ্মি-  
 সঞ্চালিত কাষ্ঠপুত্রলিকা। লোকে জানে অন্তরূপ। সে লোকের  
 মৃত্যুর পরাকাষ্ঠা। নহিলে এই যশোবন্তের রাণী আর তার সন্তোজাত  
 শিশুকে ঔরঞ্জীবের কি প্রয়োজন? এ কথা একবার লোকে নিজেকে  
 জিজ্ঞাসাও কবে না।

এই সময়ে ঔরঞ্জীব সেই কক্ষে প্রবেশ করিলেন

গুল। কে! সম্রাট?—বন্দীগি জাঁহাপনা!

ঔরং। গুলনেয়ার, তুমি এখানে একা?

গুল। এই যে যোধপুরের রাণীর অপেক্ষা করছি।—কোথায় সে?

ঔরং। এখনো ধরা পড়ে নি।

গুল। পড়ে নি?

ঔরং। না!—দুর্গাদাস তাকে দিতে অস্বীকৃত হ'য়ে ফিরে গিয়েছে।

গুল। জীবিতাবস্থায়?

ঔরং। হাঁ—তার সঙ্গে সৈন্ত ছিল।

গুল। আর মোগল-সম্রাজ্যে কি সৈন্ত, নাই!—ধিক!

ঔরং। প্রিয়তমে—

গুল। আমি কোন কথা শুতে চাই না, সম্রাট! আমি আজই  
 সন্ধ্যার পূর্বে যোধপুরমহিষীকে চাই।

ঔরং। গুলনেয়ার! আমি মহারাণীর আবাসগৃহ অবরোধ কর্তে  
 দিল্লীর খাঁকে পাঠিয়েছি।

গুল। আচ্ছা! সন্ধ্যার পূর্বে আমি তাকে চাই। মনে  
 থাকে যেন।

এই বলিয়া তিনি চলিয়া গেলেন

ঔরংজীব বাইতে বাইতে কহিলেন

ঔবং । কি অদ্ভুত স্পর্শ এই দুর্গাদাসের ! এখনো তাই ভাবছি ।—  
আমার সম্মুখে দরবার-কক্ষে তরবারি খুলে নেমে ঘোড়া ছুটিয়ে চলে' গেল !—  
এরূপ সাহস পূর্বে কাহাবও হয় নাই ; তার প্রভু যশোবন্তসিংহেরও না !

এই বলিয়া সম্রাট ধীরে ধীরে বাহির হইয়া গেলেন

### তৃতীয় দৃশ্য

স্থান—মোগল সেনাপতি দিলীর খাঁর বহির্কাটা ; কাল—অপরাহ্ন । দিলীর খাঁ বন্দ  
পরিতেছিলেন, সম্মুখে তাঁহার প্রধান সৈন্যাধ্যক্ষ তাহবর খাঁ দাঁড়াইয়া ছিলেন ।

দিলীর । কি বল'ছো খাঁসাহেব ? রাঠোর সেনাপতি দুর্গাদাস  
সম্রাটের নাকের কাছ দিয়ে তলোয়ার ঘুরিয়ে চলে' গেল ?

তাহবর । তা' গেল বৈ কি !

দিলীর । আর তুমি তাই দাঁড়িয়ে দেখলে ?

তাহবর । তা' দেখলাম বৈ কি !

দিলীর । সোজা হয়ে ?

তাহবর । যতদূর সম্ভব ।

দিলীর । যতদূর সম্ভব কি রকম ?

তাহবর । এই তার তলোয়ারখানা নাকের উপর দিয়ে ঘুর্তো  
কি না—

দিলীর । ঘুর্তো না কি ?

তাহবর । ঘুর্তো বলে' ঘুর্তো ! বেশ একটু ঘুর্তো !

দিলীর । তাই তুমি বুঝি একটু কাৎ হ'লে ?

তাহবর। হ'লাম বলে' হ'লাম! আমি ব'লেই কাৎ হ'লাম! আর কেউ হ'লে চিৎ হ'তেন।

দিলীর। নিজের তলোয়ারখানা বের ক'লে' না কেন?

তাহবর। ফুস'ৎ পেলাম কৈ?

দিলীর। ফুস'ৎ পেলে না বুঝি?

তাহবর। আরে! সে বেটা এমানি হঠাৎ তলোয়ার বের ক'লে' যে ভদ্রলোকে সে রকম করে না। তারপরে সে চলে' গেলে—

দিলীর। তখন তলোয়ার বের ক'লে' বুঝি?

তাহবর। তখন আর বের ক'রে কি কর্ব?

দিলীর। তবে সে চ'লে গেলে কি ক'লে'?

তাহবর। নাকে হাত দিয়ে দেখলেম—নাকটা আছে কিনা!

দিলীর। সন্দেহ হ'ল বুঝি?

তাহবর। একটু হ'ল বৈ কি! বেটা এমন ধাঁ করে' তলোয়ার ঘুরোলে যে তাতে তার সঙ্গে নাকের খানিকটা যাওয়া আশ্চর্য্য কি?

দিলীর। (সম্বিত মুখে) নতুন রকম ব্যাপার বটে! লোকটাকে দেখতে হচ্ছে ত!

তাহবর। তাকে দেখবার জন্তই ত সম্রাট আপনাকে ডেকেছেন! নাও, তোমার যে বর্ম্ম পরা শেষই হয় না।

দিলীর। আরে রোস! দুপুর বেলায় কোথায় একটু বিশ্রাম কর্ব, না, ছোটো এখন সৈন্ত নিয়ে একটা উন্মাদের পেছনে।—এ সামান্য কাজটা তুমি ক'র্তে পা'র্তে না?

তাহবর। না! তার সঙ্গে সমধিক পরিচয় কর্বার আমার ইচ্ছা নাই! তার উপরে—

দিলীর। তার উপরে?

তাহবর। তার উপরে এই রাজপুত জাতটার উপরে আমার কেমন একটা অভক্তি আছে। তা'রা যুদ্ধ ক'র্তেই জানে না।

দিলীব। কি রকম ?

তাহবর। আরে ! তা'রা যুদ্ধ করে—কোন প্রথা মেনে করে না। ফস করে' তলোয়ার বের কোরেই কোপ্। নিজের মাথার দিকে লক্ষ্য নেই। তার নজর দেখ'ছি বদাবব আমার এই মাথাটির উপরে। এ রকম বেকুফের সঙ্গে যুদ্ধ ক'র্তে আছে ?

দিলীর। নজর বুঝি তোমার মাথার উপরে ?

তাহবর। হাঁ—আরে নিজের মাথা বাঁচিয়ে যুদ্ধ কর—না ধপাধপ্ কোপ দিচ্ছে। যেন শত্রুগুলোকে কচুবন পেয়েছে !

দিলীর। রাজপুত সৈন্য কত ?

তাহবর। আড়াই শ হবে।

দিলীর। যাও, তাহবর ! পাঁচ হাজার মোগলসৈন্য তৈয়ের হতে আজ্ঞা দাও। যা'রা প্রাণ তুচ্ছ ক'রে যুদ্ধ করে তারা ভয়ঙ্কর জাত ; তাদের সঙ্গে ভেবে চিন্তে যুদ্ধ ক'র্তে হয়। পাঁচ হাজার মোগল অশ্বারোহী—বুঝলে ? যাও।

তাহবর চলিয়া গেলে দিলীর নিজ মনে কহিলেন

“অসমসাহসিক এই রাজপুত জাতি !” কিন্তু সম্রাটের এ আদেশের অর্থ বুঝি না। তিনি যশোবন্তসিংহকে বধ করিয়েছেন, কেন না তাকে ভয় ক'র্তেন ! কিন্তু তার পরিবারবর্গের প্রতি আক্রোশ কেন ?—যাই বাড়ীর মধ্যে গিয়ে বিদায় নিয়ে আসি। ফিরে এসে বিদায় নেবার অবসর যদি নাই পাই। আগেই নিয়ে রাখা ভাল।

এই বলিয়া দিলীর অন্তঃপুরাভিমুখীন হইলেন

## চতুর্থ দৃশ্য

স্থান—মেবারের রাণা রাজসিংহের অন্তর্গাটী । কাল—অপরাহ্ন । রাজকুমার জয়সিংহের নবোঢ়া দ্বিতীয়া স্ত্রী—কমলা একাকিনী দাঁড়াইয়া ছিলেন ।

কমলা । কেমন তোমাকে পেঁচের মধ্যে ফেলেছি, স্বামী ! ঘোরো এখন ! দিদি অবাক হয়ে গিয়েছে ! এত অল্প সময়ের মধ্যে এসে আর একজন তার মুখের গ্রাস খপ্ করে' কেড়ে নিলে গা ! কি দুঃখ !—হাঃ হাঃ হাঃ—মন্ত্র জানি দিদি, মন্ত্র জানি ! খুব হয়েছে ! এমন একটা স্বামীর মত স্বামী, রাণা রাজসিংহের পুত্র—এমন একটা স্বামী মুকিষে একা একা ভোগ করবে ঠিক ক'রেছিলে দিদি ! লজ্জাও করে না !—রাণার এই পুত্রই ত মেবারের রাণা হবে ! আর তুমি একা রাণী হবে মনে করে'ছিলে ! তা' হ'চ্ছে না দিদি ! কেমন চিলের মত ছোঁ মেরে খপ্ করে' কেড়ে নিইছি !—কেমন ! রাণী হবে ? হও !—আর ভীমসিংহ ! তুমি রাজা হবে ? হ'লে আর কি ! রাণা নিজ হাতে আমার স্বামীর হাতে রাজবন্ধনী বেঁধে দিয়েছিলেন, জানো ? বলি ও ভাসুর ! তার খবর রাখো কি ! তার উপর আমার স্বামীই ত রাণার প্রিয়পাত্র । কর্কে কি ভীমসিংহ !—দুই ভায়ে খুব ঝগড়া বাধিয়ে দিয়েছি ! ভীমসিংহ এখন থেকেই যাক, দূর হোক ! এমনি কল পেতেছি বাবা !—প'ড়তেই হবে । তার পর শ্রীজয়সিংহ মেবারের রাজা, আর শ্রীমতী কমলা দেবী মেবারের রাণী ;—আর তুমি দিদি—সরে' পড় দিদি ! সরে' পড় !

চীৎকার করিতে করিতে জনৈক ধাত্রী প্রবেশ করিল

ধাত্রী । ওরে বাবা রে !

কমলা । কি হয়েছে ?



ধাত্রী । ওরে বাপ ! একেবারে কুরুক্ষেত্রের কাণ্ড রে—ওরে কি হবে রে ।

কমলা । মর বলি, হয়েছে কি ?

ধাত্রী । আরে একেবারে দক্ষিণ্যস্ত্রি ! ওরে বাবা ! এমন কাণ্ড কেউ দেখিনি গো—একেবারে নিশ্চিন্ত বধ !

কমলা । বলি, হয়েছে কি ?

ধাত্রী । আর হয়েছে কি—ওরে—একেবারে নক্ষাকাণ্ড রে !

কমলা । বল না, কি হয়েছে ?

ধাত্রী । তবে শুনবা !—ঐ ছোট রাজপুত্র—ঐ যে জয়সিংহ—তোমার সোয়ামী গো ।

কমলা । হাঁ—কি কবেছে ?

ধাত্রী । সে ঐ যে বড় রাজপুত্র ভীমসিংহ—তার পায়ে তরোয়াল খুলে এক কোপ্—ওরে একেবারে রক্তগঙ্গা ভগীরথ রে !

কমলা । যাঁ! তার পর ?

ধাত্রী । তার পর আবার কি ? বড় রাজপুত্র ভীমসিংহ ঐ ছোট রাজপুত্র জয়সিংহের গলা টিপে ধরেছে, এমন সময় রাণা এসে হাজির । এসে বড় রাজপুত্রকে কি বকুনিটাই ব'কলে গা—একে বারে সাত কাণ্ড রামায়ণ, ন ভূতি ন ভবিষ্যতি শুনিয়ে দিলে ! ভীমসিংহের মুখে রা-টি নেই । চূপ করে' বেরিয়ে এলো ! মুখখানি চূণ ক'রে চলে গেল ।

কমলা । বেশ হয়েছে ।

ধাত্রী । ওমা সে কথা বোলো না ! বড় ছেলে বড় ভালো গো, বড় ভালো ! দেশশুদ্ধ লোক তাকে ভালো বলে ! আর ছোট ছেলেও ত ছেলে ভালো ! মুই ত তারে হাতে করে মানুষ ক'রেছি ।—যত গোল পাকালি ত এ সংসারে এসে তুই সর্বনাশী !

কমলা । চূপ্ হারামজাদী !

ধাত্রী। ওরে বাবা! একেবারে তাড়কা রাক্ষসী রে!

বলিয়া উর্দ্ধ্বাসে পলায়ন করিল

কমলা। কি! এতদূর গড়িয়েছে? এতদূর গড়াবে তা' ভাবিনি!  
তা' মন্দই কি! দিন থাকতেই মীমাংসা হ'যে যাক না।

এই সময়ে তাঁহার সপত্নী সরস্বতী সেই কক্ষে প্রবেশ করিলেন

সরস্বতী। এই যে কমলা—কমলা! এই কি তোমার উচিত কাজ হ'চ্ছে? জানো আজ কি হ'বেছে?

কমলা। জানি। তবে আমার কি উচিত কাজ হ'চ্ছে না দিদি?

সর। স্বামীকে ক্রমাগত তাঁর বড় ভাইয়ের বিরুদ্ধে উত্তেজিত করা?

কমলা। কে ক'র্ছে?

সর। তুমি!

কমলা। মিথ্যা কথা! ভাস্করই ত ঝগড়া বাধান—তাঁর লক্ষ্য চিরকাল দেখ'ছি এই মেবাবের সিংহাসনের দিকে। এ ত তাঁর দোষ।

সর। তিনি এ রাজ্য চান না, কমলা! আমি বেশ জানি!—আর যদি বা চান—তিনি ত বড় ভাই!

কমলা। হাঁ, ঘণ্টাখানেকের বড় বটে! রাণা নিজে স্বামীর হাতে তাঁর জন্মাবার সময় হৃদে সূতো বেঁধে দেন নি?—ঐ নিয়েই ত ঝগড়া।

সর। যদি তাই হয়—আমাদের চেষ্টা করা উচিত নয় কি বোন, যাতে সে বিরোধ ভ্রাতৃস্নেহে পরিণত হয়, যাতে সে কালো মেঘ বিদ্যুৎ উৎসার না করে' জল হয়ে নেমে যায়, যাতে সে বহি দাহ না করে' দুইটি হৃদয়কে যুক্ত করে?

কমলা। সে কথা আমি তোমার সঙ্গে বিচার ক'র্তে চাই না।  
আমার স্বামীর বিষয় আমি বুঝ'বো।

সর। বোন! তিনি তোমারই স্বামী, আমার কি কেউ ন'ন?

কমলা । তবে তুমি তাঁকে বুঝিয়ে বোলো । আমার সঙ্গে ঝগড়া ক'র্ত্তে আসো কেন ?

বলিয়া দ্রুত পদক্ষেপে সে স্থান হইতে প্রস্থান করিলেন

সর । আমি তাঁকে বুঝিয়ে বলবো ! হা কপাল ! এক দিন ছিল, যখন তিনি আমার কথা শুভ্লেন । তার পবে তুমি এসে তাঁকে যে কি মস্ত্রে যাছ ক'ল্পে বোন, তুমিই জানো ।

জয়সিংহ কক্ষে প্রবেশ করিলেন

জয় । কে ? সবস্বতী ? আমি ভেবেছিলাম কমলা ।

সর । ভেবেছিলে সত্য । এতখানি ভুল করেছিলে ? কিন্তু কেন সে ভুল এত শীঘ্র ভেঙ্গে গেল ! সে ভুল ভাঙবার আগে কেন একবার আমায় কমলা ভেবে প্রাণেশ্বরী বলে' ডাকলে না ? আমি ভুলেও একবার ভাবতাম যে, আমাকে ডাকছো ! সে ভুল ভাঙ্তো ; কিন্তু একবার এক মুহূর্ত্তেবও জন্ম স্বর্গস্থখ অনুভব ক'র্ত্তাম ।

জয় । সরস্বতি, আমি এখন যাই । আমার বিশেষ প্রয়োজন আছে ।

সব । দাঁড়াও ! আমি তোমাকে আমার হৃদয়েব আবেগ জানাবার জন্ম ডাকছি না । যা' গিয়েছে তা' আর ফির্কে না !—শোন ! একটা কথা জিজ্ঞাসা করি । বড় ভাইয়ের সঙ্গে আজ আবার বিবাদ করে'ছিলে ?

জয় । সে দোষ আমার নয় !

সরস্বতী । তাঁর দোষ ?

জয় । আমি রাগে তাঁর পায়ে তলোয়ার দিয়ে মেরেছিলাম ; তিনি আমার গলা টিপে ধরে'ছিলেন ।

সরস্বতী । তাঁরই ত দোষ বটে !—প্রভু, তুমি ত এ বকম ছিলে না ! কমলা তোমায় নিয়ে খেলাচ্ছে । ভায়ে ভায়ে বিরোধ কর' না, প্রভু ! যদি কমলা বুঝিয়ে থাকে যে ভাসুর মেবারের সিংহাসনপ্রার্থী, সে মিথ্যা কথা । ভাসুর উদার, মহৎ ।

জয় । আর আমি নীচ !—বেশ !

সবস্বতী । আমি তা' বলি নাই । তবে আমি বলি যে, যে তোমার কাণে এই মন্ত্র দিচ্ছে সে নীচ, সে তোমার হিতার্থিনী নয় । সে তোমার সর্বনাশ করছে !—ঐ ভাসুর আসছেন, আমি যাই ।—নাথ, তোমার যদি মনুষ্যত্ব থাকে, ত এইক্ষণেই এই ভায়ের ক্ষমা প্রার্থনা কর ।

বলিয়া প্রস্থান করিলেন

তৎপরেই ভীমসিংহ কক্ষে প্রবেশ করিয়া জয়সিংহকে মদুস্বরে ডাকিলেন

ভীম । জয়সিংহ—ভাই ।

জয়সিংহ নীরব রহিলেন

জয়সিংহ—ভাই—আমারই অনাথ হয়েছিল । আমাকে ক্ষমা কব ।

জয়সিংহ তথাপি নীরব রহিলেন

হাঁ জয়সিংহ ! আমি সম্যক ক্রোধ সংবরণ কর্তে শিখিনি । আমার উচিত ছিল, ছোট ভাইকে ক্ষমা কবা ।—ভাই ! আমায় ক্ষমা কর ।

এই সময়ে রাণা রাজসিংহ আসিয়া ভীমসিংহকে কহিলেন

রাজসিংহ । ভীমসিংহ । জয়সিং তোমাকে তববারি দিয়ে আঘাত করে'ছে ?

ভীম । না, পিতা, বিশেষ কিছু নয় ।

রাজ । আমি তা' জানতাম না । পরিচারিকাব মুখে শুনলাম । পরে কক্ষে রক্তের রেখা দেখে বুঝলাম যে কথা সত্য—দেখি, কোথায় আঘাত করে'ছে ?

ভীম । বিশেষ কিছুই নয় ।

রাজ । দেখি—

ভীমসিংহ দক্ষিণ পদ দেখাইলেন

রাজ । হাঁ !—ভীম ! পুত্র ! আমি না দেখেই বিচার করেছিলাম

অন্ডায় বিচার ক'রেছিলাম। শাস্তি তোমাকে দেওয়া উচিত ছিল না, জয়সিংহকে দেওয়া উচিত ছিল। এই নাও আমার তরবারি—আমার হয়ে তুমি তার শাস্তিবিধান কর।

ভীম। না, পিতা, অন্ডায় আমার। জয়সিংহ অবোধ।

রাজ। না, ভীমসিং! আমি ঞায় বিচার কর্ব! লোকে বলে যে আমি জয়সিংহের পক্ষপাতী। তা' হ'তে পারে। কিন্তু ঞায় বিচার কর্ব।

ভীম। আমি তাকে ক্ষমা ক'র্লাম।

রাজ। না, ভীমসিংহ! শাস্তিবিধান কর। আরো আমি একটা দেখ্ছি যে, কিছু দিন থেকে তোমাদের যে কারণেই হোক বনে না। ভবিষ্যতেও বোধ হয় বনবে না। দুই জনেই রাজ্যের জন্ম যুদ্ধ ক'র্বে। আমি মরে' গেলে তা' হওয়ার চেয়ে আমার জীবিতাবস্থায়ই সে যুদ্ধ হয়ে থাক। রাজ্যের অমঙ্গল হবে না। এই নাও তরবারি। যুদ্ধ কর।

ভীম। পিতা, আমি রাজ্য চাহি না, এর জন্ম বিবাদ ক'র্বি না—শপথ কর্ছি।

রাজ। প্রমাণ কি ?

ভীম। আমি এই দণ্ডেই রাজ্য পরিত্যাগ করে যাচ্ছি।—প্রতিজ্ঞা ক'র্ছি যে, এই রাজ্যে যদি আর জনগ্রহণ করি, ত আমি আপনার পুত্র নই।

রাজসিংহ কিয়ৎকাল নিস্তব্ধ রহিলেন ; পরে কহিলেন

রাজ। তুমি আজ বড় কঠোর প্রতিজ্ঞা ক'রেছ, ভীম! তুমি নির্দোষ ; জয়সিংহের দোষের জন্ম তুমি স্বদেশ হ'তে চিরনির্বাসিত হবে। তবে আমি যখন ভ্রমবশে রাজবন্ধনী জয়সিংহের হাতে বেঁধে দিয়েছি, এখন বোধ হয় রাজ্যের মঙ্গলের জন্ম তোমার এ রাজ্য পরিত্যাগ করাই ঠিক! কিন্তু মনে রেখো, ভীম! যে, এই স্বার্থত্যাগ রাজ্যের মঙ্গলের জন্ম ক'র্ছ, রাজ্যের প্রতি বিদ্বেষবশে নয়।

ভীম । এই রাজ্যের কল্যাণেই যেন আমি ম'রতে পারি । পিতা, প্রণাম হই । ( পরে জয়সিংহকে কহিলেন ) ভাই, আশীর্বাদ করি, জয়ী হও, যশস্বী হও ।

এই বলিয়া ভীমসিংহ চলিয়া গেলেন

রাজ । আমাব পুত্র বটে ।—জয়সিংহ ! শিক্ষা কর—বীরত্ব কা'র বলে ।

উভয়ে বিপরীত দিকে নিজক্রান্ত হইলেন

### পঞ্চম দৃশ্য

স্থান—দিল্লী নগরীতে ষশোবস্তসিংহের গৃহের দ্বিতল কক্ষ । কাল অপরাহ্ন । দুর্গাদাসের ভ্রাতা সমর ও ষোধপুরের সামন্তগণ উত্তেজিত ভাবে দণ্ডায়মান ।

বিজয়সিংহ । তুমি তা হ'লে উদ্দেশ্য বিফল করে' এসেছো ?

সমর । বিজয়সিংহ ! আমি ক্রোধ সংবরণ ক'র্তে শিখিনি ।

মুকুন্দসিংহ । তবে গেলে কেন ?

সমর । এক উদ্দেশ্যে !—একবার পাপিষ্ঠকে দেখতে—মুখোমুখি দেখতে । সম্রাটের কাছে কোন ভিক্ষা ক'র্তে যাইনি । সে কাজ দুর্গাদাস করুক । আমার কৌশল নাই, চাতুরী নাই । আমার সহায় ভগবান্, আর এই তরবারি ।

সুবলদাস । সেনাপতি এখনো এলেন না কেন ?

বিজয়সিংহ । সম্রাট তাঁকে ছলে বন্দী করেননি ত ?

সমরদাস চীৎকার করিয়া উঠিলেন

সমর । কি ! তাও কি সম্ভব ?

সুবল । না, সমর ! সেনাপতি সম্যক সতর্ক না হ'বে কোন কাজে হাত দেন না ।

মুকুন্দ । এ দুর্দিনে তিনিই আমাদের ভরসা । ঐ তুরীধ্বনি । ঐ যে সেনাপতি ঘোড়া ছুটিয়ে আসছেন !—উঃ ! কি ভয়ানক ছুটিয়ে আসছেন !  
বিজয় । দরকার কি ? সেনাপতি এখানে আসুন না ।

নেপথ্যে দুর্গাদাসের স্বর শ্রুত হইল

“প্রস্তুত হও, প্রস্তুত হও ।”

সমর । প্রস্তুত ! কিসের জন্ত ?

সুবল । ঐ যে দুর্গাদাস উপরে আসছেন ।

বর্ষাক্ত কলেবরে দুর্গাদাস কক্ষমধ্যে প্রবেশ করিলেন

দুর্গা । সকলে প্রস্তুত হও ।

সমর । কিসের জন্ত ?

দুর্গা । আত্মরক্ষার জন্ত ।

বিজয় । কি সংবাদ শুনি ?

দুর্গা । বিস্তারিত বলবার এখন সময় নাই, বিজয়সিংহ ! যশোবস্তুর পবিবারকে ছাড়বে না সম্রাট ; সে তাঁদের চায় ।—মহারানী আর তাঁব পুত্র-কন্যাদের বাঁচাতে হবে ।—একণ্ঠেই মোগলসৈন্য এসে এ বাড়ী ঘেরাও ক'র্বে ।

বিজয় । উপায় ?

দুর্গা । এক মাত্র উপায় আছে, আপনাদের প্রাণদান করা । বন্ধু-গণ ! মহারানীর জন্ত কে কে প্রাণ দিতে প্রস্তুত ?

সকলে । সকলেই প্রস্তুত ।

দুর্গা । কিন্তু শুদ্ধ প্রাণ দিলেই হবে না । মহারানীকে আর তার সন্তানদের নিরাপদ করা চাই ।

ঠিক এই মুহূর্তে যশোবস্তুর রাণী সেই কক্ষে প্রবেশ করিয়া স্থিরকণ্ঠে কহিলেন

রাণী । যশোবস্তুর রাণী নিরাপদ । তার জন্ম চিন্তা নাই, দুর্গাদাস !  
তার পুত্রকে—যোধপুরবংশের প্রদীপকে বাঁচাও । সে বংশ রক্ষা কর ।  
রাণী য জন্ম ভয় নাই । সে ম'রুতে জানে ।—শিশুকে বাঁচাও, দুর্গাদাস !  
দুর্গা । সে চেষ্টার ক্রটি হবে না, মা !—মা, শিশুকে আনুন ।

যশোবস্তুর রাণী প্রস্থান করিলেন

দুর্গা । বিজয় ! কাশিমকে ডাকো ।

বিজয় প্রস্থান করিলেন

দুর্গা । দাদা ! বাহিরে একটা মিষ্টানের বুড়ি আছে, নিয়ে এসো ।

সমর । মিষ্টানের বুড়ি ! কি জন্ম ?

দুর্গা । তর্কের সময় নাই, দাদা !—যাও ।

সমরসিংহ প্রস্থান করিলেন

দুর্গা । মুকুন্দদাস—এই যে কাশিম ।

এই সময় বিজয় ও কাশিম সেই কক্ষে প্রবেশ করিল ও কাশিম দুর্গাদাসকে  
অভিবাদন করিল ।

কাশিম । হুজুর, কি আশ্চে হয় ?

দুর্গা । কাশিম ! তোমায় একটা কাজ ক'র্ত্তে হবে । মহারাজ-  
কুমারকে বাঁচাতে হবে । মোগলসৈন্য এখনি আসবে তাকে ছিনিয়ে  
নিতে ।—তোমায় তাকে বাঁচাতে হবে ।

কাশিম । আশ্চে করুন, হুজুর ।

সমর একটা বুড়ি লইয়া প্রবেশ করিলেন

দুর্গা । এই যে—তুমি এই মেঠায়ের বুড়ি করে' যশোবস্তুর  
শিশুকে নিয়ে যাবে । তুমি মুসলমান তোমাকে কেউ সন্দেহ ক'র্বে না ।  
—বুঝলে ?



কাশিম । কোথায় যেতে হবে, হুজুর ?

দুর্গা । দূরে ঐ মন্দিরের চূড়া দেখ্‌ছো ?

কাশিম । দেখ্‌ছি ।

দুর্গা । ঐ মন্দিরের পুরোহিতের কাছে দিয়ে আস্বে, তার পর যা ক'র্ত্তে হবে, তিনি জানেন । মোগলসৈন্য এসে প'ড়লো বলে'—এই ক্ষণেই যেতে হবে ।

কাশিম । যে আজ্ঞা, হুজুর । আমি লেড়্‌কার জন্ত জান দিতে পার্ব ।

দুর্গা । তা' জানি, কাশিম ! নইলে এ কাজ তোমাকে দিতাম না ।

শিশুকে লইয়া রাণী <sup>পুনর্বার</sup> প্রবেশ করিলেন

দুর্গা । মহারাণী ! শিশুকে কাশিমের হাতে দিন ।—কোনও ভয় নাই, মা—আমি বল্‌ছি ।

রাণী । তুমি যখন ব'ল্‌ছো, দুর্গাদাস—কাশিম ! তোমারও একটা ধর্ম আছে ।

কাশিম । কোন ভয় নেই মা । আমি তাকে নিজের জানের চেয়ে যতন ক'রে নিয়ে যাবো মা !

কাশিম শিশুকে রাণীর হস্ত হইতে লইল

রাণী । ( পুনর্বার শিশুকে কাশিমের হাত হইতে লইয়া চুম্বন করিয়া গদগদস্বরে কহিলেন ) বাছা আমার !

দুর্গা । দেন—আর সময় নাই ।

রাণী । ( পুনর্বার চুম্বন করিয়া কাশিমের হস্তে দিলেন ) ধর্ম সাক্ষী কাশিম ।

কাশিম । ধর্ম সাক্ষী, মা ! কোন ভয় নেই, মা !—( বলিয়া কাশিম শিশুকে বুড়িতে পুরিল ও বুড়ি মাথায় করিল । )

সমর । যদি ধরা পড়ে ?

রাণী । যদি ধরা পড়ে, ত এই ছুরী ওর বুকে বিঁধিয়ে দিও ।  
জীবিতাবস্থায় ওকে কেউ যেন ঔরংজীবের কাছে নিয়ে যেতে না পারে ।

ছুরিকা প্রদান

দুর্গা । কোন ভয় নেই, মা !—যাও, এই পিছনের দরোজা দিয়ে  
যাও ।—এস, দেখিয়ে দিচ্ছি ।

কাশিম বুড়ি লইয়া প্রস্থান করিল । পশ্চাৎ দুর্গাদাস, ও তাঁহার

পশ্চাৎ রাণী বাহির হইয়া গেলেন

বিজয় । দুর্গাদাস ! ধন্য তোমার উপস্থিত বুদ্ধি !

সুবল । এ সব দুর্গাদাস সত্ৰাটের কাছে যাবার পূর্বে ঠিক করে'  
গিয়েছিল, আমি নিশ্চয় ব'লতে পারি ।

মুকুন্দ । ঐ মোগলসৈন্য আসছে !

বিজয় । এ যে অসংখ্য সৈন্য !

সুবল । সঙ্গে স্বয়ং সেনাপতি দিলীব খাঁ !

দুর্গাদাস পুনঃ প্রবেশ করিয়া কহিলেন

দুর্গাদাস । ব্যাস ! এখন নিশ্চিত । মোগলসৈন্য এসে পড়ে'ছে—  
এখন তোমরা মরবার জন্য প্রস্তুত হও ।

বিজয় । আর স্ত্রী কত্তারা ?

দুর্গা । তাদের উপায় আমি ক'চ্ছি ! সত্ৰাটের কাছে যাবার আগে  
কেন সে বিষয় ভাবিনি ?—ডাকো তাঁদের, দাদা !

সমরদাস আবার বাহির হইয়া গেলেন

মুকুন্দ । ঐ মোগলসৈন্য এসে প'ড়লো !

বিজয় । গুলি চালাচ্ছে !

সুবল । দরোজা ভাঙ'বার চেষ্টা ক'চ্ছে !

মুকুন্দ । আগুন জ্বালাচ্ছে, বাড়ীতে আগুন দেবে বোধ হয় ।

দুর্গা । না, হ'লো না ; আর সময় নাই ।

নারীগণের সঙ্গে মমরদাস কক্ষে প্রবেশ করিল

দুর্গা ! মা সকল ! আজ তোমাদের জন্ত বড় কঠোর বিধান ক'র্ত্তে হ'চ্ছে । আজ তোমাদের পুড়ে' ম'রতে হবে ।

জ্ঞৈনেক প্রোঢ়া নারী । সে আমাদের পক্ষে কিছু নূতন নয় সেনাপতি ! আমরা ক্ষত্রিয় নাবী, ম'রতে জানি ।

দুর্গা । অন্য উপায় নাই, মা ! আমরাও ম'রতে যাচ্ছি—যাও মা সকল । ঐ ঘরে যাও ; ঐ ঘর বাকুদে পোরা । তা'তে তোমাদের দাঁড়াবার মাত্র স্থান আছে । বাকুদের উপর গিয়ে দাঁড়াও, তার পর আর কি ব'লব মা !

উক্ত নারী । তার পর আমি স্বহস্তে তা'তে আগুন দেবো । চল সব !

আনুলায়িতকেশা রাণী সেই কক্ষে পুনঃ প্রবেশ করিলেন

নারীগণ । রাণীমার জয় হউক !

রাণী । ( জয় ? আমাদের জয় মৃত্যু ! ম'রতে যাচ্ছো !—যাও !—যাও স্বর্গধামে !—আমি তোমাদের সঙ্গে আজ যাব না । আমি আজ পারি যদি, বাঁচ'বো । এখনি মরতে চাচ্ছিলাম, দুর্গাদাস ! না, আমি মর'ব না । উপর থেকে কে আমাকে ডেকে ব'লে—“সময় হয় নাই—তোমার কাজ বাকি আছে ।” ) আমায় বাঁচ'তে হবে । দুর্গাদাস ! পারো ত আমায় এই দিন—এই এক দিন মাত্র আমাকে বাঁচাও । ( জান্ন পাতিয়া করযোড়ে ) ঈশ্বর ! আজ আমাকে রক্ষা কর । ( উঠিয়া ) তার পর—তার পর—দেশে আগুন জাল'বো—এমন আগুন জাল'বো যে, সপ্তসমুদ্রের বারি তাকে নেবাতে পার'বে না ।

দুর্গা । মা ! পারি ত আজ আমাদের প্রাণ দিয়ে মহারাণীকে বাঁচাবো । তোমরা যাও, মা । দরোজা ভাঙ'লো বলে' !

অস্তান্ত নারীগণ প্রস্থান করিলেন

রাণী । চল তবে, দুর্গাদাস !—বোসো । আমি কন্যাকে নিয়ে আসি ।  
তাকে ফেলে যাবো না । বুকে কবে নিয়ে যাবো ।—তোমরা এসো !

এই বলিয়া মহারাণী প্রস্থান করিলেন

দুর্গা । দাদা !

সমর । ভাই ।

দুর্গা । চল তবে ম'রতে ।

সমর । চল ।

দুর্গা । একটু অপেক্ষা কর এদের শেষ দেখে যাও । ঐ—ঐ—  
( দূরে ভীষণ শব্দ ) ঐ যাক । হয়ে গিয়েছে, সব শেষ ।—চল ।

সমর । চল ।

দুর্গা । ভাই । ভাই । বুঝি শেষ দেখা । মর্কবার আগে এসো ।

উভয়ে কোলাকুলি করিলেন

পটপরিবর্তন

ষষ্ঠ দৃশ্য

স্থান—সম্রাটের অন্তঃপুর কক্ষ । কাল—প্রভাত । ঔরঞ্জীব একাকী

ঔরঞ্জীব । কি ।—যশোবন্তের বাণী আড়াই শ' মাত্র সৈন্য নিয়ে  
পাঁচ হাজার মোগলসৈন্যেব ব্যুহ ভেদ করে' চলে' গেল ।—আর সে  
মোগলসৈন্যের সৈন্যাধ্যক্ষ স্বয়ং দিলীব খাঁ !—এব মধ্যে কিছু রহস্য  
আছে !—দৌবারিক !

নেপথ্যে । খোদাবন্দ ।

ঔরঞ্জীব । সেনাপতি দিলীব খাঁ ।

নেপথ্যে । যো হুকুম ।

ঔরঞ্জীব । এখন সম্রাজ্ঞীর কাছে মুখ দেখাবো কি করে' ?  
অপমানে আমার অঙ্গ-প্রত্যঙ্গ জ'লছে ।

বেগে গুলনেয়ার কক্ষে প্রবেশ করিলেন

গুলনেয়ার । সম্রাট ! এ যা শুন্ছি, তা' কি সত্য ?

ঔরঞ্জীব । কি সত্য ?

গুল । এই সংবাদ—যে যশোবস্তুর রাণী আড়াই শ' মাত্র সৈন্য নিয়ে  
মোগল কটক ভেদ ক'রে চলে' গিয়েছে ?

ঔরঞ্জীব । হাঁ প্রিয়ে, সত্য ।

গুল । তোমার এই সৈন্য, এই সেনাপতি, এই শক্তি নিয়ে তুমি  
ভারতবর্ষ শাসন ক'র্ত্তে বসে'ছো ?

ঔরঞ্জীব । প্রিয়তমে—

গুল । আর কাজ নেই সোণাগে সম্রাট । আমার একটা যৎ-  
সামান্য ইচ্ছা পূর্ণ করবার জন্ত তোমাকে বলে'ছিলাম তার এই পরিণাম !

ঔরঞ্জীব । আমার যথাসাধ্য ক'রেছি !

গুল । তোমার যথাসাধ্য তুমি করে'ছো ?—তোমার সাধ্য এইটুকু ?  
তুমি ব'লতে চাও—আজ তোমার হাতে পড়ে', মোগল রাজশক্তি এমন  
ক্ষীণ হ'য়ে গিয়েছে যে, এক নারী—সঙ্গে আড়াই শ' মাত্র সৈন্য—সেই  
শক্তি দীর্ণ, চূর্ণ, দলিত করে' চলে' গেল ! হা ধিক !

ঔরঞ্জীব নীরব হইলেন

গুল । যশোবস্তুর রাণী এখন কোথায় ?

ঔরঞ্জীব । সম্ভবতঃ তিনি রাণা রাজসিংহের আশ্রয়ে—মেবারে ।

গুল । মেবার আক্রমণ কর—আমি যশোবস্তুর রাণীকে আর  
তার পুত্রকে চাই ।

ঔরঞ্জীব । গুলনেয়ার, এ বিষয়ে বিবেচনা করা যাবে ।

শুল। বিবেচনা ?—বেগম শুলনেয়ারের ইচ্ছাই সম্রাট ঔরং-জীবের কাছে যথেষ্ট নয় কি ?—বিবেচনা ?—শোন, আমার এক কথা শোন ; আমি যশোবন্তের রাণীকে চাই-ই । সে স্বর্গে থাকুক, মর্ত্যে থাকুক, পাতালে থাকুক, আমি তাকে চাই । মেবার আক্রমণ কর ।

ঔরংজীব । প্রিয়তমে—

শুল । শুভে চাই না । মেবার আক্রমণ কর !

এই বলিয়া সম্রাজ্ঞী গভীর অভিমানে কক্ষ পরিত্যাগ করিলেন । ঔরংজীব

সেই কক্ষে একাকী পাদচারণ করিতে লাগিলেন ।

ঔরংজীব । আমি এ কথা বিশ্বাস কর্তে পারি না । আড়াই শ' মাত্র রাজপুতসৈন্য পাঁচহাজার মোগলের বাহু ভেদ কবে' চলে গেল ! নিশ্চয় এর মধ্যে বিশ্বাসঘাতকতা আছে ।—কিন্তু সেনাপতি দিলীর খাঁ বিশ্বাসঘাতকতা কর্তে, এই বা কি বলে' বিশ্বাস কবি ? দিলীর খাঁ—আমার বাল্যের বন্ধু, যৌবনের সহায়, বার্ককে্যব মন্ত্রী—দিলীর খাঁ—সবল, মহৎ, উদার দিলীর খাঁ—আমার বিশ্বাসঘাতক হবে !—আমি বিশ্বাস কর্তে পারি না । কিন্তু আড়াই শ' রাজপুতসৈন্য পাঁচহাজার মোগলসৈন্য কেটে বেরিয়ে গেল ! আর সে মোগলসৈন্যের সেনাপতি স্বয়ং নির্ভীক পরাক্রান্ত বীরবর দিলীর খাঁ !—তাই বা কি বলে' বিশ্বাস করি—নিশ্চয় এব ভিতব কোন গুঢ় রহস্য আছে ।—এই যে দিলীর খাঁ !

দিলীর খাঁ প্রবেশ করিয়া অভিবাদন করিলেন

দিলীর । বন্দগি, জাঁহাপনা !

ঔরংজীব । দিলীর খাঁ ! তোমায় ডেকে পাঠাইছি জান্তে যে, এ কথা সত্য কি না যে—

দিলীর । সম্রাট যা শুনেছেন, তা সম্পূর্ণ সত্য ।

ঔরংজীব । আমার কথা শেষ কর্তে নাও—এ কথা সত্য কি না

যে, আড়াই শ' মাত্র রাজপুত পাঁচহাজার মোগলসৈন্য ভেদ করে' চলে গিয়েছে ?

দিলীর । হাঁ জাঁহাপনা, এ কথা সম্পূর্ণ সত্য !

ঔরং । আর সে সৈন্যের সেনাপতি তুমি !

দিলীর । হাঁ জনাব !

ঔরংজীব । যুদ্ধ ক'রেছিলে ?

দিলীব । জনাব ! এই যুদ্ধে আমাদের পাঁচ হাজার সৈন্যের মধ্যে পাঁচ শ' বেঁচেছে । রাজপুতদেব মধো বোধ হয় পাঁচটি ।

ঔরংজীব । আর যশোবস্তুর রাণী ।

দিলীর । তিনি সামন্তদের সঙ্গে উদয়পুর অভিমুখে গিয়েছেন ।

ঔরংজীব । শিশু ?

দিলীব । শিশুকে সেই সৈন্যদের মধ্যে দেখি নাই জনাব ! তবে যশোবস্তুর রাণীর বুকের উপর একটি তিন বৎসরের কন্যা ছিল ।

ঔরংজীব । মোগলসৈন্য কি মেঘের অধম হ'য়েছে যে, একটা নারীর গতি প্রতিরোধ ক'র্তে পারলে না ?—সঙ্গে তার আড়াই শ' মাত্র সৈন্য ?

দিলীর । জানি না, জাঁহাপনা । কিন্তু যখন সেই নারী মোগলসৈন্য-ব্যাহের সম্মুখে এসে দাঁড়ালেন—নিরবগুণ্ঠনা, আলুলায়িতকেশা, বক্ষে সুপ্ত কন্যা—তখন মহারাণীর আড়াই শ' সৈন্য আড়াই লক্ষ বোধ হ'ল । সেই মোগলসৈন্য কৃষ্ণমেঘের উপর দিয়ে তিনি বিদ্যাতের মত এসে চলে' গেলেন । কেউ তাঁকে স্পর্শ ক'র্তে সাহস ক'ল্লে না ।

ঔরংজীব । আর তুমি ?

দিলীর । আমি দূরে দাঁড়িয়ে সে অপূর্ব মাতৃমূর্তি দেখলাম । ব'লতে চেষ্টা করলাম—“ধর যশোবস্তুর রাণীকে ।”—কণ্ঠ রুদ্ধ হোল । তরবারি খুলতে চেষ্টা করলাম—তরবারি উঠলো না । পিস্তল নিলাম—পিস্তল হাত থেকে প'ড়ে গেল ।

ঔরংজীব । দিলীব খাঁ ! তুমি কি পাগল হ'য়েছ ?

দিলীর । হয ত হযেছি । জানি না ! কিন্তু সেই মুহূর্ত্তেই যেন বোধ হল যে, আমি আর একটা মানুষ হ'য়ে গেলাম ! এক মুহূর্ত্তে কে যেন এসে আমার হৃদযেব দ্বারে আঘাত করে' রুদ্ধ-দুয়ার খুলে দিলে । একটা নূতন জগৎ দেখলাম ।

ঔরংজীব । তাই তুমি পাঁচহাজার সৈন্য নিষে সঙের মত খাড়া হ'য়ে দাঁড়িয়ে দেখলে ?

দিলীর । হাঁ, জনাব ! দেখলাম সে এক মহিমময় দৃশ্য । কি সে মহিমা ! আশ্চর্য্য !—আলুলাযিতকেশা নাবী । বৃকেব উপর তার ঘুমন্ত শিশু ! কি সে দৃশ্য, জাঁহাপনা !—নির্ম্মেঘ উষাব চেয়ে নির্ম্মল, বীণার বাক্সারের চেয়ে সঙ্গীতময়, ঈশ্বরের নামের চেয়ে পবিত্র—সেই মাতৃমূর্ত্তি ।

আমি বজ্রাহতের ন্যায় দাঁড়িয়ে রৈলাম ।

ঔবংজীব । তার পব ?

দিলীর । তার পব সে মূর্ত্তি অন্তর্হিত হ'লে জ্ঞান হোল । চেষ্টে উঠলাম, “আক্রমণ করো ।” আমাদের পাঁচহাজার তরবারি সেই সন্ধ্যালোকে বলসে উঠলো ! বিপক্ষ ফিরে দাঁড়ালো । যুদ্ধ বাধলো ! মানুষ প'ডতে লাগলো—ভূমিকম্পে বালুস্তূপের মত । যুদ্ধ শেষ হ'লে দেখলাম—আমাদের পাঁচশ' সৈন্য অবশিষ্ট ; বিপক্ষ পক্ষের একজনও না । মৃতদেব মধ্যে দুর্গাদাস আর তার ভাইকে খুঁজে পাওয়া গেল না ।

ঔরংজীব । দিলীর ! তুমি মেয়েমানুষেরও অধম ! যাও ।

উভয়ে বিপরীত দিকে নিজ্জাস্ত হইলেন



## সপ্তম দৃশ্য

স্থান—রাণা রাজসিংহের বহির্কাটা ! কাল—অপরাহ্ন । উচ্চ আসনে রাণা  
রাজসিংহ । সম্মুখে শিশুহস্তে যশোবন্তসিংহের রাণী মহামায়া জানু  
পাতিয়া উপবিষ্টা । দক্ষিণে দুর্গাদাস ও কাশিম

রাণী । রাণা ! আমার এই শিশুকে আপনার দুর্গে স্থান দিন,  
বেশী দিনের জন্ত নয়, রাণা ! সামান্য কিছুদিনের জন্ত !

রাজসিংহ । মহামায়া, তোমার পুত্র আমার পর নয় ! এর জন্ত  
মিনতির প্রয়োজন কি ?—দুর্গাদাস ! ঔরঞ্জীব কি এরই প্রাণবধ  
ক'র্তে চান ?

দুর্গা । নইলে আর কি উদ্দেশ্য হ'তে পারে, মহারাণা ?

রাণী । রাণা ! এক পুত্র আর এক কন্যা—শুধু এই সম্পত্তি নিয়ে  
সে দিন দিল্লী থেকে বেরিয়েছিলাম । পথে কন্যাটি হারিয়েছি । আমার  
সম্পত্তির অবশিষ্ট মাত্র আছে এই সন্তোজাত পুত্রটি, আমার এই শেষ,  
একমাত্র, সর্বস্বধন পুত্রটিকে রক্ষা করুন, রাণা ! ঈশ্বর আপনার মঙ্গল  
ক'র্ষেন ।

রাজসিংহ । তোমার পুত্রের জন্ত কোন চিন্তা নাই, মহামায়া ! আমি  
তাকে নিজের প্রাণ দিয়ে রক্ষা ক'র্ষ ।

রাণী । রাণার জয় হোক ।

রাজসিংহ । দুর্গাদাস ! ঔরঞ্জীবের অত্যাচারের মাত্রা ক্রমেই  
বাড়ছে । তিনি হিন্দুদের উপরে আবার এই জিজিয়া কর স্থাপিত  
ক'রেছেন ! তার পরে মাড়বারপতি যশোবন্তসিংহের পরিবারের প্রতি  
এই দারুণ অবিচার !—দেখি, পত্র লিখে সাবধান করে' দিয়ে, যদি তাঁকে  
নিবৃত্ত ক'র্তে পারি ।

মহামায়া। পত্র লিখে ? অনুনয় করে ? নতজাঙ্গু হ'য়ে ভিক্ষা চেয়ে ? না, মহারাণা ! আর না ! আর না ! এবার যবনরাজ্য উচ্ছেদ ক'রব ।

রাজসিংহ। না, মহামায়া ! বিনা বহুরূপাতে তা' সিদ্ধ হবে না । যখন একটা রাজ্য প্রতিষ্ঠিত হ'য়েছে, তাকে তখন ধ্বংস ক'র্ত্তে চেষ্টা করা অন্তায় । বরং তাকে আরও সুপ্রতিষ্ঠিত ক'র্ত্তে চেষ্টা করা উচিত ।

মহামায়া। বিজাতি-শাসনকে রক্ষা ?—এই কি ক্ষত্রধর্ম ?

রাজসিংহ। ক্ষত্রধর্ম কেবল বধ করার ধর্ম নয়, মহামায়া ! বধ করা বিঘাটা একটা উচ্চ অঙ্গের বিঘা নয় । আত্মরক্ষার্থ কিংবা আত্মরক্ষার্থ ভিন্ন উদ্দেশ্যে বধ করার নাম হত্যা ।

পরে রাজসিংহ কাশিমের পানে চাহিয়া জিজ্ঞাসা করিলেন এ কে ?

দুর্গা। এ কাশিমউল্লা । আমাদের পুরাতন বন্ধু । এ নিজের প্রাণ তুচ্ছ করে' আমার প্রভুর পুত্রকে রক্ষা করে'ছে ।

কাশিম। রাণা ! মুই এদের পুরানো চাকর । মহারাণা একবার মোরে বড় বিপদে বাঁচান । মুই সেই থেকে এদের ঘরে খায়ে মানুষ ।

রাজসিংহ। দুর্গাদাস ! মুসলমান জাতের মধ্যে কাশিমও ত জন্মায় !

কাশিম। মহারাজা, মোদের জাতের নিন্দা করো না । মোরা জাতি ধারাপ নই । মোরা সব হ'তে পারি ! নেমক্‌হারাম নই ।

রাজসিংহ। না, কাশিম ! তোমার জাতির নিন্দা ক'র্ছি না । তবে বাদশাহের সঙ্গে তোমার তুলনা ক'র্ছি । বাদশাহ এই ছোট ছেলেটির প্রাণ নিতে চান—আর তুমি—

কাশিম। আহা, দেখ দেখি ! আহা এই চেংড়া । এখনো চোখ ফুটেনি ।—আহা, বাছা মোর শীতের রোদ্দুরে বড় দুকু পেয়েছে । বাছা মোর !—হঁ—এখন পুট পুট কোরে তাকানো হ'চ্ছে । আহা ! চোক ত নয়—লীলপদ ।

রাজসিংহ। ঔরংজীব ! তুমি দিল্লীর সিংহাসনে বসে' এক নিরীহ

শিশুকে হত্যা করবার জন্ত ব্যগ্র ; আর তোমারই জাতের এই কাশিম তাকে প্রাণ দিয়ে রক্ষা কর্তে প্রস্তুত !—ঈশ্বরের চোখে কে বড়, ঔরঞ্জীব ?

রাণী । রাণা ! আমি এই বিরাট অত্যাচারের প্রতিশোধ নেবো ! —এর প্রতিহিংসা নেবার জন্তই সে দিন অত্যাচারী নাবীদের সঙ্গে পুড়ে মরিনি ! তার জন্তই এখনও বেঁচে আছি—আপনি কেবল এই শিশুকে রক্ষা করুন !

আজ । আমি বলে'ছি, এর জন্ত কোন চিন্তা নাই, মহামায়া ! তুমি আর তোমার পুত্র এখানে নিশ্চিন্ত হৃদয়ে বাস কর ।

রাণী । না, রাণা ! আমি এখানে বাস কর'ক' না । আমার এ ঘর নয় । আমি আমার মৃত স্বামীর রাজ্যে ফিরে যাব । সম্পদে বিপদে, সুখে দুঃখে, শান্তিতে বিগ্রহে, জীবনে মরণে, স্বামীর ঘরই নাবীর ঘর—পিতৃগৃহ পর । আমি মাড়বারে ফিরে যাবো ।

রাজা । কিন্তু সে স্থান ত এখন তোমার পক্ষে নিরাপদ হবে না, মা ।

রাণী । নিরাপদ ! আমি কি এখানে নিরাপদ খুঁজতে এসেছি ? না, রাণা, আমি আর নিরাপদ খুঁজি না । আমি আপদ খুঁজি । আপদের ক্রোড়ে আমি লালিত, ভূমিকম্পে আমার জন্ম, বক্ষায় আমার আবাস, প্রলয়মেঘে আমার শয্যা ।—বিপদ ! তার সঙ্গে ত সই পাতিয়েছি, রাণা । আমার বিপদ !—বিধবা, পুত্রহারা, হৃতসর্বস্বা, পথেব ভিখারিণী আমি । আমার আবার বিপদ ! রাণা, আমার একমাত্র বিপদ অবশিষ্ট আছে—সে এই শিশুর হত্যা । তাকে রক্ষা করুন, রাণা ! আর কিছু চাই না, তাকে রক্ষা করুন । আমি মাড়বারে ফিরে যাবো ! আগুন জালবো ! আগুন জালবো ! এমন আগুন জালবো—যাতে ঔরঞ্জীব ত ছার—যাতে সমস্ত মোগলসাম্রাজ্য ধ্বংস, চূর্ণ, ভগ্ন হয়ে উড়ে যাবে ।

## দ্বিতীয় অঙ্ক

### প্রথম দৃশ্য

স্থান—দিল্লীর প্রাসাদের অন্তঃপুরস্থ উদ্যান। কাল—সন্ধ্যা। ঔরংজীবের পৌত্রী, আকবরের কন্যা রাজিয়া একাকিনী সে উদানে বেড়াইয়া গাহিতেছিলেন :

কোথা যাও হে দিনমণি,                      আনায় সঙ্গে নিয়ে যাও ভাই

যখন নিয়ে গেলে চ'লে, তোমার সর্ব গরিমাই

চাহে কেবা রৈতে ভবে      আধার ছেয়ে আসে যবে !

—চাহে যে সে থাকুক পড়ে' আমি ত না রৈতে চাই।

তুফান মাঝে, সিন্ধুনীরে, আশা ভেলায় বেঁধে বুক,

থাকুক তা'রা যাদের কাছে বেঁচে থাকাই পরম সুখ ;

যতদিন এ জীবন রাখি,

আমি যেন সুখে থাকি ;

সুখের বেলা ফুরিয়ে গেলে আমি যেন চলে যাই।

নিকটস্থ একটি বকুল গাছে একটি কোকিল ডাকিয়া উঠিল।

রাজিয়া একাগ্রমনে তাহা শুনিতে লাগিলেন।

এই সময় গুলনেয়ার প্রবেশ করিয়া রাজিয়াকে ডাকিলেন

গুলনেয়ার। রাজিয়া !

রাজিয়া। চূপ্ !—কোকিল ডাকছে !

গুল। কি হাবা মেয়ে !—কোকিলের ডাক আর কখনও শুনিস্নি ?

রাজিয়া। শুনেছি। শুনেছি বলে, কি আর শুন্তে নেই ?—ঐ

শোন ! আবার—ঐ চূপ কর্ ! দাছমা—এই জগৎটা যদি একটা অশ্রান্ত

ঝঙ্কার হোত, বেশ হোত, না ?

শুল । বেশ হোত ? তা' হ'লে প্রাণ ওষ্ঠাগত হোত । একটা কথা কইবার অবসর পেতাম না ।

রাজিয়া । কথা !—কথার জ্বালায় ত অস্থির, ঠান্দি ! তার উপরে বড্ড বোঝা যায় ! একটা কথা ব'লেই তা'র পিছনে অমনি একটা মানে ।—অস্থির !—দু'পা এগিয়ে যাবার যো নাই ।—সঙ্গে সঙ্গে মানে ঘুর্ছে ।

শুল । আর গান ?

রাজিয়া । মানে ধর্বার ছোঁবার যো' নাই । কেবল একটা উদাস ভাব মনে এনে দেয় । বোঝ'বার যো' নাই । এই যেমন 'চামেলিয়া, বেলা, চম্পা' । এর মানে বেশ বোঝা যায়—কি না তিনটে ফুল—চামেলিয়া, বেলা আর চম্পা ! কিন্তু ( হাশ্বিরে সুর করিয়া ) 'চামেলিয়া বেলা চম্পা'—ধর দিখিনি মানে !

শুল । তা' বটে—ওর মানে ধর্বার যো' নাই । ভারি সুন্দর !

রাজিয়া । না, দাদুমা ! তুমি গান কিছু ভালোবাসো না, তা' আমি জানি । কিন্তু আমি গানে ডুবে আছি, মজে' আছি, বিভোর হয়ে আছি ।—সুরে গুন্-গুন্ করিতে লাগিলেন—“চামেলিয়া বেলা চম্পা ।”

শুল । রাজিয়া, তুই গান শিখেছিলি কার কাছে ?

রাজিয়া । বাবার ওস্তাদের কাছে । বাবা গান বড় ভালোবাসেন । বাবা নিজে কটা গান তৈয়ের করে'ছেন । ওস্তাদজি সুর দিয়ে দিয়েছেন । এই আমি একটা তাঁরই গান গাচ্ছিলাম—রাগিণী পুরবী, ভারি মিষ্টি রাগিণী ! ( পুরবী সুরে ) “তা রি না তোম তোম তোম না দে রে তোম্”—উঃ কি মিষ্ট !

শুল । মোরোঝার চেয়ে ?

রাজিয়া । দাদুমা ! তুমি একেবারে একটা জন্ত ! একটা গাধার মধ্যে যতটুকু সুর জ্ঞান আছে—তাও তোমার নেই ।—আচ্ছা, ঠান্দি,

এই গাথাগুলো কি বিশ্রী ডাকে ! নীচেকার গান্ধার থেকে একেবারে উপরকার কোমল রেখাব ।

শুল । তা' হবে !

রাজিয়া । আচ্ছা, ঠান্দি, কোকিলের স্বর এত মিষ্ট, আর কাকের স্বর এত কর্কশ কেন ?—আমার বোধ হয় কোকিলের স্বর থেকে গানের সৃষ্টি হ'য়েছিল । সা, বে, গা, মা, পা—ঠিক কোকিলের স্বর ।—শোন—  
কু, কু, কু, কু, কু—ঠিক কোকিল !

শুল । তোমাদের বাঙ্গলাদেশে খুব গানের চর্চা হয় বুঝি ?

রাজিয়া । তা' হয় । তবে তা'রা কার্তন গায় বেশী । আমি একটা একটু শিখছিলাম—শুনবে ? শোন—

বঁধুয়া কি আর কহিব আমি !

জীবনে মরণে, জনমে জনমে প্রাণনাথ হৈয়ো তুমি ।

তোমার চরণে আমার পরণে লাগিল প্রেমের ফাঁসি,

মন প্রাণ দিয়ে সব সমর্পিয়ে নিশ্চয় হইনু দাসী ।

একুলে শুকুলে দুকুলে গোকুলে কে আর আমার আছে,

রাধা বলে আর শুধাইতে নাথ দাঁড়াবে আমার কাছে ।

তার পরটা জানি না ।—বেশ !—না ?—আচ্ছা, দাদুমা ! ঠাকুর্দা গানের উপর এত চটা কেন ?—তিনি আমাকে খুব ভালোবাসেন । কিন্তু যদি দৈবাৎ একটা তান ধরিছি—ত আমার দিকে চেয়ে বলেন “ধঁয়া”—আর ঘাড় নাড়েন ।

শুল । তোর ঠাকুর্দা তোকে খুব ভালোবাসেন ?

রাজিয়া । উঃ ! কি ভালোই বাসেন ! ( সুর করিয়া ) “বঁধুয়া—”  
তোমাকে বাসেন ?

শুল । আমায় ?—তোর ঠাকুর্দাকে একবার জিজ্ঞাসা করে' দেখিস্ ।

রাজিয়া। ( সুর কবিতা ) “কি আর কহিব আমি—” তুমি যা কঠে বল তাই করেন ?

শুল। কবেন ? দেখছিস্ না যে আমার জন্তে একটা যুদ্ধই বাধলো ।

রাজিয়া। যুদ্ধ ! যুদ্ধ কাবে’ বলে, ঠান্দি ।

শুল। লড়াই ।

রাজিয়া। ওঃ!—এ একখান তলোয়ার নেয, ও একখান তলোয়ার নেয । তার পবে দু’জনে বাজনার সঙ্গে তালে তালে নাচে, আব ঘোরে—আমি দেখেছি বাংলাদেশে ! যুদ্ধ করার সঙ্গে হবে, দাদুমা !

শুল। মেবারেব সঙ্গে ।

রাজিয়া। মেবার পুরুষমানুষ, না মেয়েমানুষ ?

শুল। দূর হাবা মেয়ে ! মেবার একটা দেশ ।

রাজিয়া। বাবা ! একটা দেশের সঙ্গে যুদ্ধ হবে।—কেন, ঠান্দি, যুদ্ধ হবে কেন ?

শুল। এক রাণীকে ধবে’ নিয়ে আসবার জন্ত ।

রাজিয়া। তুমি বুঝি তাঁকে তাই বলে’ছো ?

শুল। হাঁ ।

রাজিয়া। ধরে’ নিয়ে এসে কি ক’র্বে ? তাঁকে ভালোবাসবে ?

শুল। তাঁ’র শ্রদ্ধ ক’র্বে ।

রাজিয়া। বেঁচে থাকতে থাকতেই ? আমি ত শুনেছি মরে’ গেলেই শ্রদ্ধ হয় ।—ঐ যে ঠাকুর্দা আর বাবা আসছেন ।—দেখবে মজা ।

ঔরঞ্জীব ও আকবর প্রবেশ করিলেন

রাজিয়া কীর্তন ধরিল—“বধূষা—”

ঔরঞ্জীব। র্যা—রাজিয়া !—আবার !

রাজিষা । ঐ শোন—হাঃ হাঃ হাঃ—হাসিতে হাসিতে পলায়ন  
কবিল ।

ঔরংজীব । আকবর । তোমাকে বঙ্গদেশে পাঠিয়েছিলাম—শাসন  
করা শেখবার জন্ত । তা' তুমি দেখ'ছ নৃত্য-গীতেই কাল হরণ কবে'ছো !  
আর এই মেয়েটাকে পর্য্যন্ত গান শিখিয়েছো ।—এত অপদার্থ তুমি, তা'  
জাস্তাম না ।

শুল । সত্য কথা । মেয়েটার গান ভিন্ন আব কথা নেই । দিবা-  
রাত্রিই গুন-গুন ক'র্ছে । জ্বালাতন !

ঔরং । ওর পরকাল খেয়েছো । সে যাক, সে বিষয়ে যথাবিহিত  
কবা যাবে । এখন আকবর, তুমি মেবার যুদ্ধে যাও । আমি তোমার  
অধীনে পঞ্চাশ হাজার সৈন্ত পাঠাচ্ছি । মেবার আক্রমণ কর ।

আকবর । যে আজ্ঞা ।

ঔরং । আমি শুনেছি, তুমি' অত্যন্ত অলস, বিলাসী, আর সন্তোষ-  
প্রিয় হ'বেছো । জীবনের কঠোরতা কিছু শিক্ষা করা তোমার দরকার ।  
মেবার যুদ্ধে যাবাব জন্তেই আমি তোমাকে ডেকে পাঠাই নি,  
তোমার সংস্কারের জন্ত তোমায় প্রধানতঃ ডেকে পাঠাইছি ।  
যাও—প্রস্তুত হওগে । সেনাপতি দিলীব খাঁকে তোমার সাহায্যে  
পাঠাচ্ছি । আর আমি আর আজীম দোবারীতে গিয়ে তোমাদেব জয়ের  
প্রতীক্ষা ক'র্ব ।—যাও ।

আকবর নীরবে প্রস্থান করিলেন

ঔরংজীব । শুলনেয়ার ! তোমার অনুবোধে আজ একটা প্রকাণ্ড  
যুদ্ধে হস্তক্ষেপ করে'ছি ।

শুল । প্রকাণ্ড যুদ্ধ ! একটা সামান্য জনপদ মেবারের সঙ্গে যুদ্ধ  
একটা প্রকাণ্ড যুদ্ধ !—আমি ত জানি, ভারতসম্রাট ঔরংজীবের কাছে এ  
একটা অতি তুচ্ছ ব্যাপার ।



ঔরঞ্জীব । তা' নয় সম্রাজ্ঞী ! যে দিন আড়াই শ' রাজপুতসৈন্য পাঁচ হাজার মোগলসৈন্যকে মথিত করে' চলে' গিয়েছে, সেই দিন জেনেছি যে, রাজপুত জাতি একটা অসমসাহসিক জাতি । আমি তাই এ যুদ্ধে বঙ্গদেশ হ'তে যুবরাজ আকবর আর কাবুল হ'তে কুমার আজীমকে ডেকে পাঠাইছিলাম ।—মেবার-জয় নিতান্ত সহজ ও স্বতঃসিদ্ধ নয় ।

গুল । আমি মেবার-জয় চাহি না । আমি যশোবন্তের রাণীকে চাই—আর কিছু নয় ! তা'ব সঙ্গে একবার সাক্ষাত চাই ।

ঔরং । এবার সাক্ষাত হবে ।—ভিতরে চল, গুলনেরার । বৃষ্টি প'ড়ছে । এই বলিয়া নিজক্রান্ত হইলেন ।

### দ্বিতীয় দৃশ্য

স্থান—আবুর গিরিহুর্গ । কাল—দ্বিপ্রহর দিনা । দুর্গাদাস ও রাঠোর সামন্তদ্বয়—মুকুন্দ ও শিব দণ্ডায়মান ।

দুর্গাদাস । শিবসিং মুকুন্দসিং ! রাণীর পুত্রকে তোমাদের রক্ষণা—বেক্ষণে রেখে যাচ্ছি । এ আবাসস্থানের অস্তিত্ব মাত্র যেন প্রকাশ না হয় ।

উভয়ে । তা, হবে না, সেনাপতি !

দুর্গাদাস । সম্রাট সসৈন্তে মেবার আক্রমণ করে'ছেন । কুমারকে আর উদয়পুরে রাখা শ্রেয় নয় বলে'ই রাণার উপদেশক্রমে এখান নিয়ে এসেছি ।

মুকুন্দ । সম্রাট মেবার আক্রমণ করে'ছেন কেন ?

দুর্গাদাস । সেখানে যোধপুরের রাণী ও রাজকুমারকে আশ্রয় দেওয়াই তার প্রধান কারণ । তবে আর এক কথা শুনেছি যে, ঔরঞ্জীবের অত্যাচারের, বিশেষতঃ হিন্দুর উপর এই জিজিয়া করে'র প্রতিবাদ করে' রাণা যে পত্র লিখেছিলেন, সেই পত্রই এর কারণ । কিন্তু সেটা একটা

রাণা যে পত্র লিখেছিলেন, সেই পত্রই এর কারণ।' কিন্তু সেটা একটা গুজর মাত্র। সে পত্র সতেজ, নির্ভিক বটে; কিন্তু সে অতি নম্র, সরল। তা'তে সম্রাটের ক্রুদ্ধ হবার কোন কারণ ছিল না। আমি সে পত্র দেখেছি।

শিব। আপনি এই যুদ্ধে যাচ্ছেন ?

দুর্গাদাস। আমার প্রভুকে আশ্রয় দেবার জন্যই এ যুদ্ধ। আমি এখানে নিশ্চিন্ত হ'য়ে ব'সে থাকলে চলে না, শিব! তোমরা এ দুর্গে থাকবে। এখান থেকে এক পা ন'ড়বে না। এ দুর্গ খুব নিভৃত, খুব গুপ্ত, খুব নিরাপদ। তবু এই দুর্গ পাহারা দেবার জন্য দুই শ সৈন্য রইল। যদি কোন বিপদের সম্ভাবনা মাত্র দেখ, আমাকে তৎক্ষণাৎ জানাবে।

মুকুন্দ। সম্রাট কি মেবার আক্রমণের জন্য রওনা হয়েছেন ?

দুর্গাদাস। হাঁ। তাঁর সৈন্য পল্লপালের মত মেবার রাজ্য ছেয়েছে। চিতোর, মণ্ডলগড়, মন্দশূর ও জীড়ন দুর্গ সম্রাটের হস্তগত হ'য়েছে। রাণা তাঁর সৈন্য সব পার্কৃত্য প্রদেশে টেনে এনেছেন।

শিব। আমাদের মহারাণী কোথায় ?

দুর্গাদাস। মাড়বারে! তিনি দশ হাজার মাড়বারসৈন্য—সৈন্যাধ্যক্ষ গোপীনাথের অধীনে মেবারে পাঠিয়েছেন। নিজে আরও সৈন্য সংগ্রহ করে' নিয়ে আসছেন!—আচ্ছা যাও, তোমরা আহালাদি করগে যাও।

মুকুন্দ ও শিব প্রস্থান করিলেন

দুর্গাদাস। আজ মুষ্টিমেয় রাজপুত্র সৈন্য নিয়ে বিরাট মোগলসৈন্য-সমুদ্রে নামছি! ঈশ্বর জানেন এর পরিণাম কি! এক আশা যে, মিলিত মাড়বার আর মেবার আজ প্রাণ তুচ্ছ করে' এ সমরে নামছে। এই মাত্র আশা। দিগন্তব্যাপি-ঘনীভূত-মেঘসজ্জ্ব—এইমাত্র জ্যোতির ক্ষীণ রেখা।—যদি একবার এই সঙ্গে মারাঠা শক্তির সাহায্য পেতাম!

এই বিচ্ছিন্ন হিন্দুশক্তিকে যদি একবার একত্রিত ক'রতে পারতাম।—কি অদ্ভুত জাতি। ত্রিশ বৎসরে একটা জাতির সৃষ্টি হ'য়ে গেল!

এই সময়ে সেখানে কাশিম প্রবেশ করিল।

দুর্গাদাস। কি কাশিম! রাজকুমার কোথায়?

কাশিম। এতক্ষণ মোর সাথে খেলা কর্ছিল। এই ঘুমায়ে প'ল।  
তাকে আঘির কাছে রাইখে আলাম। মুই নাবোনা খাবোনা?

দুর্গাদাস। হাঁ। যাও, স্নানাদি করোগে যাও—বেলা হ'য়েছে।

কাশিম। আর—তুমি—আপনি নাবানা, খাবানা?

দুর্গাদাস। না, আমার শরীরটা আজ ভালো নেই।

কাশিম। ঐ ত আপনার দোষ। নইলে ত আপনি নোক খারাপ  
নও। ঐ ত দোষ।

দুর্গাদাস। হাঁ, ঐ আমার দোষ।

কাশিম। মোর ইস্তিরিরও ঐরকম ছেল। আজ কাসি, কা'ল জর  
পরদিন শূলবেদনা। মোব ওরকম নয়। জরে পলাম ত পলাম। নৈলে ত  
খাসা আছি। খাছি দাছি—কোন ঞাঠাই নেই।

দুর্গাদাস। তোমার জ্বর কিসে মৃত্যু হয়, কাশিম?

কাশিম। আরে! কে জানে। এক দিন ঘুম থেকে উঠে দেখি  
মরে' রয়েছে। হাকিমে বল্ল যে বুকের ব্যামো।

দুর্গাদাস। আর তোমার ছেলে?

কাশিম। মোর পুতির কতা কৈবান না, হজুর! টুকটুকে ছাওয়াল!  
হেঁটে যাতো, যেন আদারির মদে দিয়ে একটা পিরদিম চলি' যাচ্ছে।  
কতা কৈত, যেন বাঁশী বাজতো। হাসতো, যেন নদীর কিনারায় ছাপিয়ে  
টেউ উঠতো। ঠিক এই মোদের রাজপুত্রুরের মত। তবে রংএর  
এত জেলা ছেল না। আহা। মুই একদিন কাম করে' বাড়ী ফিরে এসে  
ছাখি—বাছা মোর শুয়ে পড়ে' রয়েছে। বাছার রং একেবারে

কালীবরণ। পুছ কল্লাম কি হয়েছে? জবাব নেই।—চাটীকে ডাকলাম,  
চাটী কাঁদতি লাগল। হাকিম ডাকলাম, হাকিম মাতা নেড়ে চলে গেল।

দুর্গাদাস। কি হয়েছিল?

কাশিম। আরে সেইটেই ত মুই কইতে নাৰ্লাম। তার পরে ঘাশে  
একরকুম জ্বর এলো; তার নাম কালাজ্বর। বড়াধবড় মানুষ মর্তি  
নাগলো। ভাগ্যির দোষে মুই মলাম না।

এই বলিয়া কাশিম চলে মুছিল।

দুর্গাদাস। সংসারের এই নিয়ম, কাশিম! তুমি কি করবে? যাও  
—এখন স্নান করগে।

কাশিম। এই যাউ।

বলিয়া কাশিম চলিয়া গেল

দুর্গাদাস। এই কাশিমের সঙ্গে দু'দণ্ড কথা কইলে মন পবিত্র হয়,  
সরলপথে চলা সহজ হয়, ঈশ্বরে ভক্তি বাড়ে।

### তৃতীয় দৃশ্য

স্থান—জয়সিংহের স্ত্রী কমলার শয়ন কক্ষের প্রাঙ্গণ। কাল—রাত্রি। কমলা দেওয়ালে  
হেলিয়া উপবিষ্টা। তাঁহার মুখে জ্যোৎস্নালোক আসিয়া পড়িয়াছিল; অদূরে কমলার মুখে  
নিবন্ধ দৃষ্টি, করতলশুভ্রগণ্ড, বামপার্শ্বোপরি অর্ধশয়ান জয়সিংহ।

জয়সিংহ। কি সুন্দর রাত্রি, কমলা।

কমলা। অতি সুন্দর, অতি সুন্দর, অতি সুন্দর—নাও, তিনসত্যা  
করলাম।

জয়সিংহ। প্রিয়ে!

কমলা। নাথ! প্রাণেশ্বর!

জয়সিংহ । না, আমার কিছু বল্‌ব্যা নাই ! তুমি অমনভাবে বসে' থাকো, আমি তোমার সৌন্দর্য্য পান করি ।

কমলা । দেখো যেন একচুমুকে শেষ কবে দিও না ; আমার জন্তুও একটু রেখো ।

জয়সিংহ । কমলা ! সৌন্দর্য্য কি সুরা ! নইলে দেখতে দেখতে এ মাদকতা আসে কোথা থেকে ? অঙ্গ শিথিল হয়ে আসে কেন ? চক্ষু মুদে আসে কেন ?

কমলা । তোমার ঐ রকম হয় বুঝি !—আমাব ত ঠিক বিপরীত । তোমাকে দেখলেই আমার নেশা ছুটে যায় ।

জয়সিংহ । তবে তুমি আমায় ভালোবাসো না ।

কমলা । ( কটাঙ্ক কবিয়া ) বাসি না ?—আচ্ছা বেশ—বাসি না ।

জয়সিংহ । বাসো বোধ হয় । কিন্তু আমি তোমায় যেমন বাসি ? দেহেব প্রত্যেক লোমকূপ দিবে, হৃদয়ের সমস্ত শোণিত দিবে, প্রাণের সমস্ত আবেশ দিবে, ইহকাল দিবে, পরকাল দিবে—সেই রকম ভালোবাসো ?

কমলা । হাঁ, বাসি ! তবে মতগুলো সংস্কৃত কথা দিবে ভালোবাসি না ।

জয়সিংহ । না, কমলা ! ততখানি প্রাণ তোমার নেই ।

কমলা । তা না থাকুক । কিন্তু তোমাকে নাকে দড়ি দিবে ঘোরাচ্ছি ত !

জয়সিংহ । তা' ঘোরাচ্ছ । তোমাকে বিয়ে কবে' অবধি, প্রিয়ে, আমি সংসারটাকে একটা যেন নতুন ভাবে দেখছি ।

কমলা । কেমন—দেখছো কিনা ?

জয়সিংহ । দেখছি—যেন একটা অশ্রান্ত ঝঞ্ঝার, যেন একটা অনন্ত বিশ্রাস্তি, যেন একটা অসীম মোহ ; অর্দ্ধ সৃষ্টি, অর্দ্ধ আগরণ ।

কমলা । যেমন আপিং খেলে হয়, না ? আমার ঠান্ডির মুখে শুনেছি ।

জয়সিংহ। কি রকম, আমি বোঝাতে পারি না—যেন একটা আকাঙ্ক্ষা, অথচ কিসের বোঝা যায় না। হাসি অধরে বিকশিত হয়, অথচ দেখা যায় না! যেন গানের মূর্ছনা, উপরে উঠে মিলিয়ে যায়। কি রকম একটা অবাধ সুখস্বপ্ন, অগাধ সৌন্দর্য্য, অনন্ত তৃপ্তি।

কমলা। কেমন! প্রথম পক্ষে এ রকম হয়েছিল?—ঐ যে ব'লতে না ব'লতে প্রথম পক্ষ এসে হাজির!

এই সময়ে সরস্বতী সেই স্থানে প্রবেশ করিয়া কহিলেন

সরস্বতী। এখানে প্রভু! আমি তোমাকে খুঁজে বেড়াচ্ছি!

জয়সিংহ। কেন সরস্বতী।

কমলা। তবে তুমি এখন প্রথম পক্ষের সঙ্গে বাক্যালাপ কর—  
আমি আসি। এই বলিয়া উঠিয়া চলিয়া গেলেন

জয়সিংহ। না, যেও না—শোন!

বলিয়া উঠিয়া দাঁড়াইলেন

সরস্বতী। আমি তোমার সুখে বাধা দিতে আসিনি, নাথ—বিশেষ প্রয়োজন কাছে।

জয়সিংহ। কি প্রয়োজন?

সরস্বতী। স্বামীর কি স্ত্রীর প্রতি এই উচিত প্রশ্ন নাথ? যাক সে কথা। এখন তোমার আদর কাড়াবার জন্ত আমি আসিনি—যদিও তার উপর কমলারই মত আমারও দাবী আছে।—যাক—যা' গিয়েছে, তা' গিয়েছে।

জয়সিংহ। কি প্রয়োজন।

সরস্বতী। বড় ব্যস্ত হয়েছো? তবে শোন। মোগল মেবার আক্রমণ করে'ছে, শুনেছো?

জয়সিংহ। না।

সরস্বতী। তোমার পিতা তবে তোমাকে সে সংবাদ দেওয়া দরকার বিবেচনা করেন নি।

জয়সিংহ । বুদ্ধির কাজ ক'রেছেন ।

সরস্বতী । তিনি এই বুদ্ধে তাঁর জ্যেষ্ঠ পুত্রকে যোধপুর থেকে ডেকে পাঠিয়েছেন ।

জয়সিংহ । তার পর ?

সরস্বতী । শুনে লজ্জা হোল না ? তুমি ক্ষত্রিয়, রাজপুত্র, মেবারের ভাবী রাণা ! রাণা তোমাকে মেবার আক্রমণের সংবাদও দিলেন না । আর জ্যেষ্ঠ পুত্রকে সুদূর যোধপুর থেকে ডেকে পাঠিয়েছেন । এতে কি প্রমাণ হয়, প্রভু ?

জয়সিংহ । কি প্রমাণ হয় ?

সরস্বতী । এতে এই প্রমাণ হয়, রাণা তোমাকে কাপুরুষ মনে করেন । যোধপুর থেকে দুর্গাদাস, রূপনগর থেকে বিক্রম সোলাঙ্কি, রাঠোর বীর গোপীনাথ সকলে মেবারের সাহায্যে এসেছেন । তাঁরা এখন রাণার মন্ত্রণাকক্ষে । আর তুমি মেবারের ভাবী রাণা—তুমি বিলাসকুঞ্জ বসে' প্রেমের স্বপ্ন দেখছো ! শুনে লজ্জা হ'চ্ছে না ? শোণিত উষ্ণ হ'চ্ছে না ? নিজের প্রতি ধিক্কার দিতে ইচ্ছা হ'চ্ছে না ? কি ! চুপ করে রইলে যে ?

জয়সিংহ । সব বুঝতে পারছি । কিন্তু সরস্বতি ! কে যেন আমার সমস্ত উত্তম ভেঙে দিবেছে ; আমাকে নারীরও অধম ক'রেছে ।

সরস্বতী । তা' যদি বুঝে থাকো, তবে এখনো আশা আছে নাথ ! কমলাকে ভালোবাসো । সেও তোমার অনুরূপ নয় । কিন্তু যখন বিজাতি সৈন্য এসে স্বদেশ ছেয়েছে, যখন শত্রু দ্বারদেশে, যখন কঠোর কর্তব্য সম্মুখে, তখন নারীর অধরসুধা পান করা ক্ষত্রিয়ের কাজ নয় !

জয়সিংহ । সত্য কথা । সরস্বতি ! তুমি চিরদিন সত্য, উচিত, সঙ্গত কথা বল—কিন্তু শুভে চাই না । কর্তব্য-পথ বুঝি, কিন্তু সে পথে চ'লতে পারি না ।

সরস্বতী । যদি কর্তব্য পথ বুঝে থাকো নাথ, তবে ওঠো ! একবার

প্রাণপণ উত্তমে এই বিলাস—পুরাতন ছিন্নবস্ত্রখণ্ডসম প্রাণ থেকে ঝেড়ে ফেলো দেখি নাথ! দেখবে কর্তব্য সহজ হবে। একবার কর্তব্যকে আঁমাব বলে ডাকো দেখি, তাব পব সে তোমায হাত বাড়িয়ে টেনে নেবে, তোমাকে বাছ দ্বিয়ে ঘেরে বক্ষা ক'র্বে! কর্তব্যকে যত কঠোর ভাবছ, সে তত কঠিন নয়! একবার সবলে, উত্তমভাবে, উঠে দাঁড়াও দেখি, নাথ!

জয়সিংহ। তুমি ঠিক বলেছো, সরস্বতী! উত্তম! দেখি একবার চেষ্টা কবে'।—কি ক'র্বে বল, সরস্বতী!

সরস্বতী। এই ত আমার স্বামীর উপযুক্ত কথা। শোন তবে, নাথ! এসো।—বীরবেশ পর। তার পরে যাও তোমার পিতার মন্ত্রণা-কক্ষে। সেখানে গিয়ে তোমাব পিতাকে বল, “আমাকে এ যুদ্ধে কেউ ডাকো নাই, আমি স্বয়ং এসেছি।” তোমার পিতা সগর্বে স্নেহে তোমাকে বীরপুত্র বলে' বক্ষ্যে ধর্কেন, সমস্ত মেবাব সাহস্কারে বলবে—এই ত আমাদের ভাবী রাণা; সমস্ত রাজস্থান মাথা উঁচু ক'বে চেয়ে সে দৃশ্য দেখবে। সে কি গৌববময় মুহূর্ত্ত!—নাথ! ধিক্কৃত হ'য়ে চিরজীবন ধাবণ কবার চেয়ে পূজ্য হয়ে একদিনও বাঁচা বড় সুখের।

জয়সিংহ। সরস্বতী! আমি এই মুহূর্ত্তেই যাচ্ছি।

সরস্বতী। হাঁ, এই মুহূর্ত্তে চল। আমি স্বহস্তে তোমায বীরবেশ পরিয়ে দিই! চল।

জয়সিংহ সে স্থান হইতে প্রস্থান করিলেন

সরস্বতী। যাও নাথ, এই যুদ্ধে। আমার গাঢ় স্নেহ তোমাকে অভেদ্য বর্শের মত ঘিরে থাকবে। শত্রুর তরবারি তোমাঙ্ক স্পর্শ ক'র্বে পার্কে না।

সরস্বতী এই বলিয়া জয়সিংহের পশ্চাদগামিনী হইলেন



## চতুর্থ দৃশ্য

স্থান—উদয়পুর। রাণা রাজসিংহের মন্ত্রণা-কক্ষ। কাল—মধ্যরাত্র। রাণা রাজসিংহ, মহারাণী মহামায়া, দুর্গাদাস ও অশ্বাশ্ব রাজপুত্র সামন্তগণ সমাসীন

বিক্রম সোলাঙ্কি। আমরা সম্মুখ যুদ্ধে মোগলসৈন্য আক্রমণ করব।

রাজসিংহ। সেটা উচিত নয়। যুদ্ধ ক্ষেত্রে অসংখ্য মোগলসৈন্যের সম্মুখে দাঁড়ানো যুক্তি সঙ্গত নয়।

গোপীনাথ। আমি বলি—অল্পসংখ্যক সৈন্যেব অনেকগুলি দল বাঁধা যাক। তা'রা মোগলসৈন্যের গতি পথ দুর্লভ করুক।

রাজসিংহ। তুমি কি উপদেশ দাও, গরীবদাস? তুমি এ পার্বত্য প্রদেশের প্রত্যেক পথ, উপত্যকা, অরণ্যের সঙ্গে পরিচিত আছো। তোমার মত কি?

গরীব। আমি বলি—মোগলেরা এ পার্বত্য পথে আসুক। আমরা কোন বাধা দেবো না। কেবল কোশলে তাদের সর্বাপেক্ষা দুর্লভ পথে টেনে আনবো। সেখানে তাদের সৈন্যসম্মিলন করা কঠিন হবে। তা'রা পর্বতপথে বিশৃঙ্খল হ'য়ে প'ড়লে তাদের আক্রমণ করব।

দুর্গাদাস। এ অতি উত্তম প্রস্তাব, বাণা! মোগলসাম্রাজ্যের সঙ্গে যুদ্ধ আজ নয়—অনেক বৎসর ধরে এখন যুদ্ধ কর্তে হবে; যতদূর সাধ্য আমাদের দেখতে হ'বে যাতে শক্তির অপব্যয় না হয়।

গোপীনাথ। সে কথা মন্দ নয়।

বিক্রম। খুব ভালো! তা'রা সেখানে দল বাঁধবার সুযোগ পাবে না।

রাজসিংহ। সকলেরই কি এই মত? তুমি কি বল, মহামায়া?

রাণী। সকলের মতেই আমার মত। কিন্তু সম্রাট স্বয়ং যুদ্ধে আসেন নি?

রাজসিংহ । না, তিনি আর আজীম দোবাবীতে ! সম্রাটের পুত্র  
আকবর উদয়পুরে আসছেন ;—এই ত ঠিক সংবাদ, দুর্গাদাস ?

দুর্গাদাস । হাঁ মহারাণা । শত্রুসৈন্য তিন ভাগে অবস্থিত—এক,  
আকবরের অধীনে উদয়পুর পথে ; এক, দিল্লীর খাঁব অধীনে দাস্তুবী পথে ;  
আর এক সম্রাটের অধীনে দোবাবীতে ।

বাণী । আমি বলি—সসৈন্যে সম্রাটকে আক্রমণ করি ।

রাজসিংহ । না তা' হ'লে আকবরের অগণিত সৈন্য পশ্চাতে রেখে  
আসতে হবে । সেটা উচিত নয় । কি বল, দুর্গাদাস ?

দুর্গাদাস । না, তা' উচিত না ।

রাজসিংহ । তবে গরীবদাসের প্রস্তাবে সকলেই সম্মত ?

সকলে । হাঁ, সকলেই সম্মত ।

রাজসিংহ । উত্তম ! এখন এই মিলিত সৈন্যের অধিনায়ক কাকে করি ?  
গরীব । কেন, দুর্গাদাসকে ।

রাজসিংহ । তাই সকলের মত ?

বাণী ও দুর্গাদাস ব্যতীত সকলেই কহিলেন—“নিশ্চয়ই ।”

রাজসিংহ । তবে দুর্গাদাস ! তোমাকে এই মিলিত রাজপুতসৈন্যের  
সেনাপতিরূপে বরণ করলাম ।

দুর্গাদাস । আমি সে সম্মান গ্রহণ করলাম, রাণা । এই যে কুমার  
ভীমসিংহ ।

ভীমসিংহ আসিয়া রাণার চরণ বন্দনা করিলেন ও অগ্ন্যান্ত সকলকে অভিষেক করিলেন

রাজসিংহ । এসো, বৎস—তোমাকে বৃষ্টি 'এসো' বলবারও আমার  
অধিকার নাই ।

ভীম । কেন, পিতা ?

রাজসিংহ । আমি তোমাকে নির্বাসিত ক'রেছি ।

ভীম । না, পিতা, আমি স্বেচ্ছায় নিৰ্বাসিত হ'য়ে'ছ ।

রাজসিংহ । আমাব প্রতি তোমার ক্রোধ নাই, ভীমসিং ?

ভীম । আপনাব প্রতি ক্রোধ । আপনাব ইচ্ছা পূর্ণ ক'র্তে আমি প্রাণ দিতে পারি । ভগবান্ শ্রীবামচন্দ্র পিতৃসত্য রক্ষা কর্কার জন্ত বনবাসা হয়েছিলেন । আমি ক্ষুদ্র নব । কিন্তু আমি সেই ক্ষত্রিয় বলে আপনাকে পরিচয় দিই ।

বাণী । তোমাকে আজ তোমাব পিতা ডেকেছেন—তোমার জন্মভূমি বক্ষার !

ভীম । সে আমার গোববের কথা মহারাণী ।

বিক্রম । তোমার জন্মভূমিকে ভোলোনি, ভীমসিং ?

ভীম । জন্মভূমিকে ভুলবো ?—বিক্রমসিং । এ কথ বৎসর, আহাবে বিহাবে, জাগ্রতে, নিদ্রাধ, এই কঠিন পরীতসঙ্কুল ধুমধুমব মেবারভূমি সর্বদাই আমাব চক্ষে ভাস্তো । আজ সেখানে ফিবে আস্তে, পথে সেই চিরপবিচিত অবন্যপথ, উপত্যকা, শৈলমালা দেখতে পেলাম, আব আমার চক্ষু জলে ভরে এলো ; আবেগে কণ্ঠকক হয়ে এলো ।

বাণী । ( স্বগত ) রাণা রাজসিংহের অবিকল প্রতিচ্ছবি !

সশস্ত্র জয়সিংহ প্রবেশ করিলেন

রাজসিংহ । কে ? জয়সিংহ !

জয় । হাঁ, পিতা, আমি ! পিতা আমাব এ বুদ্ধে ডাকেন নি ।—আমি নিজে এসেছি ।

রাণা রাজসিংহ অতি বিন্মিতভাবে ক্ষণেক জয়সিংহের পানে চাহিয়া রহিলেন

পরে কহিলেন

রাজসিংহ । সত্যকথা, জয়সিংহ ? স্থিরচিত্তে এ কথা ব'লুছো ?

জয় । হাঁ পিতা ! মেবার বিপন্ন ; আমি মেবারের ভাবী রাণা ; এ সময় আমার নিশ্চিন্ত ভাবে থাকা শোভা পায় না ।

ভীম। দীর্ঘজীবী হও, ভাই। এই ত তোমার উপযুক্ত কথা !  
রাজসিংহ। ভীমসিংহকে প্রণাম কব, জয়সিং।

জয়সিংহ ভীমসিংহকে প্রণাম করিলেন। ভীমসিংহ তাঁহাকে আলিঙ্গন করিলেন

দুর্গাদাস ! আমাব এই পুত্রদ্বয়কে তোমাব অধীনে দিলাম।

দুর্গাদাস। এ আমাব মহৎ সম্মান, বাণী।

রাজসিংহ। তবে আজ সভাভঙ্গ হ'ল। তোমরা সকলে যাও।

—যাও, রাণী, অন্তঃপুরে যাও।

রাজসিংহ ও তাঁহার পুত্রদ্বয় ভিন্ন আর সকলে প্রস্থান করিলেন। তাঁহারা

সকলে চলিয়া গেলে রাজসিংহ মুহূর্ত্তে ডাকিলেন

ভীম !

ভীম। পিতা।

রাজসিংহ নীরবে রহিলেন

বুঝেছি, পিতা ! আমি সে প্রতিজ্ঞা ভুলি নাই। আমি এই মুহূর্ত্তেই মেবার  
পরিত্যাগ করি। তবে আসি, পিতা ! আমি ভাই !

ভীম যথাক্রমে রাজসিংহকে ও জয়সিংহকে প্রণাম ও আশীর্বাদ করিয়া দ্রুত প্রস্থান করিলেন

রাজসিংহ ক্ষণেক নীরব রহিলেন—পরে জয়সিংহকে কহিলেন

রাজসিংহ। জয়সিংহ—পারো যদি তোমার এই ভাইয়ের উপযুক্ত হও।—  
যাও—বৎস, শয়ন করগে।

জয়সিংহ চলিয়া গেলে রাজসিংহ কহিলেন

ভীম ! ভীম ! আব আমাষ তুমি ভালোবাসো না। জন্মভূমির কথা  
ব'লতে ব'লতে তোমাব কণ্ঠরুদ্ধ হয়ে এলো। আর আমার প্রাপ্য এক শুষ্ক  
প্রণাম—নিজ দোষে কি পুত্রই হারিয়েছি !

বলিয়া কক্ষ হইতে নিজক্রান্ত হইলেন

## পঞ্চম দৃশ্য

স্থান—চিতোরের সন্নিহিত কানন ; মোগল শিবির। কাল—অপরাহ্ন। সম্রাট ঔরঞ্জীব উত্তেজিতভাবে দণ্ডায়মান। সম্মুখে দিলীর খাঁ ও সম্রাটপুত্র আজীম। পার্শ্বে শ্যামসিংহ।

ঔরং। কি, কি দিলীব খাঁ ! তুমিও যুদ্ধে হেরে এসেছো ?

দিলীর। হাঁ, জনাব ! গুরু হেরে আসি নি। সর্বস্ব হারিয়ে এসেছি !

ঔরং। আর কুমার আকবর ?

দিলীব। তাঁর বিষয়ে যা শুনেছি, তা বিশেষ শুভ নয়। তিনি আরাবলি গিরিসঙ্কটে বাণা রাজসিংহের পুত্র জয়সিংহের হস্তে বন্দী !

ঔরং। বন্দী ! আকবর—ভারতের ভাবী সম্রাট বাজপুত্রের হাতে বন্দী ! এবার মোগলের অবমাননার মাত্রা পূর্ণ হোল !

আজী। ( স্বগত ) কি ? ভারতের ভাবী সম্রাট আকবর !

দিলীর। এখন জাঁহাপনার নিজের সংবাদ কি ? জাঁহাপনা দোবারী ছেড়ে যে চিতোরের দুর্গমূলে আশ্রয় নিয়েছেন ?

ঔরং। দিলীর খাঁ ! আমি বাঠোর সেনাপতি দুর্গাদাসের হাতে সম্পূর্ণ পরাজিত হ'য়েছি। আমার খাচুভাণ্ডার, উট, হস্তী, প্রাণাধিকা বেগমকেও এই যুদ্ধে হারিয়েছি।

দিলীর। তা'হলে বোঝা হাক্ক হযে গিয়েছে, বলুন জনাব ! এখন দিল্লী ফিরে যাওয়া অনেকটা সোজা হবে !

ঔরং। দিল্লী ফিরে যাব এই অপমান নিয়ে ! কি বলেন, মহারাজ !

শ্যামসিংহ। অসম্ভব !

দিলীর। যেমন অপমান নিয়ে যাচ্ছেন, তেমনি অনেক জিনিস

রেখেও ত যাচ্ছেন—উট, হস্তী, গো, মহিষ, বেগম। ফিরে যাওয়া এখন খুব সহজ।

ঔরং। এ দুঃখের সময় তোমার পরিহাস ভালো লাগে না, দিল্লীর খাঁ!

শ্যাম। হাঁ সেনাপতি, পরিহাসের সময় অসময় আছে।

দিল্লীর। সম্রাট! পরিহাসটা আমার দুঃখেই বড় ভাল লাগে। দুঃখেই সেটা আমার মুখে বেরোয় ভালো! করুণ হাশ্ব বলে' একটা জিনিস আছে জানেন, জনাব?

ঔরং। মোগলের এরূপ অপমান কখন হয়নি—যেমন—

দিল্লীর। যেমন আপনার হাতে হোল। তা' মানি, সম্রাট।

ঔরং। আমার হাতে না তোমার হাতে? দুর্ভাগ্যক্রমে আজ দিল্লীর খাঁ মোগলের সেনাপতি। আজ যদি যশোবন্তসিংহ জীবিত থাকতো—

শ্যাম। যদি রাজা যশোবন্তসিংহ জীবিত থাকতো, জাঁহাপনা!

দিল্লীর। সম্রাট ইচ্ছা করলে তিনি আজ জীবিত থাকতে পারতেন।

ঔরং। কি? তুমি কি বিবেচনা কর যে—

দিল্লীর। বিবেচনা কিছু করি না, সম্রাট! জানি। জানি যে, সম্রাট তাঁকে আফগানিস্থানে হত্যা করেছেন। এই হত্যার অবিচার আর নিষ্ঠুরতা তেমন করে কখন অনুভব করি নাই—যেমন সেই দিন করে'ছিলাম, যে দিন মোগল-সৈন্যবাহের সম্মুখে সেই নির্ভীক, ঈশ্বরের উপর অভিমানিনী বিদ্যাজ্জালামবী বিধবা মহারানীকে দেখি—কন্টার সঙ্গে নিজের প্রাণ দিতে প্রস্তুত। সেই দিনই বুঝেছিলাম, জনাব, যে, এই যশোবন্তসিংহের হত্যা মোগল-সাম্রাজ্যের সর্বনাশ করবে। সম্রাট যদি ইচ্ছে করতেন, ত এই সাহসী বীর সম্রাটের শত্রু না হয়ে মিত্র হোত; আর এই রাজপুত জাতি। মহারাজ শ্যামসিংহের

মত আত্মাভিমানবর্জিত স্বদেশদ্রোহী কাপুরুষ রাজপুত্র নয়। দুর্গাদাসের  
শ্রায় প্রকৃত, উদার, সরল, বীর রাজপুত্র বারা তারা মোগল রাজ্যের  
ঝঙ্কারকপ না হ'য়ে রাজ্যের সুশাস্ত্ররূপ হোত।

ঔরং। কি রূপে দিল্লীর খাঁ ?

দিল্লীর। কি রূপে ? ভারতের অতীত ইতিহাসের পৃষ্ঠা ওন্টান।  
দেখতে পাবেন কি রূপ ? মানসিংহ, ভগবানদাস, চৌডরমল, বীরবল  
— এঁরা না থাকলে আজ মোগল-সাম্রাজ্যের অস্তিত্বও থাকত না ; আর  
ঔরংজীবও তাঁর সিংহাসনে বসতে পেতেন না। যে ভিত্তি আকবর  
দৃঢ় করে' গিয়েছিলেন, আপনি আজ আপনার আত্মঘাতী নীতিতে  
সে ভিত্তি জীর্ণ করে' তুলছেন।

ঔরং। আমি !

দিল্লীর। হাঁ, আপনি। জিজিয়াকর স্থাপিত না করলে এদিকে  
রাজপুত্র এক হোত না, ওদিকে মারাঠা ছুঁকার দিয়ে উঠতো না।  
রাণা রাজসিংহ আপনারই হিতার্থে এই কথা লিখেছিলেন। আপনি  
তাঁকে তুচ্ছ করে' নিজের এই সর্বনাশ টেনে আনছেন। রাজাধিরাজ !  
জানবেন যে, ভয় দেখিয়ে এই প্রকাণ্ড জাতকে কেউ শাসন ক'র্ত্তে পারবে  
না। তা'রা ইচ্ছা করে' যদি অধীন থাকে ত থাকবে ; আর যদি সমস্ত  
জাতি বিরক্ত হয়, ত তাদের শুদ্ধ মিলিত উষ্ণনিশ্বাসে মোগল-সাম্রাজ্য  
উড়ে যাবে।

ঔরং। আমি এ বিষয় চিন্তা ক'রব, দিল্লীর খাঁ ! আমার মাথা  
ধবে'ছে ! আমি এখন ভাবতে পারছি না।

এই বলিয়া সম্রাট চলিয়া গেলেন

দিল্লীর। ভগবান্ তোমার মতি ফেরান, ঔরংজীব।

[আজীম। ( স্বগত ) আকবর ভারতের ভাবী সম্রাট।—এ হ'বে না !  
এ হ'তে পারে না।

দিলীর। ( স্বগত ) কুমার আজীমের চেহারাটা বড় সুবিধার বোধ হচ্ছে না! ( প্রকাশে ) কি ভাবছেন, সাহাজাদা!

আজীম। সে কথা তোমার সঙ্গে বিচার্য নয়, সেনাপতি!

প্রস্থান

দিলীর। হাঁ! একটা বিশেষ কিছু হ'য়েছে। এ শুধু দোবারীর পরাজয় নয়।—কুমারের মনে একটা বেশ খটকা লেগেছে! ]

শ্যামসিংহ। তুমি হেরে এলে, দিলীর খাঁ?

দিলীর সহসা শ্যামসিংহের প্রতি ফিরিয়া কহিলেন, “হ্যাঁ এলাম বৈকি চাঁদ! হ্যাঁ, চাঁদ, হেরে' এলাম।—আপনার মনে বড় আক্ষেপ হ'য়েছে, মহারাজ! না? যে, রাজপুতজাত শক্তিবলে চেগে উঠবে? খোসামোদের জোরে নয়—গায়ের জোরে উঠবে। এটা আপনার সহিছে না।—না?”

শ্যাম। না, আমি বলছিলাম যে—

দিলীর। দরকার কি? ভগবান্! তোমার অদ্ভুত সৃষ্টি! যে জাতে দুর্গাদাস জন্মায়, সেই জাতেই শ্যামসিং জন্মায়। এক জাত? আচ্ছা সিংহ মহাশয়! আপনার নাম শ্যামসিংহ না হ'য়ে শ্যামসুজজোহা হ'লে ঠিক হোত না।

নেপথ্যে কোলাহল শ্রুত হইল

শ্যাম। ও কি শব্দ? জযোল্লাসধ্বনি! দুর্গাদাস এখানে এসে আমাদের আক্রমণ করেনি ত?

দিলীর। পালাও, মহারাজ! পৈতৃক প্রাণটা রাখো।

শ্যাম। না, ওরা “আল্লা আল্লা হো” বলে' চেঁচাচ্ছে। ওরা আমাদের সৈন্য।

দিলীর। আপনাদের সৈন্যই বটে! যদি আমাদের সৈন্য হোত



ত—“হর হর ব্যোম” বলে চেঁচাত ।—না ? আচ্ছা মহারাজ ! আপনাকে খোসামুদে বিঘাটা কে শিখিয়েছিল ?

শ্যাম । কেন ?

দিলীর । সে একটা ভারি ওস্তাদ মানুষ হবে । কি কর্তব্যই শিখিয়েছিল !—বাঃ !

সাহাজাদা আকবর প্রবেশ করিলেন

শ্যাম । এই যে সাহাজাদা আকবর !

দিলীর । সত্যই ত ! সাহাজাদাই ত বটে । বন্দিগি, কুমার—  
শুন্‌ছিলাম যে যুবরাজ শত্রুহস্তে বন্দী—সে সংবাদ তবে মিথ্যা ।

শ্যাম । আমি জানি—ও মিথ্যা ।

দিলীর । হাঁ—নিশ্চয় মিথ্যা ; মহারাজ যখন ব'লেছেন মিথ্যা, তখন নিশ্চয়ই মিথ্যা—কেমন মহারাজ ! হ'চ্ছে কি না ?

শ্যাম । সাহাজাদা নিশ্চয় শত্রুজয় কবে' ফিরে এসেছেন ?

দিলীর । হাঁ, আমি ত তাই ভাবছিলাম ।—যুবরাজ রাজাকে কি বন্দী করে' এনেছেন ?—নৈলে এত জয়োল্লাস-ধ্বনি কেন ?

আকবর । না, দিলীর ! আমিই রাণাব হাতে বন্দী হ'য়েছিলাম ।

শ্যাম । কৌশলে মুক্ত হয়ে এসেছেন ?

আকবর । না মহারাজ !—রাণার বদান্ততায় । দিলীর খাঁ ! রাজ-  
পুত্র জাতটা যুদ্ধ ক'র্তে জানে ।

দিলীর । বলেন কি, যুবরাজ ?

আকবর । শুদ্ধ যুদ্ধ ক'র্তে জানে, তা' নয় । ক্ষমা ক'র্তে জানে ।

দিলীর । অদ্ভুত আবিষ্কার !

শ্যাম । এখন, মুক্ত হ'লেন কিরূপে ?

আকবর । দিলীর ! শোন—

দিলীর । মহারাজকে বলুন—উনি বড় ব্যস্ত হয়েছেন ।

আকবর । শুনুন, মহারাজ ! আমি যখন আরাবলির গিরিসঙ্কটে পিঞ্জরাবদ্ধ, সন্মৈত্রে অনাহারে মৃতপ্রায় ; তখন রাণা তাঁর পুত্র জয়সিংহকে পাঠিয়ে দিলেন—আমাকে বধ ক'র্ত্তে নয় ; বন্দী ক'র্ত্তে নয় ; আমাকে খাণ্ড দিতে, আমাকে মুক্ত ক'র্ত্তে ।—আর কি চাও ?

দিলীর । রাণা আরও একটা কাজ ক'র্ত্তেন, তাঁর এক কণ্ঠার সঙ্গে সাহজাদার বিয়ে দিতে পার্ত্তেন ।—যান, এখন ভিতরে যান । ঘরের ছেলে ঘরে ফিরে এসেছেন, সেই যথেষ্ট ।—চলুন, মহারাজ !—না, মহারাজের এখানে আজ নিমন্ত্রণ আছে ?

সকলে বিভিন্নদিকে নিজক্রান্ত হইলেন

### ষষ্ঠ দৃশ্য

স্থান—রাজপুতশিবির । কাল—অপরাহ্ন । রাণা রাজসিংহ ও যশোবস্তুর রাণী উপবিষ্ট । সম্মুখে মোগলপতাকা হস্তে দুর্গাদাস ও রাজপুত স্যামন্তগণ দণ্ডায়মান

রাজসিংহ । ধন্য, দুর্গাদাস ! তুমি মোগলকে মেবার হ'তে বিতাড়িত করে'ছো ।

রাণী । ধন্য, দুর্গাদাস ! তুমি বেগমকে বন্দী করে'ছো ।—আজ প্রতিশোধ নেবো !

রাজসিংহ । কি ? দুর্গাদাস ! তুমি সম্রাটের বেগমকে বন্দী করে'ছো ? কোন্ বেগম ?

দুর্গাদাস । কাশ্মীরী বেগম !

রাজসিংহ । তাঁকে বন্দী করে'ছো ? তৎক্ষণাৎ তাঁকে মুক্ত করে' দাওনি—

ছুর্গাদাস । রাণা ! আমি সেনাপতি মাত্র । যুদ্ধে শত্রুপক্ষকে বন্দী কর্কার অধিকার আমার । তা'কে মুক্ত কর্কার অধিকার রাজার ।

রাজসিংহ । যাও ছুর্গাদাস ! বেগমসাহেবাকে এক্ষণেই মুক্ত করে' সসম্মানে সম্রাটের কাছে পাঠিয়ে দাও ।

রাণী । কেন দেব, রাণা ?

রাজসিংহ । নারীর সঙ্গে আমাদের বিবাদ নাই ।

রাণী । নাই বটে ! তবে আমি এসে আপনার আশ্রয় গ্রহণ করেছি কেন, মহারাণা ? আমাকে বন্দী কর্কার জন্ত কি এই প্রকাণ্ড যুদ্ধ নয় ? আমি যদি এ যুদ্ধে সম্রাজ্ঞার বন্দী হ'তাম, সম্রাজ্ঞী কি ক'র্তেন ?

রাজসিংহ । মোগলের নীতি আমরা অচু করণ ক'রতে বসিনি ।

রাণী । না, মহারাণা ! আমি এই বেগমকে ছেড়ে দেব না । আমি প্রতিশোধ নেবো !

রাজসিংহ । প্রতিশোধ ? কিসের প্রতিশোধ, মহামায়া ?

রাণী । কিসের ? কিসের নয় তাই জিজ্ঞাসা করুন ! এই কাশ্মীরী বেগমই আমার পতিপুত্রকে হত্যা করিয়েছে ! এই কাশ্মীরী বেগমই আমাকে বন্য পশুর মত স্থান হ'তে স্থানান্তরে তাড়িয়ে নিয়ে বেড়াচ্ছে— এর শোধ নেবো, রাণা ! আমি তাকে মুঠোর মধ্যে পেয়ে ছাড়বো না । প্রতিশোধ নেবো !

রাজসিংহ । কি প্রতিশোধ নেবে ?

রাণী । তা এখনো ঠিক করে উঠতে পারি নি, রাণা ! এ বিষয়ে চিন্তা কর্কার । ভেবে বার কর্কার । তিলে তিলে তাকে পোড়ালে যথেষ্ট হবে না । সর্কাঙ্গে তার সূচীভেদ ক'রলে যথেষ্ট হবে না । ভেবে বার কর্কার । নূতন যন্ত্রণার যন্ত্র আবিষ্কার ক'রকার । নারীর উচিত শাস্তি নারীই বোঝে ।

রাজসিংহ । মহামায়া ! পাপের শাস্তি দেবার তুমি আমি কে ? যিনি দেবার তিনি দেবেন ।

রাণী । ( উঠিয়া ) তিনি—কোথায় তিনি ? তিনি কোথায় ? তিনি হাত গুটিয়ে বসে' আছেন । আকাশের বজ্র চিরদিন পাপীর শিরেই পড়ে না, মহারাজ ! পুণ্যায়ার শিবেও পড়ে । ভূকম্পে এক পাপীর গৃহই ভগ্ন হয় না, নিরীহ বেচাবীর কুঁড়েখানি আগে ভাঙে । প্রবল জলোচ্ছ্বাসে ক্ষুদ্র শম্পই ডোবে, বিরাট মহীকহ তেমনি মাথা উঁচু করে' থাকে । ঈশ্বরের নিয়ম ধর্ম অধর্ম বিচার করে না—যেখানে দুর্বল, জীর্ণ, স্থবির পাষ, আগ গিয়ে তারই টুঁটি চেপে ধবে ।

রাজসিংহ । বাণি । উক্ত হযে ঈশ্বরের উপব বিচার কর্তে বোসো না । জেনো—র্তাব নিয়মে অস্ত্রিমে অধর্মের পতন হবেই ।

বাণী । সে কবে ? আমি ত তা আজ পর্যন্ত দেখলান না, রাণা ! আমি ত আজ পর্যন্ত দেখছি—সাবল্য আজীবন শাঠ্যে চরণে পড়ে' ভিক্ষা মেগেছে, শাঠ্য একবার ফিরেও চায়'নি । সত্য চিরকালটা মিথ্যার দাস্ত্র করেছে, মাথা উঠাতে পারে নি । আমি চিরদিন দেখেছি—শ্রাঘের ক্ষেত্রে উড্ডীন অশ্রাঘের বিজয় নিশান । আমি চিরদিন শুনে এসেছি—ধর্মের ভগ্ন মন্দিরে অজ্ঞাত অধর্মের জযভেরী । পুণ্যেব শ্রামল রাজ্যের উপব দ্বিযে পাপের তৈরব রক্তবন্তাব চেউ বযে যাচ্ছে , শ্রামলতার চিহ্নমাত্র নাই । উৎকোচে, অত্যাচারে, মিথ্যাবাদীতায় পৃথিবী ভবে' গেল ।—তবু বলেন অস্ত্রিমে ধর্মের জয় হবে ! সে কবে—কবে—কবে ?

রাজসিংহ । ক্ষান্ত হও মহারাণি ! তুমি উত্যক্ত হয়েছো । ধৈর্য্য ধর ।

রাণী । ধৈর্য্য, রাণা ? আপনি যদি নারী হতেন, আর আপনার দুরে প্রোষিত ভর্তা বিশ্বাসঘাতকের বিযে প্রাণত্যাগ কর্তো ; আপনার সরল উদার পুত্রব যদি নিষ্ঠুরভাবে হত্যা হোত ; ক্ষুদ্র নিঃসহায় নিরীহ শিশুকে নিযে—আমার মত আপনার যদি প্রতারিত হ'য়ে দেশ হতে দেশান্তরে পরের দুযারে ভিধারী হয়ে বেড়াতে হোত, ত বুঝতেন । ধৈর্য্য ! রাণা—আমি সেই পাপীষসীকে ছাড়'বো না ।

রাজসিংহ । দুর্গাদাস ! আমি জীবিত থাকতে অবলার প্রতি অত্যাচার দেখবো না । যাও তুমি তাঁকে সসম্মানে সম্রাটের কবে সমর্পণ কব ।

রাণী । দুর্গাদাস । তুমি রাণার ভৃত্য নও । আমার কর্মচারী ।

দুর্গাদাস । ক্ষমা কর্বেন, মহারাণি ! এ যুদ্ধে আমরা সকলেই রাণাব ভৃত্য । বেগম আজ মেবারের রাণার বন্দী ; মাড়বারের মহিষীর নয় । মহারাণি ! আত্মবিস্মৃত হবেন না । আপনারই রক্ষার্থে রাণা এই যুদ্ধে অস্ত্র ধরেছেন । রাণার প্রতি ক্রোধ হবেন না । তাঁর আজ্ঞায় অবাধ্য হবেন না ।

রাণী কিয়ৎকাল নীরব রহিলেন পরে কহিলেন, “তুমি সত্য কথা বলেছো দুর্গাদাস ।”—পবে রাণার সম্মুখে নতজানু হইয়া কহিলেন—  
“রাণা ! মার্জনা করুন । বহুণায় উত্থিত হয়ে দুর্কিনীত হয়েছি ; ক্ষমা করুন ! কিন্তু যদি বুঝতে ন রাণা, এই তীব্র বেদনা এই নির্দাকণ জ্বালা, এই গাঢ় অন্তর্দাহ । ক্ষিপ্তপ্রায় হ’বেছি ! ক্ষমা করুন ।”

রাজসিংহ । ক্ষমা করেছি, মহামায়া ! তবে তুমি যে ক্ষমা আমার কাছে চাইলে, সেই ক্ষমা এই সম্রাজ্ঞীর প্রতি দেখাও । তাঁকে তোমার কাছে বিচারার্থে রেখে যাচ্ছি । তাঁকে ক্ষমা করে তোমার মহত্ব দেখাও ! মহামায়া ! নারী স্নেহ, দয়া, ভক্তি, ক্ষমা গুণেই পূজ্যা । তা’তেই তার শক্তি । আর যদি শাস্তি দিতে চাও, মা, মনে কর কি মা যে, তোমার অত্যাচারীকে যদি তুমি হস্তমুখে ক্ষমা কর—সে তার কম শাস্তি ?

রাণী । উত্তম ! সম্রাজ্ঞীকে নিয়ে এসো, দুর্গাদাস ।

দুর্গাদাস প্রস্থান করিলেন

রাজসিংহ । তবে তোমার দয়ার উপর নির্ভর করে’ সম্রাজ্ঞীকে রেখে গেলাম মহামায়া ।

রাণা চলিয়া গেলেন

রাণী । তাই হোক ! আমি তার উপর বিচার ক’র্ব্ব...এই বিচারাসনে বসে’—সেই যথেষ্ট । ভারতের সম্রাজ্ঞী, ঔরঞ্জীবের বেগম, আমার

পতিপুত্রহত্নী শত্রু আজ আমার সম্মুখে বন্দী হ'য়ে দাঁড়াবে; আমি সিংহাসনে বসে' নীচুপানে তার মুখের দিকে চেয়ে, তাকে প্রাণভিক্ষা দেব। তাই বা মন্দ কি ?—ঐ আস্ছে। এখনো মুখে সেই দর্প, চাহনীতে সেই দীপ্তি, পদদাপে সেই গর্ব ! জগদীশ্বর ! পাপকে এমন উজ্জ্বল করে' তৈবী করে'ছিলে !

সম্রাজ্ঞী গুলনেয়ারসহ দুর্গাদাসের পুনঃ প্রবেশ

রাণী। সেলাম, বেগমসাহেবা !

গুলনেয়ার। যশোবন্তসিংহের রাণী ?

রাণী। হাঁ ! চিন্তে পার্ছেন না ? অথচ আমাকে বন্দী করবার জন্তই এই বিরাট আয়োজন ! আপনি আমার পতিপুত্র খেয়েছেন। তাতেও ও রাক্ষসী-উদর ভরে নি। এখন আমায় আর আমার ছোট ছেলেকেও খেতে চান ! এর মধ্যে সব ভুলে গেলেন ? এত ভুল করলে চলবে কেন, বেগমসাহেবা ?

গুলনেয়ার। তুমিই দুর্গাদাস !

দুর্গাদাস। হাঁ জাঁহাপনা !

গুলনেয়ার। আমাকে এখানে এনেছো কেন ?

রাণী। আপনার বিচার হবে।

গুলনেয়ার। আমার বিচার ? কার কাছে ?

রাণী। আমার কাছে। কথাটা একটু রক্ষ ঠেকছে, না ? কি ক'র্কেন বলুন।—চাকা ঘুরে গিয়েছে বেগমসাহেবা ! কি। দুর্গাদাসের পানে অত চাইছেন যে ? ভাব্ছেন এতদূর আস্পর্কী এই কাফেরের যে আপনাকে বন্দী করে ! তাই ভাবছেন—না ? এখন কি শাস্তি চান ?

গুলনেয়ার। আমি তোমার বন্দী ; যা ইচ্ছা হয় কর।

রাণী। ইচ্ছা তাই ক'র্ক ? সে বড় কঠোর হবে, বেগমসাহেবা। আমার যা ইচ্ছা, সে শাস্তি দিলে সহিতে পার্কে না। সে বড় নিদারুণ

শান্তি। নরকের জ্বালা তার কাছে বসন্তবায়ুর মত শীতল, শত  
বৃশ্চিকের দংশনের যন্ত্রণাও তার কাছে শৈলনির্ঝরের মত স্নিগ্ধ! আমার  
যা ইচ্ছা? আমার কি ইচ্ছা জানো বেগমসাহেবা?—যাক—তুমি  
আমাকে বন্দী করলে কি কর্তে, ভারতসম্রাজ্ঞী?

গুলনেয়ার। কি কর্তাম? তোমায় আমার পাদোদক খাওয়াতাম;  
পরে বধ কর্তাম।

রাণী। এখনও তেজ যায় নি! বিষদাঁত ভেঙ্গে গিয়েছে, তবু  
আক্ষালন যায় নি! বেগমসাহেবা! বড় আশায় নিরাশ হ'য়েছো।  
আজ আমি তোমার বন্দী না হয়ে তুমি আমার বন্দী! দেখ, গুলনেয়ার!  
ভারতসম্রাজ্ঞি! তুমি আজ আমার মুষ্টিগত। ইচ্ছা করলে তোমায়  
আমার পাদোদকও খাওয়াতে পারি, বধ কর্তেও পারি! কিন্তু তা কিছুই  
ক'র্ব না। আমি তোমাকে মুক্ত করে' দিলেম! সেনাপতি! এঁকে  
রেখে এসো এঁর স্বামীর কাছে। ( গুলনেয়ারকে ) যাও—দাঁড়িয়ে  
রৈলে যে! আশ্চর্য্য হ'চ্ছে—এই রাজপুত্রের প্রতিশোধ।

# তৃতীয় অঙ্ক

## প্রথম দৃশ্য

স্থান—দিল্লীর প্রাসাদের বহিঃকক্ষের বারান্দা। কাল—প্রভাত। তাহবর খাঁ " আকবর দাঁড়াইয়া গল্প করিতেছিলেন।

তাহবর। তাই ত! তোমাদের তা'লে রাজপুতেরা ঠিক ইঁদুরের কলে ফেলেছিল?

আকবর। অবিকল! আমরা বরাবর সোজা গিয়ে দেখি যে সে দিকে বেরোবার পথ নাই! ফিরে গিয়ে দেখি সে দিকও বন্ধ।

তাহবর। আর পাহাড়ের উপর থেকে রাজপুতেরা মজা দেখুছিল— যে, ঠিক কলের ভিতর ইঁদুরের মত তোমরা একবার এদিক একবার ওদিক করে' বেড়াচ্ছে?

আকবর। আর সে গিরিপথ এমন সঙ্কীর্ণ যে, ১০০ জন মানুষ পাশাপাশি হ'য়ে দাঁড়াতে পারে না। আমাদের সৈন্যেরা কে কোথায় আছে দেখার যো নাই—এমনি সঙ্কীর্ণ!

তাহবর। দেখলে বুঝি—সব পাহাড়ের সঙ্গে জড়িয়ে গিয়েছে?

আকবর। হাঁ, দস্তুর মত! এমনি জড়িয়ে গিয়েছে যে—

তাহবর। বোঝা দুষ্কর যে, কোন্‌গুলো পাহাড় আর কোন্‌গুলো সৈন্য?

আকবর। না! তা' বেশ বোঝা যাচ্ছিল।

তাহবর। যাচ্ছিল না কি? বুদ্ধ তা'লে হ'লো না?



আকবর। যুদ্ধ ক'র কার সঙ্গে ? পাহাড়ের সঙ্গে ? শত্রুর  
সন্ধান পেলাম না।

তাহবর। ঐ আমি বরাবর বলে' আসছি, রাজপুত্র জাতটা যুদ্ধই  
জানে না। একটা প্রথা মেনে চলে না। কেউ কখন শুনেছো যে,  
না খেতে দিয়ে যুদ্ধে জেতা ?

আজীমের প্রবেশ

তাহবর। বন্দিগি, সাহজাদা !

আজীম। (সেদিকে ক্রক্ষেপ না করিয়া) আকবর শুনেছো ?

আকবর। কি, আজীম ?

আজীম। মেবার যুদ্ধে তোমার এই পরাজয়ে পিতা বড়ই ক্ষুব্ধ  
হ'য়েছেন।

আকবর। তা কি ক'র !—আর আজীম, এ যুদ্ধে আমিই একা  
পবাজিত হই নি। স্বয়ং দিল্লীর খাঁ—

আজীম। দিল্লীর খাঁর উপবও পিতা সম্বলিত হন নি।

আকবর। আর সম্বলট নিজে ? আব তুমি ? তোমরাই জিতে  
এসেছো নাকি ?

আজীম। আমরা যুদ্ধ ক'রেছিলাম। যুদ্ধে পরাজয় হ'য়েছে।

আকবর। আর আমি ?

আজীম। বিলাসে কালহরণ কবে'ছিলে। অন্ততঃ পিতা তাই বলেন।

আকবর। বলেন কি ক'র ?

তাহবর। কুমার যুদ্ধ ক'রেন কার সঙ্গে, সাহজাদা ?

আজীম। চোর রও !

তাহবর। ওরে বাবা—

আকবর। তা এখন কি ক'র্ন্তে হবে ? আমি ভীক, বিলাসী,  
নৃত্যগীতপ্রিয়। তা হবে কি ?

আজীম। হবে আর কি ? আকবর ! জানো, পিতা তোমাকে অকর্মণ্য বিবেচনা করে' তোমাকে ফের বঙ্গদেশে পাঠাচ্ছিলেন। আমি তাঁকে নিরস্ত করে'ছি—অনেক অহুনয়ের পর। জেনো, পিতা তোমাব উপর অত্যন্ত ক্রুদ্ধ হয়েছেন ; সাবধান ! পিতার কাছে এখন বেশী ঘেঁষো না ! আমি বন্ধুভাবে ব'লছি।

প্রস্থান

তাহবর। ' কি বলেন, কুমার ! গতিক বড় সুবিধার নয়। আপনি যুদ্ধটা না জিতে বড়ই বেকুবি করে'ছেন।

আকবর। আমি কি ইচ্ছা করে' হেরেছি নাকি ?

তাহবর। তা বটে ! তবে ইচ্ছা না করে'ও হারা উচিত ছিল না। সাম্রাজ্যটা বা যদি কখন পাবার আশা ছিল—তা' গেল।

আকবর। তবে সাম্রাজ্য পাবেন কে ?

তাহবর। আজীম। (দেখলেন না, কি রকম আমার পানে ফৌস করে' উঠলেন। পেছোনে বিষ না থাকলে অমন 'কুলো পানা' চক্র হয় ? ওর তাড়াতে আমি কি রকম মুষড়ে গিয়েছিলাম দেখলেন না ?)

আকবর। আজীম ত নিজে ভারি বীর ! উনিই কি জিতে এসেছেন নাকি ?—হেরে—বেগম সাহেবাকে পর্যন্ত হাবিয়ে এসেছেন। রাজপুত উদার জাতি, তাই বেগমসাহেবাকে ফিরিয়ে দিয়েছে।

তাহবর। আজীম হেরে এসেছেন সত্য ; কিন্তু সে হারাটা সম্রাটের নিজের কি না ! সম্রাট কিছু মুখ ফুটে ব'লতে পারেন না। আজীম ছিলেন সম্রাটের অধীন কর্মচারী। আর আপনি ছিলেন স্বাধীন সেনাপতি।

আকবর। আজীম সম্রাটের প্রিয়পাত্র—কেন না সে খোসামুদে, গোঁড়া মুসলমান—হদ ছোয় না, গান শোনে না, দশবার নেওয়াজ পড়ে।—ভণ্ড ! কেবল সম্রাটকে খুসী রাখবার ফন্দি।

তাহবর। আপনিও তাই কখন না কেন ?

আকবর। তাহবর ! আমি রাজ্য ত্যাগ ক'র্ত্তে প্রস্তুত আছি ; সুরা, নারী আৰু গান ত্যাগ ক'র্ত্তে প্রস্তুত নই। আমি আজীবন মত নীচ নই। দরাজ হাতে জীবন ব্যয় করি। যত নীচ, ভীক, কৈতববাদী !

তাহবর। চূপ ! সম্রাট আসছেন—মাথা সামাল !

আকবর বিনাবাক্যে অলক্ষিতভাবে চলিয়া গেলেন

ওরংজীব ও দিলীর বা প্রবেশ করিলেন

ওরংজীব। কি। দুর্গাদাস ঝালোব জয় কবেছে ? আর পুৰমণ্ডলে সুবলদাস খাঁও রোহিনাকে গবাস্ত কর'ছে ?

দিলীর। হাঁ, জাঁহাপনা। আবো আছে। দখান সাহা মোগল-সৈন্তকে মালব থেকে তাড়িয়ে দিয়েছে। এখন সে কাজিদেব ধবে' শুল্ক-খুণ্ডন ক'র্ছে, কোবাণ কুপে নিষ্ফেপ ক'র্ছে, মস্জিদ সব ধূলিসাৎ ক'র্ছে।

ওরংজীব। কি শেবে বর্ষের উপর অত্যাচার !

দিলীর। তা'রা এ জিনিসটা জান্তো না। সম্রাটই পথ দেখিয়েছেন। সম্রাট হিন্দু বৈদ অগ্নিহুণ্ডে নিষ্ফেপ কবেন নি ? ব্রাহ্মণকে ধবে' কণ্ঠা পড়ান নি ? তীর্থ অপবিত্র করেন নি ? দেবমন্দির বিচূর্ণ কবে নি ? জনাব। কথা শুনুন ! হিন্দুবিদ্বেষ পরিত্যাগ ককন, জিজিয়াকব বদ করুন। হিন্দু মুসলমান এক হোক।

ওরংজীব। কখন না ! আমি যতদিন জীবিত আছি, ততদিন মুসলমান মুসলমান, কাফের কাফের।) দিলীর খাঁ ! দক্ষিণাত্য হ'তে মৌজামকে আস্তে লিখ'ছি। এবাব সমস্ত মোগলসৈন্ত নিয়ে মাড়বার আক্রমণ ক'র্বি। দেখি কি হয় ! তাহবর খাঁ ! সত্তব হাজার সৈন্ত নিয়ে মাড়বারের বিপক্ষে যাত্রা কর। আরো সৈন্ত আকবরের অধীনে

পাঠাচ্ছি ; আমি নিজে সসৈন্তে পিছে যাচ্ছি । দেখ—যদি মাড়বার জয়  
ক'র্ত্তে পারো, এক সাম্রাজ্যখণ্ড তোমায় দেব । যদি না পারো—তোমার  
পুরস্কাব লৌহশৃঙ্খল ।

প্রস্থান

তাহবর । কি বলেন, খাঁ সাহেব ?

দিলীর । আমি একবার দেখলাম ; তুমিও একবার দেখ ।

### দ্বিতীয় দৃশ্য

স্থান—দিলীর প্রাসাদের অন্তঃপুরস্থ প্রমোদ উদ্যান । কাল—সায়ান্ন । সম্রাজ্ঞী  
শুলনেয়ার সেই উদ্যানে বিচরণ করিতেছিলেন ।

শুলনেয়ার । কি দীর্ঘায়ত বলিষ্ঠ দেহ । কি উচ্চ প্রশস্ত ললাট !  
কি তীক্ষ্ণ দৃষ্টি ! কি দৃঢ়নিবন্ধ বন্ধিম ওষ্ঠযুগল ! সুন্দর পুরুষ এই দুর্গাদাস !  
কিন্তু কি আশ্চর্য্য ! সে একবার আমার পানে গদগদভাবে চাইল না ?  
জগতে এই অতুলনীয় রূপ সে বিস্মিত হ'য়ে দেখল না ? এ চাহনির  
জ্যোতির ছটায় সে অন্ধ হ'য়ে গেল না ? আমার করম্পর্শের তড়িতপ্রবাহে  
সে মূর্ছিত হ'য়ে প'ড়লো না ? জগদাশ্বর ! তোমার জগতে এ রকম মানুষ  
আছে !

গাইতে গাইতে রাজিয়ার প্রবেশ

গীত

কেমনে কাটাবো সারা রাত্তি রে, সে বিনা সই

—পলখ না হেরে যারে বাঁচি না বাঁচি না সই !

রাখি' এ হৃদয়পুরে,

যারে মনে হয় দূরে,

তারে দূরে রাখি' র'ব কেমনে—জানি না সই ।

রাজিয়া । কি, ঠান্দি ! সন্ধ্যা উত্তীর্ণ হ'য়ে গিয়েছে । তুমি এখনও  
এ নির্জন উদ্যানে একা ?

গুলনেয়ার। একাই আমার ভালো লাগে।

রাজিয়া। আগে লাগতো না!—ঠান্দি! আজকাল তোমাকে এত চিন্তাকুল দেখি কেন? আগে ত এরকম ছিলে না?

গুলনেয়ার। রাজিয়া তুই কখন ভালোবেসেছিন্?

রাজিয়া। ওমা, তা আর বাসিনি! গ্রীষ্মে আমি আর বর্ষায় খিচুড়ি আমি খুব ভালোবাসি। তার পর উপরে ঐ পুষি মেনিটাকে যে কি ভালোইবাসি, ঠান্দি—কেমন “মেউ মেউ মেউ” করে—যদিও সেটা জানত কোন রাগরাগিণীর সঙ্গে মেলে না।

গুলনেয়ার। দূর হাবা মেয়ে! বলি কোন মানুষকে ভালোবেসেছিন্?

রাজিয়া। মানুষ! বেসেছি বৈ কি—তোমায় ভালবাসি, মাকে ভালোবাসি—আর একজনকে ভারি ভালোবাস্তাম; সে মরে'গিয়েছে।

গুলনেয়ার। কে সে?

রাজিয়া। ঐ আমাদের বুড়ো বাবুচি। কি রান্নাই রাঁধত, ঠান্দি! যেন একেবারে সুরট মল্লার—(বলিযা গান ধরিয়া দিল—“পিয়ারে কহিও বর্ষা ঋতু আই”—এটা কিন্তু দেশ! মল্লারেরই কাছাকাছি।)

গুলনেয়ার। তুই একটা গান গা, রাজিয়া, আমি শুনি।

রাজিয়া। (সোল্লাসে) শুন্বে? রোস, এপ্রাজটা আনি।

শৌড়িয়া প্রস্থান

গুলনেয়ার। যা হোক, আমি আর একবার তা'কে চাই! তা'র দস্ত চূর্ণ ক'র্ক। কি স্পর্ক। আমার সম্মুখে একজন পুরুষ সোজা হ'য়ে দাঁড়িয়ে চলে' যাবে? লালসায় জরজর হবে না? নতজানু হ'য়ে আমার কুপাকটাক ভিক্ষা ক'র্কে না?

রাজিয়ার প্রবেশ

রাজিয়া এসাজ লইয়া বসিয়া কহিল—“কি শুনবে ?”  
 গুলনেয়ার । কাল ছাদের উপর রাতে যেটা গাচ্ছিলি !  
 রাজিয়া । সেটা ? সেটা ত এসাজে বাজাতে পার্ব না ।  
 গুলনেয়ার । বিনি এসাজেই গা’ ।

রাজিয়া এসাজ রাখিয়া দৃষ্টা গান বরিল

গান

হৃদয় আমার গোপন করে’ আর ত লো সহি রৈতে নারি  
 ভরা গাঙে ঝড় উঠেছে খর খর কাঁপছে বারি ।  
 চেউয়ে চেউয়ে মৃত্যু তুলে ছাপিয়ে উঠে কূলে কূলে,  
 বাধ দিয়ে এ মত্ত তুফান আর কি ধরে রাখতে পারি ।  
 মানের মানা শুনবো না আর, মান অভিমান আর কি সাজে,  
 মানের তরী ভাসিয়ে দিয়ে, কাঁপ দেবো এই তুফান মাঝে ;  
 যাবো তার তরঙ্গে চড়ি, দেখবো গিয়ে কোথায় পড়ি ;  
 জীবন যখন করেছি পণ, সরমের ধার আর কি ধারি ।

রাজিয়া । এটা হচ্ছে ছাঘানট—ছায়া আর নয়—পঞ্চম থেকে একে-  
 বারে রেখাব ( সুর করিয়া ) ভারি সুন্দর ! না ?

গুলনেয়ার । সত্যই ভরা গাঙে ঝড় উঠেছে ! ‘বাধ দিয়ে এ মত্ত  
 তুফান আর কি ধরে’ রাখতে পারি ?’ দরকার কি ? ধরে’ রাখতেই  
 বা যাবো কেন ? ভালোবাসার প্রবল উচ্ছ্বাস এসে আমার গ্রাস করুক ;  
 আমার ছেয়ে ফেলুক । উচ্ছ্বালেই আমার আনন্দ ; বিরাতেই আমার  
 উল্লাস । তবে এই দুর্গাদাসকে আমি চাই । যশোবন্তের রাণী আমার  
 উপলক্ষ মাত্র ! আমার লক্ষ্য দুর্গাদাস । ঔরংজীব ! মাড়বার আক্রমণ  
 কর । এই দুর্গাদাসকে আমি চাই ।

শ্রাবণ

রাজিয়া । কি রকম ! ঠান্দি কি বিড়ির বিড়ির ব'কতে ব'কতে  
চলে' গেল ? এমন ছায়ানট বুলে না—

এই বলিয়া রাজিয়া মুখে কৃপাপ্রকাশক স্বনি করিয়া ছায়ানট  
ভাজিতে ভাজিতে চলিয়া গেল

### তৃতীয় দৃশ্য

স্থান মাড়বার পল্লতশ্রেণী । কাল—প্রভাত । দুর্গাদাস ও ভীমসিংহ মুখোমুখি  
দাঁড়াইয়া । অদূরে গ্রামবাসিগণ কোলাহল করিতেছিল ।

দুর্গাদাস । ভীমসিংহ ! সম্রাট সমস্ত মোগলসৈন্য নিয়ে মাড়বাব  
আক্রমণ ক'রেছেন !—এবাব আমাদের জীবন-মরণেব সমস্যা ! এবার  
রাজপুত জাতির হয উচ্ছেদ, না হয উত্থান -বীর ! এই মহাসমরের  
জন্ম প্রস্তুত হও ।

ভীম । সেই জন্মই পিতা আমাকে এখানে পাঠিয়েছেন । আমি  
এসেছি যুদ্ধে প্রাণ দিতে ।

দুর্গাদাস । শিশোদীয় বীর ! তোমার শৌর্য্য, তোমার স্বার্থত্যাগের  
কথা অবগত আছি । কিন্তু মেবার যুবরাজ ! তুহি মহৎ আছো ; তোমায়  
মহত্তর হ'তে হবে । তুমি বীর, কিন্তু এ যুদ্ধে তোমায় বীর্য্যের শিখরে  
উঠতে হবে ।

ভীম । নিশ্চিন্ত থাকুন, সেনাপতি । এ যুদ্ধে প্রাণ বিসর্জন ক'র্তে  
এসেছি—কর্তব্যজ্ঞানে । সে কর্তব্য নিজের প্রতি, পিতার প্রতি, রাজপুত  
জাতির প্রতি । সে কর্তব্যের পথ হ'তে ভীমসিংহ স্থলিত হবে না ।  
আমায় বিশ্বাস করুন ।

দুর্গাদাস । ভীমসিংহ ! আমরা তোমায় সম্পূর্ণ বিশ্বাস করি ।

ভীম । মহারানী কোথায় ?

দুর্গাদাস । তিনি সমস্ত মাড়বারে ; নগরে, গ্রামে, অরণ্যে, পর্বতে । তিনি স্বয়ং সৈন্যসংগ্রহ ক'রছেন—জাতিকে উত্তেজিত ক'রছেন ! মাড়বার যশোবন্তসিংহের মৃত্যুতে বিচ্ছিন্ন হ'য়ে পড়ে'ছে ! তাই মহারানী স্বয়ং মাড়বার জাতিকে একত্রিত ক'র্ত্তে বেরিয়েছেন !

ভীম । আমি তাঁর সঙ্গে একবার সাক্ষাৎ ক'র্ত্তে চাই ।

দুর্গাদাস । আজই সাক্ষাৎ হবে, কুমার ! তিনি আজ প্রভাতেই এই গ্রামে আসবেন । আমি তাঁর উদ্দেশ্যেই এসেছি !

সমরদাসের প্রবেশ

দুর্গাদাস । সংবাদ পেয়েছো, দাদা ?

সমর । হাঁ, মোগলসেনাপতি তাহবর খাঁ ৭০,০০০ সৈন্য নিয়ে মাড়বার অভিমুখে আসছেন ! কুমার আকবরের সঙ্গে আরো সৈন্যপিছনে আসছে ।

দুর্গাদাস । আর সত্ৰাট ?

সমর । তিনি সসৈন্যে আজমীরে । তাঁর সঙ্গে লক্ষাধিক সৈন্য ।

দুর্গাদাস ভীমসিংহের দিকে চাহিলেন

ভীম । বাঠোরসৈন্য কত, সেনাপতি ?

দুর্গাদাস । ১০০০০ মাত্র । আমাদের লক্ষাধিক সৈন্য ছিল ; যশোবন্তসিংহের মৃত্যুতে ছত্রভঙ্গ হ'য়ে গিয়েছে—অনেক সৈন্য যুদ্ধ ছেড়ে ব্যবসায়িক কৃষি ধরে'ছে । মহারানী তাদেরই ডাক্তে বেরিয়েছেন । দেখ'ছো গ্রামবাসীদের ? যেন জীবন নাই । কিন্তু এরাই উত্তেজিত হবে । মহারানীর মুখে, বক্তৃতায়, উত্তেজনার একটা তাড়িত শক্তি আছে ! তিনি আজ যেন একটা কি স্বর্গীয় প্রেরণায় উদ্দীপিত ! তাঁর কথায় আজ হিম পাথরকেও উষ্ণ করে, মেঘকেও ক্ষেপিয়ে দেয় ।

ভীম । ঐ মহারানী আসছেন !

দুর্গাদাস । হাঁ, ঐ আসছেন ! ভীম ! সরে' দাঁড়াও ।



ভীম । সত্যই ত । এ যে অপূর্ব, সেনাপতি ! এ ত কখনও দেখি  
নাই ! কি দানবদলনী মূর্তি ! পৃষ্ঠে লুষ্ঠিত ঘন কৃষ্ণ কেশরাশি, দু' চারি  
গাছ উদ্ভাসিত কপোলে এসে পড়ে'ছে ; চক্ষে কি দিব্য জ্যোতি, ললাটে  
কি গর্ভ ; ওষ্ঠে কি বরাভয়প্রদ হাস্য ।—আর ভয় নাই, সেনাপতি ! স্বয়ং  
মা জন্মভূমি মানবমূর্তি ধারণ করে' এসেছেন । আর ভয় নাই !

দুর্গাদাস ও ভীমসিংহের অন্তরালে অবস্থিত, রাণী ও

তৎপশ্চাতে গ্রামবাসিদিগের প্রবেশ

গ্রামবাসিগণ । জয় রাণীমাইর জয় !

প্রথম গ্রামবাসী । মহাবাণীকে জায়গা ছেড়ে দাও ।

দ্বিতীয় গ্রামবাসী । আমরা মহাবাণীকে দেখতে পাচ্ছি না ।

রাণী একটি সন্নিহিত উচ্চ প্রস্তরের উপর দাঁড়াইয়া কহিলেন, “গ্রাম-  
বাসিগণ—পুল্লগণ !”

তৃতীয় গ্রামবাসী । আমরা শুন্তে পাচ্ছি না । আমরা শুন্তে পাচ্ছি না ।  
রাণী । শুন্তে পাবে । শুরু হও !

চতুর্থ গ্রামবাসী । শুরু হও । স্থির হও ।

রাণী । শোন, আমি আজ এখানে এসেছি কেন—শোন—

পঞ্চম গ্রামবাসী । আহা, তোমরা স্থির হও না—শুন্তে দাও ।

রাণী । আগে আমার পরিচয় দেই ! শোন আমি কে ।

ষষ্ঠ গ্রামবাসী । এই চূপ কর ! শুন্তে পাচ্ছি না ।

রাণী । মাড়বারবাসিগণ ! আমি যশোবস্তুর রাণী । সয়াট  
ঔরঞ্জীবের কোশলে হিন্দুকুশের পরপ্রান্তে আফগানিস্থানের ডুয়ার  
মধ্যে আমার স্বামী—তোমাদের রাজা যশোবস্তুর মৃত্যু হয় । আমার  
জ্যেষ্ঠ পুত্র তোমাদের যুবরাজ পৃথ্বীসিংহ ঔরঞ্জীবের কোশলে বিষ-  
প্রয়োগে প্রাণত্যাগ করে । আমার কনিষ্ঠপুত্র তোমাদের বর্তমান

কুমার অজিতসিংহ ঔরঞ্জীবের গ্রাস হ'তে দূরে নিভূতে রক্ষিত। আর আমি তোমাদের রাণী আজ পথের ভিখারিণী !

গ্রামবাসিগণ কোলাহল করিতে লাগিল

সপ্তম গ্রামবাসী। তা' আমরা কি ক'ৰ্ব ?

অষ্টম গ্রামবাসী। আমাদের ক্ষমতা কি ?

নবম গ্রামবাসী। সত্রাটের এ সব অত্যাচারের কিন্তু একটা প্রতিকার করা উচিত।

দশম গ্রামবাসী। আমাদের ত রাণী বটে ! আমরা ক'ৰ্ব না ত কে ক'ৰ্ব ?

রাণী। শোন গ্রামবাসিগণ—আমি কিন্তু আজ নিজের দুঃখ জানাতেই তোমাদের কাছে আসিনি। আমি এসেছি আজ—আমাদের সুন্দর মাড়বারের জন্ত তোমাদের সাহায্য ভিক্ষা ক'র্তে ! সত্রাট লক্ষাধিক সৈন্য নিয়ে মাড়বার আক্রমণ ক'র্তে আসছেন। তোমরা মাড়বারের সম্ভান ; তোমরা রাজপুত্র ; তোমরা বীর ! তোমরা কি নিশ্চিন্ত ভাবে দাঁড়িয়ে তোমাদের জন্মভূমি পরপদদলিত, নিষ্পেষিত বিধ্বস্ত হ'তে দেখবে ?

একাদশ গ্রামবাসী। লক্ষাধিক সৈন্য ? হায় হতভাগ্য মাড়বার !

দ্বাদশ গ্রামবাসী। সেনাপতি ঝালোর আক্রমণ না করলে এটা হ'তো না।

ত্রয়োদশ গ্রামবাসী। হাঁ। কেন সুপ্ত ব্যাঘ্রকে জাগিয়ে তোলা ?

চতুর্দশ গ্রামবাসী। লক্ষ মোগলসৈন্যের সঙ্গে যুদ্ধ করা হীনবীর্য্য মাড়বারের পক্ষে সম্ভব নয়।

রাণী। সম্ভব নয় ? সম্ভব নয় ? তবে তোমাদের দূর করে' দলিত করে' মোগল এই তোমাদের স্বর্ণভূমি অধিকার ক'ৰ্ব, তাই তোমরা

নির্বিকারভাবে দাঁড়িয়ে দেখবে? হা ধিক্! এত তরল কোমল যে জল, তাকে স্থানচ্যুত ক'র্ত্তে গেল, সেও বাধা দেব। আর তোমরা নীরবে নিশ্চেষ্টভাবে নিজের দেশকে অন্নের হাতে সঁপে দেবে? হিন্দু তোমরা! রাজপুত্র তোমরা! ক্ষত্রিয় তোমরা!—সম্ভব নয়? যশোবন্তসিংহ জীবিত থাকলে তাঁর সম্মুখে এ কথা ব'লতে সাহস ক'র্ত্তে না। তাঁর জন্তু সকলে প্রাণ দিতে তোমরা প্রস্তুত ছিলে। যশোবন্তসিংহের এক চাহনিতে তোমাদের রক্ত উষ্ণ হোত, তাঁর একটি কথাতে দশসহস্র তরবারি পিধান হ'তে বেরিয়ে আসতো; তাঁকে অস্বারূঢ় দেখলেই তোমাদের মিনিত জয়ধ্বনিতে আকাশ ধ্বনিত ক'র্ত্তে। আমি নারী! আমি তাঁর বিধবা পত্নী। আমি আজ পথের ভিখারিণী। আমার কথা শুনবে কেন? আমি ত আর তোমাদের রাণী নই!

গ্রামবাসিগণ। আপনি আমাদের মহারাণী। আপনার কথা শুন্বো।  
 রাণী। শুন্বে যদি, তবে তোমাদের গ্রাম, কুটীর ছেড়ে চলে' এসো। তরবারি লও। ওঠ, এই ঔদাসীন্য পরিত্যাগ কর। একবার দৃঢ়পণ করে' ওঠো! ওঠো, যেমন তুরীশব্দে সিংহ জেগে ওঠে! ওঠো—যেমন ডমরুধ্বনি শুনে সর্প ফণা বিস্তার করে' ওঠে; ওঠো—যেমন বজ্রধ্বনি শুনে পর্বতের কন্দরে কন্দরে প্রতিধ্বনি জেগে ওঠে; যেমন ঝঞ্জার নিষ্পেষণে সমুদ্রের তরঙ্গকল্লোল ওঠে। ওঠো! রাজস্থান জানুক, ঔরংজীব জানুক যে, তোমাদের শৌর্য্য স্তম্ভ ছিল মাত্র, লুপ্ত হয় নাই।

গ্রামবাসিগণ। মহারাণী, আমরা যাবো। কিন্তু এ যুদ্ধে জয়শা নাই। মৃত্যুই সার হবে।

রাণী। মৃত্যু! গ্রামবাসিগণ—মৃত্যু কি একদিন আসবে না? সে যখন বিছানায় এসে তোমার টুঁটি চেপে ধ'র্কে, সে বড় সুখমৃত্যু নয়। কিন্তু স্বেচ্ছায়, দেশের জন্তু, কর্তব্যের জন্তু, মৃত্যুই সুখমৃত্যু।

গ্রামবাসীগণ । আমরা যাবো, মহারানি ! যেখানে আপনি নিয়ে যান, আমরা যাবো ।

রাণী । এই ত তোমাদের যোগ্য কথা ! শোন—আমি কাউকে তা'র ইচ্ছার বিরুদ্ধে ডাকছি না ! যদি কারো মাতৃভূমির প্রতি টান থাকে, যদি কারো স্বধর্মের প্রতি সম্মানের জ্ঞান থাকে, যদি কেউ স্বাধীনতার জন্য প্রাণ উৎসর্গ কর্তে প্রস্তুত থাকে—সে এসো ! সে একাই একশ' ! ক্ষীণসংকল্প, দ্বিধাসন্ধিগ্ন ব্যক্তিকে আমি চাই না ! একাগ্র দৃঢ় স্থিরপ্রতিজ্ঞ ব্যক্তিকে আমি চাই । দুই পথ আছে, বেছে নাও !—একদিকে বিলাস, আমোদ, আরাম, আর উপভোগ ; আর একদিকে শ্রম, অনাহার, দারিদ্র ও দুঃখ ! একদিকে সংসার, গৃহ ও শান্তি ; আর একদিকে সমরক্ষেত্র, ক্ষত ও মৃত্যু । একদিকে নিজেব সুখ ; আর একদিকে দেশের প্রতি কর্তব্য ; বেছে নাও ।

সকলে । আমরা কর্তব্য বেছে নিলাম ।

রাণী । উত্তম ! তবে আজ সব রাঠোর মিলিত হও ! তুচ্ছ বিসংবাদ এই মহাবীরের অগ্নিকুণ্ডে নিক্ষেপ কর । একবার সকলে এক হয়ে জন্মভূমিকে প্রাণ ভরে' ডাক "মাইজিকি জয়" !

সকলে । মাইজিকি জয় !

### চতুর্থ দৃশ্য

স্থান—যুদ্ধক্ষেত্রে রাজ্যার শিবির । কাল—রাত্রি । বৃষ্টি, ঝটিকা বিদ্যুৎ ও বজ্র ।  
রাজিয়া গাহিতেছিল—

ঘন ঘোর মেঘ আই', ঘেরি' গগন,  
বহে শীকরম্বিক্‌চ্ছ, সিত পবন,  
নামে গভীর মলে, গুরু গুরু গরজন ।

ছোট, উন্মাদিনী ঝগা, এসে  
 বিশ্বতলে পড়ে—বৃষ্টিত কেশে  
 —মুখে হা হা স্বন ।  
 পিঙ্গল দামিনী মুহূর্ ছ চমকে  
 ধাঁধি নয়ন—কড় কড় কড়কে  
 বজ্র সঘন।)

বাজিয়া । উঃ । বাপ্বে ! কি কোলাহল ! সৈন্তদের চীৎকার !  
 কামানের গর্জন ! বণবাণেব ধ্বনি । হঠাৎ এ কি ! কান ঝালা  
 পালা ক'বে দিলে । মানুষগুলো সঙ্গীতশাস্ত্র কখন চর্চা কবে'ছে বলে'  
 বোধ হয় না— উঃ ।

কণে হস্ত প্রদান

আকবরের প্রবেশ

বাজিয়া । কে ? বাবা ?

আকবর । হাঁ, বাজিয়া !

বাজিয়া । এঃ ! আপাদমস্তক ভিজে গিয়েছে যে বাবা ! বাইরে  
 এ সব কি ? এত কোলাহল ।

আকবর । যুদ্ধ হ'চ্ছে । রাজপুত মোগলশিবির আক্রমণ করে'ছে ।

বাজিয়া ! তা' না হয় ক'রেছে ! কিন্তু এত বেসুবো চেঁচায় কেন ?

আকবর । বেসুবো কি ব'ল্ছিস্, বাজিয়া ? ব্যাপার গুরুতব ।

—উঃ ! কি বাশি বাশি মৃত্যু !

বাজিয়া । বেশ বুঝ্ছি । কিন্তু চেঁচায় কেন ?

আকবর । কি ব'ল্ছিস্, বাজিয়া—এ সাফাৎ মৃত্যু ! মৃত্যুকে  
 এত কাছাকাছি কখন দেখিনি ! উঃ—বাইরে কত লোক ম'র্ছে  
 জানিস্ ?

বাজিয়া । ম'র্ছে ! তাই পালিয়ে এসেছ বাবা ! ভয় ক'র্ছে ?  
 ভয় কি বাবা !

আকবর । হয় ত আমাকে আর তোকেও আজ ম'র্তে হবে !

রাজিয়া । যদি ম'র্তেই হয় ত গাইতে গাইতে মর্কো ! তীরাপহত  
লহরীর মত গাইতে গাইতে নেমে যাবো !

আকবর । ও কি ! বাব বার রাজপুতের জয়ধ্বনি ! ঐ আরো  
নিকটে !

নেপথ্যে । জয় মহারাণীর জয় !

তাহবরের প্রবেশ

তাহবর । যুবরাজ ! পালান পালান ।

আকবর । কেন তাহবর খাঁ ?

তাহবর । আমাদের পরাজয় হ'য়েছে ।

আকবর । আমাদের সৈন্যরা কি ক'র্ছে ।—সব মরে' গিয়েছে ?

তাহবর । না, সব মরে নি । তারা এ রকম অবস্থায় বুদ্ধিমান্ ব্যক্তি যা  
করে' থাকে—তাই ক'র্ছে ; শত্রুকে "পশ্চাদ্ভাগ দেখহ" করে' ছুটেছে ।

রাজিয়া । পালাচ্ছে ! সে কি ! পালাচ্ছে কেন ? সেনাপতি !  
রাজপুতের হাতে পরাজয় মেনে পালাতে লজ্জা হ'চ্ছে না !

তাহবর । তাদের আর লজ্জা কি ! তা'রা ত স্ত্রীলোক নয় ।  
—পালান সাহাজাদা, এখনও সময় আছে ।

রাজিয়া । আমি পালাবো না । পালাবো কেন ? না হয় মর্কো ।  
বাবা ! তুমি মোগল হ'য়ে কোন্ মুখে পালাবে ?

তাহবর । যে মুখে যুদ্ধ হ'চ্ছে তারই উণ্টো মুখে । পালাতে  
হয় আবার কোন্ মুখে ?

রাজিয়া । আমি পালাবো না ।

তাহবর । আপনি যদি না পালান, আমরাই পালাই । আপনি  
স্ত্রীলোক—একটু লজ্জা হ'চ্ছে হয় ত, আমাদের সে বিষয়ে লজ্জা নাই !  
কি বলেন সাহাজাদা !

আকবর। উঃ! কি ভীষণ রাত্রি! কি হাহাকার! কি হত্যা!  
বাইরে। “পালাও, পালাও” “জয় রাণার জয়” “হর হর” ইত্যাদি।

রাজিয়া। উঃ কি কোলাহল!

তাহবর। কি ভাবছেন যুবরাজ! চলে' আসুন! আপনি দেখছি  
স্ত্রীলোকেরও অধম!

আকবর। উঃ—কি হত্যা! এত হত্যা আমি কখন দেখিনি।

তাহবর। তা' খাড়া হ'য়ে থাকলে কি হবে। ঐ—ঐ—শিবিরেব  
দুয়ারে—এই দিকেব দরোজা দিয়ে—ঐ শত্রু”—বলিয়া তাহবর পলায়ন  
করিলেন।

আকবর। চলে' আস বাজিয়া! আমরাও পালাই।

রাজিয়া। বাবা!

আকবর। কথা ক'ম্‌নে, এই দিক্ দিয়ে—এই দিক্ দিয়ে আস  
ব'লছি।

আকবর রাজিয়াকে টানিয়া লইয়া নিষ্ক্রান্ত হইলেন।

তৎপরক্ষণেই দুইজন রাজপুত্র সেনানীর প্রবেশ

১ম সেনানী। কেউ নাই—পালিয়েছে। কোন্ দিকে পালালো!

২য় সেনানী। এই দিক্ দিয়ে—

তাহারা চলিয়া গেল। সমরদাস ও আরো রাজপুত্রসৈন্য প্রবেশ করিল

সমর। বল—ভগবান্ একলিঙ্গের জয়।

সকলে। জয় ভগবান্! জয় একলিঙ্গের জয়।

সমর। ভীমসিংহ কোথায়?

১ম সৈনিক। তাঁকে দেখছি না।

সমর। যাও, অন্বেষণ কর।

সমর ভিন্ন সকলের প্রস্থান

সমর। উঃ—কি রাত্রি! কি যুদ্ধ! কি স্তূপীভূত হত্যা!

## শপ্তম দৃশ্য

স্থান—মেবারের এক গিরিভূগ। ইদতীরে দুইটি প্রস্তর-নির্মিত বেদী। কাল—  
জ্যোৎস্না-রাত্রি। কমলা বেদীতে বসিয়া একাকিনী গাহিতেছিলেন—

এস প্রাণসখা এস প্রাণে,

মম দীর্ঘ বিরহ অবসানে।

কর, তুমিত প্রাণ অতিষিক্ত, তব, প্রেমসুধারস দানে।

বন, আকুল, বনফুল গন্ধে, বন, মুগ্ধরিত, মর্শ্বর হলে,

বহে, শিহরি পবন, মৃদুমন, গাহে, আকুল কোবিল কুহ কুহ তানে

একি জ্যোৎস্নাগর্ভিত শর্করী ; একি পাণ্ডুর তারাপুঞ্জ ;

একি স্নন্দর নীরব মেদিনী ; একি নীরব নিভৃত নিকুঞ্জ ,

বসে' আছি পাতি' মম অঞ্চল ; অতি শঙ্কিত কম্পিত চঞ্চল।

এস হে প্রিয় হে চিরবাহিত !—মম প্রাণ অধীর, প্রবোধ না মানে।

জয়সিংহ বাগানের মধ্যে সে স্থানে উপস্থিত হইয়া সে গীত শুনিতেছিলেন

কমলা। কে!—ও! তুমি!

জয়। হাঁ আমি।

কমলা। কতক্ষণ এসেছো?

জয়। অনেকক্ষণ।

কমলা। এতক্ষণ কি ক'ছিলে?

জয়। শুন্ছিলাম।

কমলা। কি?

জয়। বীণার ধ্বনির সঙ্গে মৃদঙ্গ! কি শুন্ছিলাম? কি শুন্ছিলাম  
তা' ঠিক জানি না! কিন্তু যা শুন্ছিলাম, তা' পূর্বে কখন শুনি নাই।

কমলা। বুঝেছি। তুমি আমার গান শুন্ছিলে।

জয়। হবে। আমি ত এতক্ষণ এ রাজ্যে ছিলাম না। স্বপ্নরাজ্যে  
ছিলাম। কিন্তু শুন্ছিলাম কি?—না দেখ্ছিলাম? দেখ্ছিলাম



বুঝি, যে, কতকগুলি সুন্দর কিশোর স্বর শুভ্রপক্ষ বিস্তার করে, আকাশে বিচরণ ক'চ্ছে। শেষে সে স্বরগুলি আরো গাঢ় হ'য়ে, আরো গদগদ হ'য়ে আরো উজ্জ্বল হ'য়ে একটি একটি নক্ষত্রে বিলীন হ'য়ে গেল!

কমলা। না! তুমি এত বেশী সংস্কৃত ব'লে যে, তার অর্থ বোঝা আমার অসাধ্য। সোজা প্রচলিত ভাষায় বল—বুঝতে পারি।

জয়। কমলা! তুমি যা' গাইলে, প্রাণ থেকে গাইলে কি? না একটা যা মনে এলো তাই গাইলে?

কমলা। কি বোধ হয়?

জয়। জানি না। তবে গান্নে মান্নে মনে হয়, তুমি কোন যাতুকরী, আমাকে যাতু করেছে।

কমলা। যাতু করার দরকার নেই! তুমি নিজেই যাতু আছে।

জয়। আমি যে নিজর্জীব, নিশ্চেষ্ট, স্বকর্মণ্য হ'য়ে গিয়েছি। একি ভালোবাসা? না মোহ?

কমলা। যাই বল' ফল ত দাঁড়াচ্ছে এক। তুমি ত এই ক'ড়ে আগুলের চারিদিকে ঘুরেছো!

জয়। এ যদি ভালোবাসা হয়, ত এ ত বড় ভয়ানক!

কমলা। ভয়ানক কি?

জয়। ভয়ানক নয়? যে ভালোবাসা সব উৎসাহ তেজ লুপ্ত করে, যে ভালোবাসা মানুষকে অজ্ঞান করে' দেয়, তার চক্ষু হ'তে বিশ্বনিখিলকে নির্বাসিত করে; যাতে মানুষ মনুষ্য হারায়—সে বড় ভয়ানক অবস্থা।

কমলা। তাও ত বটে! এ ত বড় ভয়ানক। রোগ শক্ত। চিকিৎসা করা দরকার। বড়রাণীকে ডাকবো নাকি? সেই একা তোমার এ রোগ সারাতে পারে। কেমন দুটো ঝাঝা কথা বলে' সেদিন তোমায় যুদ্ধে পাঠিয়েছিল। ডাকবো?

জয় । না কমলা ! এ রোগ তার চিকিৎসারও অসাধ্য হ'য়েছে । আর কেউ সারাতে পারে না । শোন কমলা—মাড়বারের সঙ্গে সম্রাট ঔরঞ্জীবের বন্ধ বেধেছে । পিতা আমার সেদিন ডেকে পাঠালেন । আমি উপস্থিত হ'লে ব'ল্লেন—“যাও পুত্র ! দুর্গাদাসের সাহায্যে যাও ।” আমি মাথা হেঁট করে' রৈলাম । তিনি ব'ল্লেন—“কি জয়সিং ! নীরব রৈলে যে ?” আমি মাথা হেঁট করে' রৈলাম । পরে ব'ল্লেন—“বুঝেছি, আচ্ছা অস্ত্রপুর্বে যাও ; আমি ভীমসিংকে পাঠাচ্ছি ।” মাথা হেঁট করে' চলে' এলাম । পরে সরস্বতী এসে ভৎসনা ক'লে । কথা কৈলাম না ? মনে দিক্কার হ'ল !—আমায় এ কি ক'লে' কমলা ! আমাকে কি মোহে আচ্ছন্ন করে'ছো ! কি নেশায় বিভোর করে' রেখেছো !

কমলা । আমি কিন্তু তোমায় কিছু খাওয়াই নি টাওয়াই নি ।—দোহাই ধর্ম !—শেষে যে দুষ্টবে, তা' হবে না ।

জয় । না কমলা, আমি তোমায় দোষ দিচ্ছি না !—একদিন জিজ্ঞাসা ক'রেছিলাম ‘রূপ কি সুরা !’ এখন দেখ'ছি যে রূপ—

কমলা । আফিং ! আমিও সে দিন বলে'ছিলাম, তুমি বিশ্বাস ক'লে' না ।

জয় । কমলা, আমি তোমায় ভালোবাসি ।

কমলা । সে ত অনেকবার বলে'ছো ।

জয় । বলে' তৃপ্তি হয় নাই । আবার ব'লু'ছি—ভালোবাসি । বলতে বড় ভালো লাগে ।

কমলা । তবে যত খুসী বল ।—তা' মুখে যতই বল, আমি জানি কাজের বেলায় তুমি বড়রাণীগত প্রাণ ।

জয় । আমি !

কমলা । নয় ত কি আমি !—আমি তোমার মুখের ভালোবাসা পেয়েছি মাত্র । কিন্তু কাজ গুছিয়ে নিয়েছে বড়রাণী !

জয় । কিসে ?

কমলা । বলে' দরকার কি !

সভিমানের প্রশ্ন

জয় । শোন কমলা !—না । এ নারীর ক্ষণিক অভিমান মাত্র !  
এই বৃষ্টি আর এই বোঝে কি অপূর্ব জাতিই তৈয়ের করে'ছিলে পরমেশ !

সরস্বতীর প্রবেশ

সরস্বতী । নাথ !

জয় । সরস্বতী !

সরস্বতী । মাড়বারে মোগল ও রাজপুতেব মধ্যে যুদ্ধের পরিণাম  
শুনেছো ?

জয় । না ।

সরস্বতী । শুনে চাও ? অবকাশ আছে ?

জয় । বল শুনি ।

সরস্বতী । সমরে মাড়বার জয়ী হ'য়েছে । কিন্তু—

জয় । কিন্তু ?

সরস্বতী । কিন্তু তোমার ভাই আর নাই ।

জয় । কে, ভীমসিংহ ?

সরস্বতী । হাঁ । তিনি এ যুদ্ধে মাড়বার রক্ষার জন্য প্রাণ বিসর্জন  
দিয়েছেন !

বলিতে বলিতে সরস্বতীর কণ্ঠ কঁক হইল

জয় । মহৎ উদার বীরোত্তম ভাই ! তুমি অক্ষয় স্বর্গলাভ করে'ছো ।

সরস্বতী । আর তুমি ?

জয় । বুদ্ধি নরক ।

সরস্বতী । হায় নাথ !

প্রস্থান

জয় । সরস্বতি ! আমায় স্নান কোরো না । আমি অক্ষম !—আমি অক্ষম !—এই যে পিতা আসছেন । সঙ্গে মাড়বারমহিষী ও সমরদাস । আমি কূপের ভেক, কূপের মধ্যে যাই । আমি পিতার অবজ্ঞাকরণ দৃষ্টি সৈতে পার্ক না ।

প্রস্থান

রাজসিংহ, মহারাণী ও সমরদাসের প্রবেশ

রাজসিংহ । এইখানে বোসো রাণী ! ঘরে অসহ্য রকম উত্তাপ ! এই জ্যোৎস্নালোকে বোস । এই স্থান ভীমসিংহের বড় প্রিয়স্থান ছিল । সে এখানে এসে ঐ নীল সরোবরের দিকে চেয়ে সমস্ত প্রভাত কাটিয়ে দিত ।

সকলে বেদীর উপরে উপবেশন করিলেন

রাণী । রাণা ! ভীমসিংহের শৌর্য কাহিনী ইতিহাসের পৃষ্ঠায় স্বর্ণাক্ষরে লিখে রাখবার জিনিস ।

রাজসিংহ । আমি তাকে হারিইছি—চিরদিনের মত হারিইছি !

বাণী । রাণা ! যুদ্ধে মরার চেয়ে ক্ষত্রিয়ের আর অধিক গৌরবের মৃত্যু কি আছে ? ভীমসিংহ যদি আমার পুত্র হোত, তা' হ'লে তার অনুরূপ মৃত্যু কামনা ক'র্তাম না ।

রাজসিংহ । তুমি সত্য কথা বলে'ছ মহারাণী ।—বল সমরদাস ! ভীমসিংহ কিরূপ বুদ্ধ বলে' !

সমর । সে রকম বুদ্ধ আজ পর্যন্ত কেউ করে নাই রাণা ! শুনুন—সে রাত্রি ঘোর অন্ধকার, আকাশ মেঘাচ্ছন্ন, মুষলধারে বৃষ্টি প'ড়'ছিল । একরূপ ঘন অন্ধকার যে, সে রূপ বুদ্ধি আর কখন হয় নাই । কেবল মুহুমুহু বজ্রধ্বনি সে ভীষণ রাত্রিকে আরো ভীষণ করে' তুলেছিল ।  
উঃ—কি সে রাত্রি !

রাণী তার পর ?

রাজসিংহ । ( উদ্ভ্রান্তভাবে ) এ কি রকম রাত্রি ! এ রকম রাত্রি !

সমর । এ হেন রাত্রিকালে আপনার পুত্র আমাদের পুনঃ পুনঃ নিষেধ সত্ত্বেও দশ সহস্র মেবারসৈন্য নিয়ে মোগলশিবির আক্রমণ কর্লে—মোগলসৈন্য লক্ষাধিক হবে !

রাজসিংহ । ( উদ্ভ্রান্তভাবে ) আমি তাকে নির্বাসিত করে'ছিলাম—তাকে নির্বাসিত করে'ছিলাম ।

রাণী । ধন্য শিশোদীয় কুমার ! তাব পর ?

সমর । তার পর একটা প্রকাণ্ড কল্লোল—সেই বজ্রধ্বনি ছাপিয়ে উঠে আমাদের কামানের বিরাট গর্জন । আব সেই নৈশ বৃষ্টিধারা ছাপিয়ে শত্রুসৈন্যের আর্তধ্বনি ।

রাজসিংহ । ( উদ্ভ্রান্তভাবে ) আমি নিজের দোষে তাকে হারিয়েছি ।

রাণী । তারপর ?

সমর । তখন আমি দশ সহস্র রাঠোরসৈন্য নিয়ে ভীমসিংহের সাহায্যার্থে গেলাম । গিয়ে দেখলাম—সেই বিদ্যুতের আলোকে কি দৃশ্য দেখলাম রাণা—তা' জীবনে ভুলতে পারব না ।

রাজসিংহ । ( উদ্ভ্রান্তভাবে ) সে দিন সে বলে'ছিল—পুত্র সেদিন বলে'ছিল যে যুদ্ধে প্রাণ দিতে যাচ্ছি ।

রাণী । বল সমর ।

সমর । মহারাণি ! বিদ্যুতের আলোকে দেখলাম যে, শত্রুসৈন্য বন্দুক তরবারি অস্ত্র নিয়ে ফিরে দাঁড়িয়েছে । ভীমসিংহের সৈন্য একটা বিশ্বগ্রাসী প্রলয়োচ্ছ্বাসের মত তার উপর গিয়ে পড়লো । অমনি বিপর্যয়বন্ধের বন্দুক আর কামান অগ্নি উল্গারণ করল । সে কি যুদ্ধ !—যে জ্বালামুখী উল্গারিত গৈরিক জ্বালায় সঙ্গে ঘূর্ণীকণ্ডার যুদ্ধ ।

রাণী । ধন্য ভীমসিংহ ! তার পর ?

রাজসিংহ । ( উদ্ভ্রান্তভাবে ) অভিমান করে' চলে' গেছে ? পিতার প্রতি পুত্র অভিমান কবে' চলে' গিয়েছে ।

সমর । ভীমসিংহকে বিদ্যাতেব আনোকে তখন দেখতে পেলাম ; উন্নতের ক্রায—মূর্ত্তিমান্ প্রলযেব ক্রায । যেখানে শত্রুসংখ্যা অধিক, সেখানে ভীমসিংহ । তাঁর দশসহস্র সৈন্য দশলক্ষ বোধ হ'তে লাগলো— একা ভীমসিংহ একত্রে দশ জাযগায দশজন সৈন্যাধ্যক্ষেব কাজ ক'র্ভে লাগলো ।

বাণী । ভীমসিংহ । ভীমসিংহ ! তুমি যদি আমার পুত্র হ'তে ।

রাজসিংহ । ( দীর্ঘনিশ্বাস সহকাবে ) অভিমান কবে' চলে' গিয়েছে !

বাণী । তার পব ?

সমর । এই সময় বাঠোবসৈন্য মেবাবসৈন্যেব সাহায্যে এসে উপস্থিত হ'লো । তাদের আসা মাত্রই শত্রুসৈন্য ছত্রভঙ্গ হ'য়ে উর্দ্ধ্বাশমে পালালো । আমরা তাদের বহুদূর তাড়িয়ে নিয়ে গেলাম ।

বাণী । তার পর ?

সমর । শিবিরে ফিবে এলাম, ভীমসিংহকে দেখতে পেলাম না । পরদিন প্রাতঃকালে তাব মৃতদেহ বুদ্ধক্ষেত্রে দেখতে পেলাম ।

বাণী । বাণা ! আপনার পুত্র আজ স্বদেশ রক্ষা করে'ছে ।

রাজসিংহ । ভীমসিং । ভীমসিং ! পুত্র—পুত্র !

বাণা মুচ্ছিত হইলেন

পট পরিবর্তন

## ষষ্ঠ দৃশ্য

স্থান—মোগলশিবির কাল—দ্বিপ্রহর দিবা।—সম্রাটপুত্র আকবর ও মোগল সেনাপতি তাহবর খাঁ।

আকবর। কি বল তাহবর খাঁ! এ যুদ্ধে আমরা সম্পূর্ণ পরাজিত হয়েছি?

তাহবর। সম্পূর্ণ! সে বিষয় কোনই ভুল নেই!

আকবর। কি বীবত্ব এই রাজপুত জাতির! কামানের গোলাকে বন্ধুর মত আহ্বান করে, তরবারিকে প্রেয়সীর মত আলিঙ্গন করে!

তাহবর। কিন্তু তাদের তরবারিগুলো ঠিক প্রেয়সীর মত এসে যে আমাদের আলিঙ্গন করে, তা' ঠিক ব'লতে পারি না সাহাজাদা! বরং অনেকটা বারান্দনার মত ফস্ করে' দেখতে না দেখতে কণ্ঠদেশে এত শীঘ্র এসে পড়ে যে, বেশ একটা উদ্দেশ্য টের পাওয়া যায়।

আকবর। কি জাত! সাহসী বজ্রব মত; স্বচ্ছ আকাশের মত; উদ . সমুদ্রের মত—কি জাত!

তাহবর। জাত ত বেশ! কিন্তু ঐ একটা দোষ সাহাজাদা!—ফুস'ৎ দেখ না। বড় বেশী ধাঁ করে এসে পড়ে। দেখুন সাহাজাদা, কা'ল রাতে শিবিরের মধ্যে নিশ্চিতভাবে শুয়ে রৈচি। বাইরে বিপর্যয় ঝড়বৃষ্টি! কোন ভদ্রলোক সে সময় খর থেকে বেরোয় না। এই রাজপুত জাতটা তা' মানলে না! ঐ অন্ধকার ঝড়বৃষ্টি ফুঁড়ে ধাঁ করে' আমাদের শিবিরে এসে প'ড়লো—বন্দুক, বর্ষা না নিয়ে এলে হয় ত ভাব্তাম—বুঝি তামাসা ক'চ্ছে।

আকবর। মোভানাল্লা। কি জাঁকালো রকম আক্রমণই ক'লে!

তাহবর। আর আমাদের সৈন্যগুলো কি জাঁকালো রকমই

পালানো ! সোভানাল্লা ! এমনি উল্টো দিকে দৌড়লো যে, ঐ অন্ধকারে হৌছট খেয়ে প'ড়লো না, এই আশ্চর্য্য !

আকবর । কিন্তু এ পরাজয়ের কথা শুনে পিতা কি ব'লবেন ?

তাহবর । তা' ঠিক জানি না । তবে যে সন্দেশ খেতে দেবেন না, সেটা নিশ্চিত । আমাকে ত আসবার আগে বেশ প্রাজ্ঞ বিগুদ উর্দুতে বলে' দিয়েছেন যে, আমি যদি এ যুদ্ধে হেরে আসি, ত আমাব দুই হাতে দু'গাছ লোহার বালা পরিষে দেবেন ; শাড়াই পরাবেন কি না, সেটা ঠিক করে' বলেন নি । তবে আমায় নাচ'তে হবে না বোধ হয় !

আকবর । এখন উপায় ? বাজপুতদের সঙ্গে যুদ্ধ করে' জযেব আশা ত নাই ।

তাহবর । তা' নাই । আর ও জাতেব সঙ্গে যুদ্ধ করাটায় আমার আপত্তি আছে ।

আকবর । কি ?

তাহবর । ওরা যুদ্ধ জানে না । সেদিন দেখলেন ত মেবারে ? না খেতে দিযে মারবার ফন্দি বের ক'লে ! এ কোন্ শাস্ত্রে লেখে ? তার পর এখানে যুদ্ধ হবার পূর্বে এসে আক্রমণ ক'লে !—কেউ শুনেছে ! আবে যুদ্ধ করিব ত যুদ্ধ কর ! তলোয়ার নে । দু'বার এগো, দু'বার পেছো ; দু'টো চক্র দে ; বোল ছাড় । না, ধ'া করে' এসে একধার থেকে কাটতে শুরু ক'লে ! যেন বেটারা মাথাগুলো বেওয়ারিশি হাল পেয়েছে ।

আকবর । না তাহবর খাঁ । আমি এ জাতটাকে যতই দেখছি, ততই মুগ্ধ হ'ছি ! এদের সাহায্য পেলে আমি পৃথিবী জয় ক'র্ত্তে পারি ।

তাহবর । এদের সাহায্য পেলে ত পারেন, না পেলে ত নয় ! আচ্ছা একটা ত কাজ ক'র্ত্তে পারেন !



আকবর । কি ?

তাহবর । এঃ—এ যে ভারি সোজা কাজ । এতক্ষণ ত মাথায়  
চুকিনি । বেজায় সোজা । আঃ এমন কাজ একটা হাতে রয়েছে !

আকবর । কি ? কি ?

তাহবর । এ যে যতই ভাবছি, ততই বেশী সোজা বোধ হ'চ্ছে !  
শুনুন—আপনি সম্রাট হ'তে চান ?

আকবর । কি রকম করে' ?

তাহবর । কি রকম কবে' ?—অত এগিয়ে এলে হবে না ! আগে,  
চান কিনা ?

আকবর । হাঁ চাই ।

তাহবর । সোণার টাঁদ আমার ! সম্রাট অমনি হ'লেই হ'ল !  
পড়ে' রয়েছে !

আকবর । তুমিই ত প্রস্তাব ক'লে !

তাহবর । তা' করে'ছি বটে । তবে শুনুন—এর এক খুব সোজা  
উপায় রয়েছে !

আকবর । কি ? কি ?

তাহবর । এই রাজপুত জাতি—হাঃ হাঃ হাঃ—এ যে, ভারি সোজা !

আকবর । কি রকম ? কৈ ? খুব সোজা নাকি ?

তাহবর । ভারি সোজা ! বল্ছিলেম না সাহজাদা ! যে রাজপুত  
ভারি জাত ? ধরুন তা'রা যদি গুরংজীবকে নামিয়ে আপনাকে সিংহাসনে  
চড়িয়ে দেয় । আপত্তি আছে ? আমাদের সৈন্ত আর রাজপুতসৈন্ত এই  
দুইয়ের যদি যোগ হয় ?

আকবর । আমিও ঠিক সেই কথাই ভাব্ছিলাম । সোভানাল্লা !

তাহবর । আরে শুনুন । এ বাইজির গান নয়, যে না শুনেই  
চোঁচিয়ে উঠবেন 'সোভানাল্লা !' শেষ পর্য্যন্ত শুনুন । এখন প্রশ্ন হ'তে

পারে এই যে, রাজপুতেরা আমাদের সঙ্গে যোগ দেবে কি না?—তাদের ত ঘুম হ'চ্ছে না!

আকবর। সেটা ত প্রশ্ন হতেই পারে বটে!—এঃ আবার ঘুলিয়ে দিলে!

তাহবর। তার যে অত্যন্ত সোজা উত্তর রয়েছে।

আকবর। রয়েছে না কি?

তাহবর। তার উত্তর হ'চ্ছে এই যে—কেন যে দেবে না, তা' ত বোঝা যাচ্ছে না।

আকবর। বাঃ খুব সোজা উত্তর ত!

তাহবর। বলি তা'রা দারার পক্ষ হয়ে লড়েনি? সম্রাটের পক্ষ হ'য়ে লড়েনি?

আকবর। আমিও ত ভাই ব'ল্ছিলাম।

তাহবর। কিন্তু—

আকবর। আবার কিন্তু কি—আবার সব ঘুলিয়ে দিলে!

তাহবর। কিন্তু সে বিষয়ে নিশ্চিত হওয়া দরকার। আমি বলি, একবার রাঠোর সেনাপতির সঙ্গে সেটা যুক্তি করে' দেখলেই ত বেশ পরিষ্কার বোঝা যায়।

আকবর। আমিও তাই ব'ল্ছিলাম। ব্যস্—তুমি তবে রাঠোর শিবিরে যাও।

তাহবর। সে বিষয়ে আমার একটু আপত্তি আছে। দুর্গাদাস যদি সেই সময়ে তলোয়ারখানা নাকের সামনে সেই রকম ঘোরায়—আর মাথার হাত দিয়ে মাথাটা খুঁজে না পাই?

আকবর। তা' ঘোরাবে না।

তাহবর। যদি ঘোরায়?

আকবর। তখন ব'লো—হাঁ!

তাহবর। তখন হাঁ ব'লবার ফুর্সৎ পেলাম 'কৈ! আমার মাথাটাই যদি রৈল আমার পায়ের নীচে পড়ে', তবে হাঁ বলবো কি দিয়ে!

আকবর। তবে উপায়?

তাহবর। উপায় এক—রাঠোর সেনাপতিকে এখানে ডাকা। পর্তত যদি মহম্মদের কাছে না যায়, ত মহম্মদ' ত পর্ততের কাছে আস্তে পারেন।

আকবর। বাস্—তাও ত হ'তে পারে। আমিও ত তাই—

তাহবর। তাও যখন হ'তে পারে, তবে তাই হোক না। সব গোল মিটে গেল ত? এখন আমি আসি—একটু নাসিকাধ্বনি করিগে যাই।

তাহবর অভিবাদন করিয়া চলিয়া গেলেন

আকবর। মন্দ কি! এতদ্ভিন্ন আমার সম্রাট হবার উপায় দেখি না। অন্তত আজীম জীবিত থাকতে!—উঃ কি মেঘগর্জন!

রাজিয়ার প্রবেশ

রাজিবা। বাবা, বাইরে এসো! শিল প'ড়ছে—শিল প'ড়ছে!

আকবর। তা' পড়ুক।

রাজিয়া। দেখ'সে!

হাত ধরিয়া টানিলেন

আকবর। যাঃ। তোর লজ্জা নেই। তুই বড় হইচিস্! জানিস্!  
যাঃ—

বিষন্নভাবে রাজিয়া প্রস্থান করিল

আকবর। দেখি! তীরে বসে চেউ গুণে কি হবে? বাঁপিয়ে ত পড়ি! পরে যা হয় হবে। এই রমজান—সরাব লে আও, বাইজি লে আও।—উসি তাঁবুমে।

## সপ্তম দৃশ্য

স্থান—মোগলশিবির। কাল—রাত্রি। মুকুটশোভিত আকবর সিংহাসনাকট, মস্তকে রাজচ্ক্র ও পার্শ্বে চামরধারিণীদ্বয়। সম্মুখে পারিষদবর্গ ও নর্তকীবৃন্দ।

আকবর। আমি সম্রাট্ আকবর নম্বর দোয়েম্।—কি না ?

১ম পারিষদ। হাঁ।

আকবর। আমার মাথায় রাজচ্ক্র আছে—কি না ?

২য় পারিষদ। আছে বলে' আছে !

আকবর। আমার জয়পতাকা উড়ছে কি না ?

৩য় পারিষদ। শুধু উড়ছে ! একবারে পত পত শব্দে উড়ছে।

আকবর। বাস্ ! আর কিছু চাই না, গাও।

বাজনা বাজিণ

আকবর। দাঁড়াও।—সম্রাট্ বেটা কি ক'র্ছে ব'লতে পারো ?

১ম পারিষদ। সে বেটা পালিয়েছে।

আকবর। উঃ—বেটা পালাবার ছেলে নয়। বেটা যুদ্ধ ক'র্বে। সহজে ছাড়বে ?—তা' ককক বেটা যুদ্ধ। যখন আমার পক্ষে দুগ্গোদাস আছে, আমি কাউকে ডরাই নে।—ওহে জানো বেটা দুগ্গোদাস বাবাকে—অর্থাৎ কি না দুগ্গোদাসকে বেটা বাবা ভারি ডরায।

৩য় পারিষদ। ডরায় নাকি ! হাঃ হাঃ হাঃ !

আকবর। উঃ ! সেদিন এক বেটা ছবিওয়াল শিবজি আব দুগ্গোদাসের ছবি এঁকে নিয়ে এসে বাবাকে দেখাচ্ছিল। তা' বাবা শিবজির ছবি দেখে ব'লে “এ বেটাকে সাপ্টে নিতে পারি—কিন্তু ঐ বেটা—কিনা দুগ্গোদাস—জালাবে !”

২য় পারিষদ । ছবি দুটো কি রকম এঁকেছিল ?

আকবর । শিবজিকে এঁকেছিল—গদিতে বসে আছে ; মাথায় মুকুট, কপালে তিলক । কিন্তু দুর্গগোদাস ঘোড়ার উপর চড়ে' বর্ষার আগায় ভুট্টা পোড়াচ্ছে ।

২য় পারিষদ । ও বাবা ! শুনেই আমাদের ভয় পাচ্ছে, তা' সম্রাট—

আকবর । সম্রাট কে ?

১ম পারিষদ । ( দ্বিতীয় পারিষদকে ) হাঁ, সম্রাট কে হে ?

আকবর । সম্রাট ত আমি ।

১ম পারিষদ । ভাঁহাপনাই ত সম্রাট, খোদাবন্দ !

আকবর । বাস্—তবে গাও ।

বাজনা বাজিল

আকবর । হাঁ শোন । দুর্গগোদাস কোথায় গেল ? কেউ জানো ?

৩য় পারিষদ । কৈ ! না ।

আকবর । হাঁ উদয়পুরে গিয়াছে বটে ; তবে আমার অনুমতি না নিয়ে গেল কেন ? কেন যায় ! আমি সম্রাট— সে জানে না ? কেন যায় ?

২য় পারিষদ । হাঁ কেন যায় !

আকবর । ও ! রাণা রাজসিংহের পীড়ার খবর পেয়ে গিয়েছে বটে !

আচ্ছা এবার তা'কে মারফ ক'লাম ।

২য় পারিষদ । হুজুর মা বাপ ।

আকবর । আমি সম্রাট !

১ম পারিষদ । হাঁ হুজুরই ত সম্রাট—আবার কে ?

আকবর । বাস্—তবে গাও ।

গীত

আহা কি মাধুরী বিরাজে ।

নন্দন কানন ভুবন মাঝে ॥

উঠে রূপ রঙ্গে                      তরঙ্গ ভঙ্গে

মৃত্যু বিঘূর্ণিত শত পেশোয়াজে—

মণ্ডিত মোহন বিচিত্র সাজে ।

চরণে কিঙ্কিনী,      রিনিনি রিনি রিনি,

তালে তালে উঠে—ভাজ বে তাজে

বেণু বীণা ঘন মৃদঙ্গ বাজে ।

মৃত্যুগীতের মধ্যে রাজিয়া আসিয়া দূরে একটা ত্রিপদীর উপর দক্ষিণ হস্তের কফোপি

রাখিয়া ও দক্ষিণ করতলে চিবুক রাখিয়া গান শুনিতেন

আকবর । শোভানাল্লা ! স্বর্গ যদি এই রকম হয় ত স্বর্গ বড়  
সুখের জায়গা ।

রাজিয়া । ভূপালীতে ত কাড়িমধ্যম নেই ।

আকবর । এই ! তুই এখানে কেন ?

রাজিয়া । তা' হবে মিশ্রভূপালী বাবা ! মা ডাকছেন ।

আকবর । তোর মার ঠাকুর্দার পিণ্ডি ! এই কি ডাকবার সময় ?

এঃ ! সব ঘুলিয়ে দিলে ।

পারিষদ । সব ঘুলিয়ে দিলে, জাঁহাপনা, সব ঘুলিয়ে দিলে !

আকবর । যাঃ এখন ভেতবে যা ।—তোর লজ্জা নেই । এখানে  
এসে উপস্থিত !

রাজিয়া । মা ডাকছেন ; তাঁর অসুখ বড় বেড়েছে ।

আকবর । তাহ কি ! অসুখ, ত হাকিম ডাক ! আমি কি করব !  
আমি এখন যাবো না ।

রাজিয়া । তিনি মৃত্যু-শয্যাঘ । তিনি ব'ল্লেন “রাজিয়া ! তুই তাঁকে  
গিয়ে বল যে, মর্কবার আগে তাঁর সঙ্গে একবার দেখা ক'র্তে চাই ।”

আকবর । দেখা ! দেখা করে' কি হবে—সব ঘুলিয়ে দিলে ।  
মর্কবার কি আর সময় পেল না । যাঃ—এই ! তোমরা কেউ একে ভেতরে  
রেখে এসো ।—এই ! কোন্ হায় ?

দৌবারিকের প্রবেশ

আকবর । একে ভেতরে রেখে আয় । টেনে নিয়ে যা !—দাঁড়িয়ে  
রৈলি যে !

দৌবারিক আসিয়া রাজিয়ার হাত ধরিয়া কহিল—“আমুন সাহজাদী !”  
রাজিয়া । খবর্দাব ।—বাবা ! আমি তোমার মেয়ে !—একজন  
চাকর এসে আমার হাত ধরে !

আকবর । আমাব হুকুম !

রাজিয়া । তোমার হুকুম !—বাবা !

বলিয়া অপমানে কাঁদিয়া সেখান হইতে চলিয়া গেল

আকবর । সব ঘুলিয়ে দিলে । সব ঘুলিয়ে দিলে !—এই—গাও—  
নাচো—

আবার বাজনা বাজিল

এই সময়ে তাহবর খাঁ শিবিরে প্রবেশ করিলেন

আকবর । কে ! তাহবর খাঁ ? সেনাপতি ?

তাহবর । সাহজাদা—

আকবর । এই ! সাহজাদা কি ?—বল ‘সম্রাট’—‘জাঁহাপনা’—  
এ দিকে দেখ ছো না ?—বাজুচ্ছত্র দেখাইলেন ।

তাহবর । দেখ্ছি বৈ কি !—আমি এ দিক দেখছি । সাহজাদা  
একবার এসে ওদিকটা দেখুন ।

আকবর । কেন ! ওদিকে কি হ’য়েছে ?

তাহবর । ওদিকে রাজপুতসৈন্য আপনাকে পরিত্যাগ ক’রেছে ।

আকবর । পরিত্যাগ করে’ছে ! তাহবর ! তুমি কি নেশা  
করে’ছো ?—ভাং, চণ্ডু, না তাড়ি ? পরিত্যাগ করে’ছ বল কি হে !  
তা’ কখন হ’তে পারে ?

তাহবর । শুধু হ'তে পারে না । সেই রকম ঠিক হয়েছে ।  
ঘোড়ার কিস্তি, দাবা গেল ।

আকবর । দাবা গেল কি ?

তাহবর । ঠাঁ সাহজাদা । বাজপুতদের কে বুঝিয়েছে যে সাহজাদা  
সম্রাটের সঙ্গে মিলিত হ'য়েছেন ।

আকবর । সম্রাটই বা কে আব সাহজাদাই বা কে ?—এঃ সব  
ঘুলিয়ে দিলে ।

তাহবর । সব ঘুলিয়ে দিলে সাহজাদা । বাইরে এসে দেখুন—  
বাইবে একটিও রাজপুতশিবির নেই, সব ঘুলিয়ে গিয়েছে ।

আকবর । বল কি ।—আর আমাদের সৈন্য ? ( বাস্তবকরণকে  
কহিলেন ) এই চোপ রও ।

তাহবর । সম্রাটের সঙ্গে মিলিত হ'য়েছে ।

আকবর । চক্রান্ত । চক্রান্ত । তাহবর তোমাব চক্রান্ত ।

তাহবর । যুবরাজ মদিবা বেশী খেয়েছেন, আমার চক্রান্ত । নিজের  
গর্দান দিয়ে চক্রান্ত । আপাততঃ কিস্তি সাম্ভান । ঘোড়াব কিস্তি,  
দাবা গেল ।

আকবর । আমি বুঝেছি তোমাদের চক্রান্ত । পাকুড়ো—এই কোন্  
হায ।

তাহবর । হাঃ হাঃ হাঃ হাঃ । এখন কে কাকে পাকুড়ায় সাহজাদা !  
আব আমার গর্দান নিলে আপনাব গর্দান বাঁচবে না !—একটা কথা  
শুনুন সাহজাদা ! আমি একটা উপায় ঠাউরেছি । বিকানীরের  
মহারাজের কাছে এক পত্র পেয়েছি যে, যদি এখনো সম্রাটের বশুতা  
স্বীকার কবি, ত তিনি আমাদের ক্ষমা ক'র্বেন । তাই চেষ্টা করে' দেখা  
যাক না । চলুন সম্রাটের কাছে ।

আকবর । পিতার কাছে !



তাহবর। মন্দ কি! আমার এই মাথাটার উপর যে আমার বিশেষ ভক্তি আছে তা' নয়। তবে দেখা যাক যদি টেনে-টুনে বাখতে পারি। চেষ্টা করা মন্দ নয়।

প্রস্থান

আকবর। কি রকম! রাজপুত জাত বিশ্বাসঘাতক!—তারা পরিত্যাগ কর্বে!—সব ঘুলিয়ে দিলে। এই, কে আছে?—কুছ পয়োয়া নেই—নাচো—গাও—

আবার বাজনা বাজিল

পট পরিবর্তন

## অষ্টম দৃশ্য

স্থান—আজমীরে ঔরঞ্জীবের বহিঃকক্ষ। কাল—প্রহরাধিক রাত্রি। ঔরঞ্জীব অন্ধশয়ান, সম্মুখে দিলীর খাঁ।

ঔরঞ্জীব। দিলীর খাঁ, রাজপুতশিবির হ'তে আর কোন সংবাদ পেয়েছো?

দিলীর। সংবাদের মধ্যে তাদের বজ্রনিদানসম কামানের ধ্বনি শুনেছি—তার বেশী কিছু নয়। ধ্বনি ক্রমেই নিকটতর আর স্পষ্টতর হ'চ্ছে।

ঔরঞ্জীব। উদ্দেশ্য?

দিলীর। উদ্দেশ্য বিশেষ সাধু বলে' বোধ হ'চ্ছে না।

ঔরঞ্জীব। আকবর! আকবর! আমাকে ঠেলে ফেলে তুমি সত্ৰাট হবে ঠিক করে'ছো? একদিন সত্ৰাট হ'তে। তোমার

জন্তে এত যত্ন, এত শ্রম, এত ব্যয়, সব নিষ্ফল হ'ল!—দিলীর খাঁ! আমি এ কখন ভাবিনি!

দিলীর। কেন যে ভাবেন নি, ব'লতে পারি না! আকবর বাদশাহী চালই চেলেছেন। তবে তিনি নৌজাম, নাজীম, আব কামবক্স সম্বন্ধে বাদশাহী নীতি অবলম্বন ক'রবেন কি না, তা' এখনও টেব পাওয়া যায় নি।

ঔরঞ্জীব। দিলীর। যে হত্যাকাণ্ডে ছাড়া আমরা এই সাম্রাজ্য অধিকার ক'র্তে হ'য়েছে, আমার মত নয় যে তা'র পুনরভিনয় হয়।

দিলীর। সম্রাটের মত এবই মধ্যে অনেক বদলেছে দেখছি। আজ! সম্রাট সাহজাহান যদি এসমা বর্তমান থাকতেন। তাঁর দেখেও সুখ হোত!

ঔরঞ্জীব। সাবধান হ'য়ে কথা কও, দিলীর খাঁ।

দিলীর। কি জন্ত সম্রাট? দিলীর সত্য কথা ব'লতে কখন কাবো অপেক্ষা বাখে না! সম্রাট কি ভাবেন যে, এ কথা স্বপ্নেও আকবরের মনে আসতো যদি সম্রাট তা'র পথ না দেখাতেন?—জাঁহাপনা। বন্ধু উপদেশ গুনুন! এখনও পুণ্যকার্যে সে হত্যাকাণ্ডে প্রায়শ্চিত্ত করুন। জিজিয়া কব রদ করুন। হিন্দুজাতিকে বন্ধু করুন। আব ব'লতে হবে কি—সকল সর্বনাশের মূল এই কাশ্মীরী গোগকে দূর করুন। নইলে এই অগ্নায়-পরম্পরার ফলভোগ করবার জন্ত প্রস্তুত থাকুন।

চলিয়া গেলেন

ঔরঞ্জীব। কথা সত্য। তিক্ত হ'লে কি করব? সত্য! তা'রই পুনরভিনয় হ'চ্ছে, দারা! সরল উদার ভাই দারা! ক্ষমা কোরো। আমি অগ্নায়,—ঘোবতর অগ্নায় করে'ছি বটে; কিন্তু সে এই ইস্লাম ধর্মের জন্ত।—ঈশ্বর সাক্ষী!

শ্রামসিংহের প্রবেশ

কি সংবাদ, মহারাজ?

শ্যাম । কার্য্য উদ্ধার হ'য়েছে—জাঁহাপনা, যতদূর আশা করিনি, তা' হ'য়েছে । রাজপুতরা আকবরকে প'রিত্যাগ করে'ছে ।

ঔরংজীব । কিরূপ ?

শ্যাম । তা'বা যোডা ছুটিয়ে বাজেব দিকে গিয়েছে, আমি স্বচক্ষে দেখেছি । কুমার নৃত্যগীতে ব্যস্ত থাকায়, তা লক্ষ্য ক'র্তে অবসর পান নি ! তিনি এখনো যুগ্মোচ্চেন ।

ঔরংজীব । কি বকন ?

শ্যাম । বান্দাব প'বামর্শে জাঁহাপনা আকবরকে যে পত্র লিখেছিলেন—

ঔরংজীব । কোন্ পত্র ?

শ্যাম । এই বলে' যে “কুমার আকবর যে মতলব ক'রেছেন যে, রাজপুতেবা সম্রাটকে য়েই আক্রমণ ক'র্বে, আকবর পিছন থেকে রাজপুতদেব আক্রমণ ক'র্বেন, এ মতলব অতি সুন্দর”—সে পত্রখানা আমি সেনাপতি ও ভাই সমরদাসের হাতে লিখিত বলে'ছিলাম । রাজপুতেরা সে কথা বিশ্বাস করে'ছে, আব রাজপুতের সঙ্গে আকবর যোগদান করা সম্রাটের চল, এইরূপ বুঝে তা'রা আকবরকে পরিত্যাগ করে'ছে ।

ঔরংজীব । সত্য, মহারাজ ? সে কথা রাজপুত বিশ্বাস ক'র্বে আমি ভাবি নাই । দুর্গাদাস তাৎ বিশ্বাস করে'ছে ?

শ্যাম । দুর্গাদাস সেখানে নাই ! সে রাজসিংহেব পীডার সংবাদ শুনে উদয়পুর গিয়েছে ।

ঔরংজীব । আর, তাহবব খাঁ ? তার সংবাদ ?

শ্যাম । তাহবব খাঁ বন্দী । তাকে আমি পত্র লিখেছিলাম যে— “তুমি এখনও যদি বিদ্রোহীদের পরিত্যাগ করে' তোমার অধীনস্থ সৈন্য নিয়ে এসে সম্রাটের মার্জনা শিক্ষা কর, তিনি মার্জনা ক'র্বেন ।” সেই পত্রে তিনি বিশ্বাস করে' মোগল শিবিরে এসেছিলেন । কুমার আজীম অমনি তাঁকে বন্দী ক'রেছেন ।

ঔরঞ্জীব। মহারাজ। আপনার কাছে যে আমি কি কৃতজ্ঞ রৈলাম  
তা' আব কি ব'লবো।

শ্রাম। সম্রাটের অনুগ্রহ।

ঔরঞ্জীব। ও কিসের গোলযোগ বাহিরে ?

শ্রাম। দেখি।

শান্তিতভাবে বাহিরে চলিয়া গেলেন

ঔবংজীব। এ কি। কোলাহল যে বাড়ছেই।—অস্ত্রের শব্দ। এ কি।  
বন্দুকের শব্দ।—দৌবাবিক।

রক্তাক্ত কলেবরে তাহবর প্রবেশ করিলেন

ঔরঞ্জীব। তাহবব খাঁ।

তাহবব। এই সম্রাট।—সম্রাটের প্রতি পিস্তল লক্ষ্য করিলেন,  
এমন সময় দিলীর খাঁ আসিয়া কহিলেন—“খবরদার।” তাহবব একবার  
মাত্র ফিবিয়া দেখিলেন, আবার সম্রাটের প্রতি পিস্তল লক্ষ্য করিলেন—

দিলীর খাঁর পিস্তলে ভূপতিত হইলেন

ঔবংজীব। বিশ্বাসঘাতকের শাস্তি। নেমকহাবাম ! কুকুর।

দিলীর। মবে' গিয়েছে, জাঁহাপনা। গা'লগুলো একটাও শুভে  
পেলে না।

ঔরঞ্জীব। দিলীর খাঁ। তুমি আমাব প্রাণ রক্ষা ক'রেছো।

দিলীর। জাঁহাপনা ! তার আর আশ্চর্য্য কি ? আপনার প্রাণরক্ষা  
কর্ষাব জন্তুই ত মাহিনা খাচ্ছি।

ঔবংজীব। দিলীর খাঁ ! তোমাকে চ্যুত করে' এই পাঠানকে  
সেনাপতি করে'ছিলাম।—তার এই ফল। আমাকে ক্ষমা কর দিলীর !

দিলীর। জাঁহাপনা ! আমি সামান্য ভৃত্য। আমায় ও কথা !

ঔরঞ্জীব। তুমি ভৃত্য নও। এ রাজ্যে একা তুমিই আমার বন্ধু।  
কি পুরস্কার চাও, দিলীর।

দিলীর। জাঁহাপনার জীবন রক্ষা ক'র্তে পেরেছি, এই আমার প্রচুর  
পুরস্কার। আর কিছু চাই না।

ঔরঞ্জীব। দিলীর! তুমি মহৎ।

### ৭ নবম দৃশ্য

স্থান—রাজপুত্র-শিবির। কাল—সন্ধ্যা। হুর্গাদাস, সমরদাস ও রাজপুত্র সর্দারগণ

হুর্গাদাস। বিজয়সিংহ! এবার সত্যই আমরা প্রতারিত হ'য়েছি!

সমর। তুমি এতদিনে মোগলকে চেনো নাই, হুর্গাদাস!

বিজয়। আকবর এত কুট, আমি তা' ভাবি নি!

মুকুন্দ। দেখতে বেশ সরল।

গোপীনাথ। তবে নেহাইৎ অপদার্থ। চব্বিশ ঘণ্টা নৃত্যগীত। কিন্তু  
ও রকম লোক ত খল হয় না।

সমর। গোপীনাথ! মোগলের সবই সম্ভব।—আমি জলকে বিশ্বাস  
ক'র্তে পারি, গহ্বরকে বিশ্বাস ক'র্তে পারি, সর্পকে বিশ্বাস ক'র্তে পারি,  
কিন্তু মোগলকে বিশ্বাস ক'র্তে পারি না! এ তার জাতিগত ধর্ম!  
ক'র্বে কি?

গোপীনাথ। সেনাপতি! রাণা রাজসিংহেব মৃত্যু হ'ল কিসে?

হুর্গাদাস। ঠিক জানা যায় নি। কুমার ভীমসিংহের মৃত্যুসংবাদ শুনে  
তিনি মূর্ছিত হয়েন, সে মূর্ছা আর ভাঙে নি।

দৌবারিকের প্রবেশ

দৌবারিক। (অভিবাদন করিয়া)—প্রভু! সন্ধ্যাট পুত্র আকবর  
সপরিবারে দ্বারদেশে উপস্থিত।

বিজয় । আকবর ?

দুর্গাদাস । সপরিবারে !

সমর । সাবধান ! এর মধ্যে আরো কিছু আছে । ঢুকতে দিও না ।

দুর্গাদাস । না, শুনি । বন্ধুর সঙ্গে দুই একবার দেখা না ক'লে যায় আসে না, দাদা ! কিন্তু শত্রুকে ফেরাতে নাই !

দৌবারিককে

তাঁদের সম্মানে নিয়ে এসো, দৌবারিক ।

দৌবারিক অস্থান করিল

মুকুন্দ । এর অর্থ ?

সমর । আর এক জুয়াচুরি—সাবধান দুর্গাদাস !

গোপীনাথ । এ যুদ্ধে কি বিশ্বয়ের অন্ত নাই ?

দুর্গাদাস । সকলে তাঁদের যথোচিত সম্মান দেখাবে ।

সপরিবারে আকবরের প্রবেশ

সকলে সমগ্রমে গাত্রোথান করিলেন

দুর্গাদাস । আজ আমাদের এ সম্মান কি হেতু, সাহাজাদা ?

আকবর । রাঠোর সেনাপতি ! আমি প্রতারিত হ'য়েছি !

সমর । আপনি প্রতারিত হ'য়েছেন ? না আমরা প্রতারিত হ'য়েছি ?

আকবর । হয় ত উভয়েই প্রতারিত ! রাজপুতসৈন্য আমার সহায় হ'য়ে, আমাকে সম্রাটপদে অভিষেক করে, পরে আমি যখন নিশ্চিত, যখন আমি পিতার বিদ্রোহভাজন, তখন রাজপুত আমাকে পরিত্যাগ করে'ছে ।

সমর । মিথ্যা কথা ।

রাজিয়া । সৈনিক ! পিতাকে অসম্মান করবেন না !

বলিয়া রাজিয়া বাপ্পাকুললোচনে দুর্গাদাসের দিকে চাহিলেন

দুর্গাদাস । একটু চূপ কর, দাদা ।—সাহাজাদা ! রাজপুত বিনা কারণে আপনাকে পরিত্যাগ করে নাই । রাজপুত বিশ্বাসঘাতকের

জাত নয় । সম্রাটের এই পত্রপাঠে এঁরা বোঝেন যে রাজপুত্রের সঙ্গে সন্ধি সাহজাদার ছিল ।—পড়ুন এই পত্র ।

বলিয়া আকবরের হস্তে একগানি পত্র প্রদান করিলেন

আকবর । ( পত্রপাঠান্তর ) সেনাপতি ! এ মিথ্যা !

সমর । কি মিথ্যা ? এ সম্রাটের হস্তাক্ষর নয় ?

আকবর । হাঁ, তাঁরই হস্তাক্ষর । কিন্তু এ পত্র কপট ; আমাদের বিচ্ছিন্ন কর্ণাব অভিপ্রায়ে লিখিত । এ পত্র আমার নামে বটে ; কিন্তু রাজপুত্র-সেনাপতির উদ্দেশ্যে প্রেরিত । নহিলে এ পত্র আমার হাতে না পড়ে' রাজপুত্র-সেনাপতির হাতে পড়বে কেন ? মোগলদূত কি রাজপুত্র মোগল চেনে না ? যদি এ সত্য কথাই হয়, তবে এ হেন গোপনীয় সংবাদ দূত কি যার তাব হাতে দিও ?

হুর্গাদাস । ( সকলের প্রতি চাহিলেন )—কি বল ?

সমর । আমরা শুভে চাই না । আনবা বারবাব মোগলের দ্বারা প্রতারণিত হ'য়েছি । তা'ব সঙ্গে কোন সংশয় বাখতে চাই না ।

আকবর । রাঠোরবাব ! আমাব ছ'কুল নষ্ট করে' আমাকে অতল জলে ভাসিয়ে দেবেন না । আমি আপনার আশ্রয় ভিক্ষা ক'চ্ছি ।

হুর্গাদাস । সামন্তগণের কি মত ?

বিজয় । আমি বলি মোগলের সংশয়ে না থাকাই ভালো ।

মুকুন্দ । আমাবও সেই মত ! মোগলের সঙ্গে সাক্ষাৎ একস্থানেই প্রার্থনীয়—সে সমর-ক্ষেত্রে ।

জগৎ । আমিও তাই বনি । মোগলের সঙ্গে বন্ধুত্ব কামনা করি না । আমরা যুদ্ধ ক'র্তে জানি, যুদ্ধই ক'র্ব ।

হুর্জন । সেনাপতি ! আমারও সেই মত । সাহজাদা ফিরে যান মোগলের শিবিরে—আপনার পিতার ক্ষমা প্রার্থনা করুন । তিনি নিশ্চয়ই নিজের পুত্রকে ক্ষমা ক'র্বেন ।

আকবর । তবে আপনারা আমার পিতাকে চেনেন না ।

সমর । বেশ চিনি । আর অধিক চিন্বার প্রয়োজন নাই ।—ফিরে যান, যুবরাজ !

আকবর । রাঠোরসেনাপতি ! আমি আপনার আশ্রয় ভিক্ষা করছি ।

দুর্গাদাস । সামন্তগণ ! ক্ষত্রিয়ের ধর্ম আশ্রয় দান করা ।

সমর । ক্ষত্রিয়ের ধর্ম হ'তে পারে না—সর্পকে দুধ দিয়ে পোষা ।

আকবর । আমায় বিশ্বাস করুন, আমি প্রতারিত হইছি ।

দুর্জন । সম্ভব । তথাপি এ ব্যাপারের মধ্যে না থাকাই ভালো ।

আকবর । এই কি সভার মত ? রাজপুত্রজাতি আশ্রয়দানে অসম্মত ?

সকলে নিমন্ত রহিলেন

দুর্গাদাস । সকলেই অসম্মত ?

সকলে । আমরা সকলেই অসম্মত ।

আকবর । সেনাপতি ! আমি সম্রাটের পুত্র—প্রতারিত, পরিত্যক্ত নতজানু হয়ে, পুত্রকন্যাসহ আপনার আশ্রয় ভিক্ষা করছি । ( পুত্রকন্যা-গণকে ) নতজানু হও, সাহজাদা ! নতজানু হও, সাহজাদি !

রাজিষা । ( নতজানু হইয়া সবাঙ্গনেত্রে ) দুর্গাদাস ! পিতাকে রক্ষা কর ।

দুর্গাদাস । সকলেই অসম্মত ?

সকলে । আমরা অসম্মত ।

দুর্গাদাস । উত্তম । তবে আমি একা সম্মত ।—সামন্তগণ ! দুর্গাদাস আপনাকে ক্ষত্রিয় বলে' পরিচয় দেয় । আশ্রয়প্রার্থীকে সে আশ্রয়দানে পরাঙ্মুখ হবে না ! সামন্তগণ ! ইচ্ছা হয় আমাকে পরিত্যাগ কর । আমি আশ্রিতকে পরিত্যাগ করিব না ।—চলে' আসুন, যুবরাজ ! ষতদিন দুর্গাদাস জীবিত আছে, কারো সাধ্য নাই যে, আপনার একটি কেশও স্পর্শ করে ।



## চতুর্থ অঙ্ক

### প্রথম দৃশ্য

স্থান—দিল্লীর দরবার-কক্ষ। কাল—প্রভাত। সম্রাট-পুত্র মৌজাম ও সেনাপতি দিল্লীর খাঁ দণ্ডায়মান।

দিল্লীর। তা' হ'লে দুর্গাদাস আকবরকে নিয়ে দাক্ষিণাত্যে গিয়েছেন ?

মৌজাম। হাঁ, সেনাপতি ! আকবরকে আশ্রয় দেওয়ার জন্য তাঁর সামন্তগণ তাঁকে পরিত্যাগ করে'ছে। এখন তাঁর শত্রুজীর আশ্রয় গ্রহণ করা ভিন্ন উপায় নাই।

দিল্লীর। ধন্ত, দুর্গাদাস !

মৌজাম। পাঁচ শ' মাত্র তাঁর একান্ত অনুগত সৈন্য এ দূরপ্রবাসে তাঁর সহযাত্রী হ'য়েছে। আমি সসৈন্য তাদের ঘেরাও ক'রেছিলাম। দুর্গাদাস একদিন রাত্তিকালে তাঁর পাঁচ শ' সৈন্য নিয়ে মোগল কটক ভেদ করে' চলে' গেলেন। পরে শুন্লাম দুর্গাদাস দাক্ষিণাত্যে গিয়েছেন।

দিল্লীর। ধন্ত, ধন্ত, দুর্গাদাস !

মৌজাম। সম্রাটের আজ্ঞাক্রমে কুমার আকবরকে ফিরিয়ে দেবার জন্য উৎকোচ স্বরূপ ১০০০০ স্বর্ণমুদ্রা দুর্গাদাসকে পাঠিয়েছিলাম। দুর্গাদাস সে সমস্ত আকবরকে দিয়েছেন। নিজে এক কপর্দকও গ্রহণ করেন নি।

দিল্লীর। আবার বলি—ধন্ত দুর্গাদাস !

মৌজাম । এখন মাড়বারেব সেনাপতি কে ?

দিলীর । দুর্গাদাসের ভাই সমরদাস ।

মৌজাম । আকবরের পরিবার ?

দিলীর । তাঁরই আশ্রয়ে । তাঁর বেগমের মৃত্যু হ'য়েছে । তবে সাহজাদী সমরদাসের আশ্রয়ে ।

আজীমের প্রবেশ

আজীম । সেনাপতি ! সম্রাটের ইচ্ছা রাজপুতের সঙ্গে সন্ধিস্থাপন করা । এই কথা আপনাকে জানাতে সম্রাট আমায় পাঠিয়েছেন ।

দিলীর । কি ! সন্ধি ! সত্য, সাহাজাদা ?—সম্রাট সত্যই কি সন্ধিপ্ৰার্থী ?

আজীম । হাঁ, সেনাপতি !

দিলীর । ঈশ্বর তাঁর মঙ্গল করুন ।—এখন সন্ধির প্রস্তাবটা ক'র্বে কে ? আমি না সম্রাট স্বয়ং ?

আজীম । রাজপুত ক'র্বে ।

দিলীর । রাজপুত ! তারা জয়ী হ'য়ে সন্ধির প্রস্তাব ক'র্তে আসবে ?

আজীম । পিতা ব'ল্লেন, তিনি সন্ধির প্রস্তাব ক'র্তে পারেন না । তাতে তাঁর মর্যাদার হানি হয় ।

দিলীর । অতএব তাঁর মর্যাদা রক্ষার জন্ত বিজয়ী রাজপুত সন্ধি ভিক্ষা ক'র্বে !—এ বুদ্ধি সম্রাটকে কে দিলে ?

আজীম । বিকানীরের মহারাজ শামসিংহ । তিনি ব'ল্লেন যে, সম্রাটের মর্যাদা রেখে তিনি সন্ধি স্থাপন কবিবে দেবেন ।

দিলীর । ও ! বুঝেছি । তবে সম্রাটের এ পূর্ববৎ কপট-সন্ধি ।

আজীম । সেনাপতি ! মুখ সাম্লে কথা কইবেন ।

দিলীর । হুঁ ! সাপের চেয়ে সাপের ড্যাঁপের চক্র বড় দেখছি ।—যান, কুমার আজীম ! সম্রাটকে ব'লবেন গিয়ে যে, যদি সম্রাট সত্যই

রাজপুত্রের সঙ্গে সন্ধি কর্তে চা'ন, তা'হলে আমি সম্মানকর সর্তে যা'তে  
সন্ধি হয়, তার ব্যবস্থা কর্ব। আর যদি তাঁর এ কপট-সন্ধি হয় ত,  
তাঁকে বলবেন—এর মধ্যে আমি নাই।

বলিয়া চলিয়া গেলেন

মৌজাম ও আজীম অন্তঃপুরাভিমুখীন হইলেন

মৌজাম। পিতা হঠাৎ সন্ধি কর্তে চান কেন, আজীম!

আজীম। তিনি এখন দাক্ষিণাত্যে যেতে চান। তাব জন্য পঞ্চাশ  
হাজর তাঁবু ফর্মাাইজ দিয়েছেন।

মৌজাম। দাক্ষিণাত্যে তিনি যেতে চান কি আকবরের উদ্দেশে?

আজীম। সেই রকম বুঝি।—মৌজাম! তুমি আকবরকে বন্দী  
করে' আস্তে পারো নি—এতে পিতা অত্যন্ত ক্রুদ্ধ হয়েছেন। এমন কি  
তিনি সন্দেহ করেন যে, তুমি ইচ্ছা করে' তাকে পালাতে দিয়েছো।

মৌজাম। সে কথা সম্পূর্ণ মিথ্যা নয়, আজীম! পিতার ক্রোধের  
অগ্নিকুণ্ডে আমার অবোধ সরল দুর্বল ভাইকে আমি প্রাণ ধরে' ফেলে  
দিতে পারি না। তার চেয়ে আকবর দুর্গাদাসের আশ্রয়ে নিরাপদে  
আছে।

আজীম। পিতার ইচ্ছার বিরুদ্ধে তবে তুমি জেনে শুনে কাজ করে'ছো,  
মৌজাম?

মৌজাম। হাঁ, আজীম! পিতা পিতা বটে, কিন্তু ভাইও ভাই।

প্রহান

## দ্বিতীয় দৃশ্য

স্থান—যোধপুরের আমাধ-কক্ষ । কাল—প্রভাত । পটবসনপরিহিতা

মহারানী মহামায়া একাকিনী

রানী । আমার কাজ শেষ হ'য়েছে । আমার মৃত স্বামীর রাজ্য পুনরুদ্ধার হ'য়েছে । মাড়বার হ'তে মোগল দূরীভূত হ'য়েছে । যাক, কাজ শেষ হ'য়েছে । আজ সতীধর্ম প্রতিপালন ক'রব । আজ স্বামীর অনুগমন ক'রব ! আজ জলন্ত চিন্তায় দেহ বিসর্জন দেব ! আজ পুড়ে ম'রব । ( জামু পাতিয়া ) প্রভু ! স্বামী ! বল্লভ ! এক দিন তুমি যুদ্ধে হেরে এলে, আমি অভিমানে দুর্গদ্বার রুদ্ধ করে'ছিলাম ; যুদ্ধক্ষেত্রে তোমার মৃত্যু কামনা করে'ছিলাম ! দেখ, নাথ ! আমরা তোমাদের যেমন দেশের জন্য ম'র্তে বলি, আমরাও তেমনি তোমাদের জন্য হস্ত মুখে ম'র্তে পারি ।

“বনে ঠনে কাঁহা চলি, বনে ঠনে”—গাহিতে গাহিতে রাজিয়ার প্রবেশ

রাজিয়া । রানি ! আপনি এ কি ক'চ্ছেন ?

রানী । আমি যাচ্ছি, রাজিয়া !

রাজিয়া । সে কি ! কোথায় ?

রানী । ( উর্দ্ধে অঙ্গুলি নির্দেশ করিয়া ) ঐখানে—যেখানে আমার স্বামী এত দিন ধরে' আমার অপেক্ষা ক'চ্ছেন ।

রাজিয়া । আপনার স্বামী অপেক্ষা ক'চ্ছেন !—ঐখানে ? কৈ ? আমি ত দেখতে পাচ্ছি না !

রানী । সে কি অপরে দেখতে পায়, মা !

রাজিয়া । আপনি দেখতে পাচ্ছেন ?

রানী । পাচ্ছি বৈ কি, রাজিয়া !

রাজিয়া। আমি বিশ্বাস করি না। আমি দেখতে পেলাম না আর আপনি দেখলেন? হ'তেই পারে না।

রাণী। সরলা! ঔরঞ্জীবের বংশে তোমার জন্ম!

রাজিয়া। রাজকুমারকে কার কাছে রেখে যাচ্ছেন?

রাণী। তোমাদের কাছে।

রাজিয়া। আমি ঠুকে দেখতে পারি না। আমার দাঘ পড়ে'ছে। আপনার ছেলেকে আপনি ছেড়ে যাবেন—আমরা দেখবো? কখন দেখবো না।

রাণী। আমায় যে যেতে হবে, রাজিয়া—আমার স্বামী ডাকছেন।

রাজিয়া। আপনার ছেলের চেয়ে আপনার স্বামী বড় হ'ল?

রাণী। সেই আমাদের ধর্ম—সাহজাদী! পতিই সতীর সর্বস্ব, পতিই সতীর সব। এত দিন কাজ বাকি ছিল, তাই তাঁকে ছেড়ে ছিলাম। এখন আমার এখানকার কাজ শেষ হ'য়েছে। আমি তাঁর কাছে যাই।

রাজিয়া। কাজ শেষ হ'য়েছে কি? কাজ কখন শেষ হয়?—না, আপনার ত আমি দেখছি কোন মতেই যাওয়া হ'চ্ছে না।

রাণী। সে কি, মা?

সমরদাস প্রবেশ করিলেন

রাজিয়া। সে কি আবার! তা' কখন হয়? এ ত হ'তে পারে না।—এই যে সেনাপতি! কি বলেন, সেনাপতি, এ কখন হয়?—ও সেনাপতি!

রাণী। কেন হ'তে পারে না, রাজিয়া?

রাজিয়া। কেন যে হ'তে পারে না, তা' জানি না। তবে এটা যে হ'তে পারে না, তা' বেশ বুঝতে পাচ্ছি।—সেনাপতি! আপনি বলুন, এ হ'তে পারে?

রাণী। বেশ হ'তে পারে, মা! বিদায় দাও—যাই। অজিত কোথায় সমর?

সমর। ভিতরে। কাঁদছে!—তাকে বোঝাতে পারলাম না, মা! আর কি ব'লেই বা বোঝাব?

রাণী। সে কি বলে?

সমর। বলে “আমি মাকে যেতে দেবো না।”

রাণী। তাকে নিয়ে এস, সমর!

সমরদাস চলিয়া গেলেন

রাণী। ভগবান্! আমার সতীধর্ম রক্ষা কর্তে হৃদয়ে বল দাও। সকলের চেয়ে কঠিন কাজ এই—ছেলে ছেড়ে যাওয়া। ( বক্ষে হাত দিয়া ) ভগবান্!

অজিতকে লইয়া সমরদাস পুনঃ প্রবেশ করিলেন। সঙ্গে কাশিম

রাণী। এই যে!—বাছা অজিত!—বাবা!—আমি যাচ্ছি। বিদায় দাও, বাবা!

অজিত। মা! তুমি যাচ্ছে—আমাকে ছেড়ে তুমি কোথায় যাচ্ছে, মা?

রাণী। যেখানে সকলেই একদিন যায়। তবে দু'দিন আগে আর দু'দিন পিছে। অজিত! বিদায় দাও, বাপ!

অজিত। বিদায় দেবো! বিদায় দেবো! ( কম্পিতস্বরে ) মা—

রাণী। কারো মা চিরকাল থাকে না, অজিত।

অজিত। কাবো মা নিজে ইচ্ছে কবে' সন্তানকে ছেড়ে যায় না, মা!

রাণী। কিন্তু এই যে আমার সতীধর্ম, অজিত!

রাজিয়া। কিন্তু এই কি তোমার মাতৃধর্ম, রাণি?

রাণী। ছিঃ অজিত! কেঁদো না। আমায় যেতেই হবে।

অজিত । যদি যেতেই হবে ত যাও । যেতে যাও, আমায় ছেড়ে যেতে পারো—যাও ! আমি বাধা দেব না ।

রাণী । আমায় প্রসন্ন মনে বিদায় দাও, বাবা !

অজিত । আমি বিদায় দেব না ।

রাণী । সমব বুদ্ধিতে বল ।

সমব । অজিত ! তোমার মায়ের এই সতীধর্ম ! এ ধর্মে বাধা দেওয়া তোমার কর্তব্য নয় ।

বাঁজিয়া । ধর্ম ! সেনাপতি !—ছেলে মেয়ে ছেড়ে, তাদের পরের হাতে সঁপে দিয়ে চলে' যাওয়া ধর্ম হ'ল !—একে তুমি ধর্ম বল ?

সমব । ধর্ম আমরা বিচার ক'র্তে বসিনি, সাহজাদি ! অনুষ্ঠান ক'র্তে বসেছি । তার কাছে মাথা হেঁট কবাই আমাদের শোভা পায় । যারা এ ধর্ম করে' গেছেন, তাঁরা আমাদের চেয়ে অনেক বড় ।

অজিত । তবু মা আমাকে ছেড়ে যাবেন—( কল্পিতস্ববে ) এ তোমার বেশ লাগছে ? উচিত বোধ হ'চ্ছে ? কষ্ট হচ্ছে না ?

সমব । কষ্ট হ'চ্ছে না ? ( কল্পিতস্ববে ) অজিত ! তিনি কি তোমাবই মা, আমার মা ন'ন ? সমস্ত মাড়বারেব মা ন'ন ? তবু তাঁকে ছেড়ে দিতে হয় অজিত ! ( পুনরাধ কতক প্রকৃতিস্থ হইয়া ) এ প্রতিমা বিসর্জন দেওয়া ! এ মেয়েকে গুণ্ডরবাড়ী পাঠানো । কষ্ট হ'চ্ছে বলে' কি নিষ্ঠা ভঙ্গ হবে ?

অজিত । আমি ওসব বুঝি না । আমি আমার মাকে ছেড়ে দেবো না ।

মহারাণী । নরপায় ভাবিয়া সমরদাসের পানে চাহিলেন

সমব । অজিত ! তুমি ক্ষত্রিয়কুমার—তোমার কি এই ক্রন্দন, এষ্ট অন্তায় আবদার শোভা পায় ? তোমাব বয়সেই বীরবর বাদল চিতোরের জন্ত, কর্তব্যের জন্ত, সমরে প্রাণপণ ক'রেছিল ! আর তুমি

শিশুর মত, নারীর মত ক্রন্দন কর্তে ব'স্লে!—ছিঃ! মাকে প্রণাম  
কর অজিত!

অজিত নীরবে প্রণাম করিলেন

রাজিয়া। আহা! বেচারী।

সমর। এখন যাও।

রাণী। কাশিম। এই আমাব সর্বস্বধন পুত্রটিকে দেখো।

কাশিমের সহিত অজিত নীরবে প্রস্থান করিলেন

রাজিয়া। উহঃ। ঠিক হ'চ্ছে না। তুল কোন্ জাঘগাঘ বুঝতে  
পাচ্ছি না বটে, তবে এটা যে ঠিক হ'চ্ছে না তা' বেশ বুঝেছি। যাই,  
বেচারীকে বোঝাই গে।

রাণী। ভগবান্, ভগবান্। এবই জন্মেই কি নারীজাতিকে তৈয়ের  
করে'ছিলে? তাকে বুকভরা স্নেহ দিযে'ছিলে—তাকে জর্জ্বিত কর'ব  
জন্ম? (মস্তক অবনত কবিয়া) তবে যাই, সমর—কথা ক'চ্ছ না যে?

সমর। যাও, মা। হিন্দু হয়ে কি রকম কবে' বলি যে, স্বামীর  
অনুগমন ক'রো না? যাও, মা।

প্রণাম করিলেন

রাণী। দুর্গাদাসকে বোলো, আমাব আশীর্বাদ দিও।

সমরদাস ধীরে ধীরে আধাবদনে বিপরীত দিকে চলিয়া গেলেন।

### দৃশ্যান্তর

অলস্ত চিত্ত। মহারাণী ও কুলনারীগণ। নারীগণের গীত

যাও সতি, পতি কাছে—

পতি বিনা সতীর কি গতি আছে, মা।

পৃথিবীর যত দুঃখ শোক দেহসনে পুড়ে ভস্ম হোক,

—যাও মা, অক্ষয় স্বর্গলোক মাঝে, মা।

পতি বিনা সতীর গতি কি আছে, মা।



দেখ ঐ গগনে দেবগণ করে সবে পুষ্প বরিষণ ;

ঐ শুন জয় ভেরী ঘন বাজে, মা !

পতি বিনা সতীর গতি কি আছে, মা ।

বাঁদী সেই অগ্নিতে ঝাঁপাইয়া পড়িলেন । নারীগণ গাহিতে গাহিতে প্রস্থান করিলেন

“যাও সতি পতি কাছে”—ইত্যাদি ।

### তৃতীয় দৃশ্য

স্থান—আজমীরে মোগল প্রাসাদ-কক্ষ । কাল—প্রভাত । ঔরংজীব ও দিলীর খাঁ

দিলীর । জাঁহাপনা ! রাজপুতজাতি সঙ্গ সন্ধি করেছি । ঝাঠোর সমরদাসকে সন্ধিতে সম্মত করা কঠিন হয়েছিল ; তিনি ব'ল্লেন—এ কপট-সন্ধি ।

ঔরংজীব । কি রকমে শেষে তাকে সম্মত ক'রলে, দিলীর খাঁ ?

দিলীর । আমি নিজের পুত্রদ্বয়কে আমাদের প্রতিভূস্বরূপ রাখায় তিনি স্বীকৃত হ'লেন ।

ঔরংজীব । কি সর্তে সন্ধি হ'ল ?

দিলীর । যে—চিতোর আর তার অধীনস্থ জনপদ রাজপুতকে ফিরিয়ে দেওয়া যাবে ; হিন্দুর দেবমন্দিরাদি সব ভবিষ্যতে অক্ষুণ্ণ থাকবে । যোধপুরের রাজাকে তাঁর রাজ্য ফিরিয়ে দেওয়া যাবে ; আর বাণা সসৈন্তে সম্রাটের পূর্ববৎ সাহায্য ক'র্বেন ।

ঔরংজীব । বাণা সসৈন্তে সম্রাটের সাহায্য ক'র্বেন ? বাণা জয়সিংহ তা'তে স্বীকৃত হ'য়েছেন ?

দিলীর । সম্পূর্ণ স্বীকৃত ! তাঁর এ সন্ধিস্থাপনে সকলের চেয়ে

আগ্রহ বেশী ! সমরদাস তাঁকে “ভীকু ! রাজপুত্র-কুলাঙ্গার ! জৈন !” বলে’ প্রথমে ত সভা পরিত্যাগ ক’বেই চলে’ যান। অমনি মোগল সামন্তরা রাণাকে টিটকারী দিতে লাগলেন। রাণা অধোবদনে রইলেন।

ঔরংজীব। পরে ?

দিলীর। পুনর্বার আর এক সভা হয়। তা’তে নূতন সর্তে সন্ধিপত্র নূতন ক’রে লেখা হ’ল ! সমরদাস বলে উঠলেন, “মোগলকে বিশ্বাস কি ?” পরে আমি নিজের পুত্রদ্বয়কে মোগলের প্রতিভূ রাখায় তাঁকে বহুকষ্টে স্বীকৃত করা গেল !

ঔরংজীব। তুমি নিজের পুত্রদ্বয় রেখে এসেছো ?

দিলীর। হাঁ, জাঁহাপনা।

ঔরংজীব। দিলীর ! তুমি অতি মহৎ—আমি এ সন্ধি পালন ক’রব।

দিলীর। সম্রাটের জয় হোক।

শ্যামসিংহের প্রবেশ

শ্যাম। রাজাধিরাজ বাদশাহ ঔরংজীবের জয় হোক !

ঔরংজীব। কি সংবাদ, মহারাজ !

শ্যাম। কার্য উদ্ধার হ’য়েছে, খোদাবন্দ। আশাতীত রকম উদ্ধার হ’য়েছে। সাম্রাজ্য নিষ্কণ্টক।

ঔরংজীব। কিরূপ ?

শ্যাম। সন্ধির পর কতিপয় ব্রাহ্মণ দিয়ে উদ্ধৃত সমরদাসকে হত্যা করিয়েছি।

দিলীর। কি ? তাঁকে হত্যা করিয়েছো, মহারাজ ! সত্য কথা ?

শ্যাম। হাঁ, সত্য কথা !

দিলীর। তুমি তাঁকে হত্যা করিয়েছো ?

শ্যাম। হাঁ, সেনাপতি !

দিলীব। সন্ধ্যাট সন্ধ্যা কর্কেন ( শ্যামসিংহের গলদেশে হস্ত দিয়া ধরিয়া ) পানর ! পাষণ্ড ! রাজপুত-কুমারাব !—তোমাকে আজ আমি হত্যা কর্ব।

শ্যামসিংহ কাতরভাবে সন্ধ্যাটের প্রতি চাহিয়া কহিলেন—

শ্যাম। জাঁহাপনা।

ঔরঞ্জীব। ক্ষণ হও দিলীব—ও নিতান্ত ক্ষুদ্র জীব। মশা মেরে হাত কালো করো না, দিলীব !

দিলীব। সত্য কথা। তোমাকে মেবে এ হাত কালো কর্ব না। হেয়, কাপুরুষ, নবকেব ঘৃণ্য—কীট। তোমায দেখলে পাপ ! তোমাকে হস্তে স্পর্শ করা একটা মহাপাতক ! দুব হও এই বলিয়া তাহাকে ধাক্কা দিয়া দূর করিয়া সন্ধ্যাটকে কহিলেন—“হাত ধুগে আসি, সন্ধ্যাট্ !”

এই বলিয়া চলিয়া গেলেন

ঔরঞ্জীব। দিলীব খাঁ। আমার ঙ্গ তুমি নিজের পুত্রবধ হারালে। কিন্তু আমার উদ্দেশ্য সাধু ছিল। এর জন্ত আমি দাবী নই, বন্ধু। এ হত্যা আমার পবামর্শে হব নাই ! এত নীচাশয় আমি নই।

মৌজামের প্রবেশ

মৌজাম। পিতা ডেকেছেন ?

ঔরঞ্জীব। হাঁ, মৌজাম। দক্ষিণাত্য যাবার জন্ত সমগ্র মোগল সৈন্যকে প্রস্তুত হ'তে আজ্ঞা দাও। তুমিও প্রস্তুত হও।

মৌজাম। যে আজ্ঞা।

উভয়ে নিষ্ক্রান্ত ]

## চতুর্থ দৃশ্য

স্থান—দাক্ষিণাত্যে পালিগড় দুর্গ। কাল রাত্রি। মারাঠা-অধিপতি

শম্ভুজী, দুর্গাদাস ও আকবর আসীন

শম্ভুজী। দুর্গাদাস, তুমি অসমসাহসিকের কাজ করে'ছো! ৫০০  
মাত্র রাজপুত্র ঘোড়সোযার নিয়ে যোধপুর থেকে পালিগড়ে এসেছো!

আকবর। আগবা এসেছি অনেক দিন। এত দিন মহারাজের দর্শন  
পাই নি।

শম্ভুজী। সাহজাদা! আমি বিশেষ বাজকাজে ব্যস্ত ছিলাম।  
তাই বিলম্ব হয়ে গিয়েছে। মাফ ক'রবেন, সাহজাদা! অভ্যর্থনার কোন  
ক্রটি হয় নি?

আকবর। না। মহাবাজের সামন্তরা আমাকে যথাযথ সমাদর  
করে'ছেন। কোন ক্রটি হয় নি।

শম্ভুজী। সাহজাদার পরিবার?

দুর্গাদাস। নাড়বাড়ের মহাবাণীর কাছে তাদের রেখে আসতে  
হ'য়েছে। তাদের প্রতি সন্ত্রাটের আক্রোশ নাই। শুক সাহজাদাকে,  
মহারাজ, আশ্রয় দান ককন।

শম্ভুজী। আপনাব আর কোন চিন্তা নাই, সাহজাদা! আপনি  
এমন মনে ক'র্তে পাবেন যে, আপন লৌহদুর্গ আছেন!—দুর্গাদাস,  
তোমরা একে সন্ত্রাট করে'ছিলে না?

দুর্গাদাস। করে'ছিলাম, মহারাজ।

শম্ভুজী। বাস্! আকবরসাহ! আমরা মারাঠাজাতিও আপনাকে  
সন্ত্রাট বলে' মানি।

আকবর। আমার ভাই মৌজাম সসৈন্তে আমার বিপক্ষে এসেছেন।

দুর্গাদাস। কুমার আজীমও সসৈন্তে আমেদনগরে এসেছেন।

শম্ভুজী । কোন ভয় নাই, সাহজাদা ! আমি বহরমপুরে গিয়ে নিজে আপনাকে সত্রাট বলে' অভিযেক ক'র্ব্ব ।

[ শম্ভুজীর দুই সৈন্যাদ্যক্ষ শাম্ভুজী ও কেশবের প্রবেশ

শাম্ভুজী । জিজিয়া দুর্গেব পতন হ'য়েছে মহারাজ !

শম্ভুজী । উত্তম ! সন্তুষ্ট হ'লাম ।

কেশব । মহারাজ ! কর্ণেস কেরি আর ফাউনাও মহারাজের সাক্ষাৎ প্রার্থী । এখানে নিয়ে আসবো কি ?

শম্ভুজী । আনো না—ক্ষতি কি !

শাম্ভুজী ও কেশবের প্রস্থান

শম্ভুজী । বিশ্বাস নেই, সাহজাদা—রাজার বাজকার্য্য সঙ্গে সঙ্গে ফেরে । এই জিজিয়া দুর্গ ইংরাজেবা মাসাধিক হ'ল তৈয়ের করে'ছিল । তা' ভূমিসাৎ হ'ল দেখলেন !—দুর্গাদাস ! বাজপুতেবা যুদ্ধ ক'র্ভে জানে ।

দুর্গাদাস । তাবা দেশেব জন্তু প্রাণ দিতে জানে ।

শম্ভুজী । কিন্তু রাজপুত জাতি ত বার বার যবনের পদ-দলিত হ'য়েছে ।

দুর্গাদাস । হ'য়েছে সত্য ! কিন্তু মনে করে' দেখুন, মহারাজ ! সমস্ত আৰ্য্যাবর্ভে রাজস্থান বেণুকার মত ! তবু সমস্ত আৰ্য্যাবর্ভে একা রাজপুতই এই তিন শ' বছর মাথা উঁচু করে' আছে ।

শম্ভুজী । আর মারাঠা মাথা উঁচু করে' নেই—মাথা তৈয়ের ক'র্ছে—কার ক্ষমতা অধিক, দুর্গাদাস !

দুর্গাদাস । মহারাজ ! আমি মারাঠা হীন বলি নাই ; শুদ্ধ রাজপুত অসার নয়, তাই ব'ল্ছিলাম । আমার এখানে অসার প্রধান উদ্দেশ্য, মহারাজ, এই সাহজাদাকে নিরাপদ করা ।

শম্ভুজী । আচ্ছা, এসেছো—দেখে যাও মারাঠা যুদ্ধ করে কেমন ! দেশে গিয়ে গল্প ক'র্ব্বার একটা বিষয় পাবে ।

দুর্গাদাস । ( স্বগত ) এত দস্ত্র যাব, তার পতন অবশ্যস্তাবী ।

কেরি ও ফাউনাওর সহিত কেশবের প্রবেশ

শম্ভুজী । কেরি সাহেব ! তোমাদের জিজ্ঞাসা দুর্গেব অবস্থা দেখলে ?  
কেরি । হাঁ রাজা !

শম্ভুজী । ঐ অবস্থা তোমাদের বশে উপনিবেশেব হবে, যদি আমাব  
বিপক্ষ-জাহাজ তোমাদের বন্দবে আশ্রয় দাও ! আব এলিক্যাণ্টায় মারাঠা  
দুর্গ নিৰ্ম্মাণ ক'ৰ্ব ।

কেরি । রাজা—

শম্ভুজী । কোন কথা শুনে চাই না । যাও—আব পোর্টুগীজ সর্দার  
সাহেব ! তোমরা আমাব বারণ শুনলে না । তোমাদের আস্থিদ্বীপ দখল  
ক'ৰ্ত্তে জাহাজ পাঠাইছি ! দেখি তোমাদের গোরাব বাণিজ্য কিসে চলে ?  
এখনো সাবধান—যাও ।

কেরি ও ফাউনাও কুনিশ করিয়া প্রস্থান করিলেন ।

শম্ভুজী । এই ফিরিঙ্গিগুলোকে আমি একটু ভয় করি, দুর্গাদাস ।  
—কাবলেস্ থাঁ !

নেপথ্যে । হুজুব ।

শম্ভুজী ! সরাব আওর আওবৎ—

নেপথ্যে । যো হুকুম মহাবাজ !

শম্ভুজী । এই ফিরিঙ্গিগুলো বড্ড সোজা বন্দুক আওয়াজ করে ।  
আর কখন ছত্রভঙ্গ হয় না । একটা সৈন্যদল যুদ্ধ করে যেন একটা প্রাণী !  
এক গতি, এক লক্ষ্য, একদিকে মুখ ! ভারি জমাট !

সরাব হস্তে কাবলেস্ থাঁর প্রবেশ

শম্ভুজী । (সরাব লইয়া আকবব ও দুর্গাদাসকে দিয়া) নেও, দুর্গাদাস !

দুর্গাদাস । মাফ করবেন মহারাজ !

শত্ৰুজী । সে কি বল ? সরাব খাও না নেগাইৎ—( অপদার্থের সঙ্কেত করিলেন ) সাহজাদা—

আকবর । মন্দ কি !

শত্ৰুজী । এই ত ! তুমি সম্রাট হবার উপযুক্ত বটে । আমি তোমায় সম্রাট কর্ব ।

কাব্লেস্ । আওরৎ ?

শত্ৰুজী । আলবৎ—আভি—হিঁয়া—

দুর্গাদাস । তবে আমি যাই । একটু বিশ্রাম করিগে যাই ।

শত্ৰুজী । কেন, তোমার সতীত্ব নষ্ট হবে ? আচ্ছা যাও ।

দুর্গাদাস । ( উঠিতে উঠিতে ভাবিলেন ) এতদূর অসার !

নতকীগণের প্রবেশ

শত্ৰুজী । এই যে ! গাও, নাচো সাহজাদা ! মুসলমান জাতটা কি সম্ভোগ বেশ জানে ?

আকবর । ( সুরা পান করিতে করিতে ) সুরাপান কিন্তু তার ধর্ম্য নিষদ্ধ ।

শত্ৰুজী । বটে ! তবে সে ধর্ম্য আমার জন্তে নয় । এমন সুন্দর জর্নিস আছে ! কেমন শুভ্র, শান্ত, স্থিৰ ! কিন্তু ভেতরে গেলেই সংসারটাকে রঙিন্ করে' তোলে—হাঃ হাঃ হাঃ !—সুরা আর রমণী—গাও ।

দুর্গাদাস । ( যাইতে যাইতে স্বগত ) এই সুরা আর এই রমণীই তোমার সর্বনাশ কর্বে, শত্ৰুজী !

বলিয়া চলিয়া গেলেন

শত্ৰুজী । দুর্গাদাস কি রকম কবে' আমার পানে চাইলে, দেখলে আকবর ? উনি সতীত্ব দেখাচ্ছেন ! ভণ্ড !

আকবর । গাও

শত্ৰুজী । হাঁ, গাও—নাচো—কিসের জন্ত যুদ্ধ করে' মরি, সাহজাদা ?

যদি জীবনটা ভোগ না ক'লাম—গাও একটা সাহজাদার আবাহন-গীতি  
গাও—ইনি ভারতসম্রাটের পুত্র আকবরসাহ—

### নৃত্যগীত

যদি এসেছো এসেছো দয়া করি বঁধুছে—

কুটীরে আমারি ,

আমি কি দিয়ে তুষিব ভূষিব তোমারে

—বুঝিতে না পারি ।

আমি যাব কি ও হৃদি পর ছুটিয়া ?

আমি পড়িব কি পদতলে গাটিয়া ?

হাসিব, সাধিব, ঢালিব চরণে

—নয়নের বারি ?

যদি পেয়েছি তোমায় কুটীরে আমার আশায় অতীত গণি ;

আজি আধারে, পথের ধুলার মাঝারে, কুড়ায়ে পেয়েছি মণি ;

যদি এসেছ দিব হৃদয়সন পাতি ;

দিব গলে নিতি তব প্রেম-হার গাঁথি ,

রহিব পড়িয়া দিবস রাত্তি হে

—চরণে তোমারি ।

### পঞ্চম দৃশ্য

হান—রাণা জয়সিংহের অন্তঃপুর । কাল—সায়ান্ন । জয়সিংহ ও তাঁহার ধাত্রী  
মুখোমুখী দাঁড়াইয়া ছিলেন ।

জয় । কি ! কমলা আমায় না বলে' চলে' গিয়েছে ?

ধাত্রী । গিয়েছে ত গিয়েছে ! হয়েছে কি ? আপদ্ দূর হ'য়েছে ।

জয় । বড়রানী কোথায় ?



ধাত্রী । সে ঘরের লক্ষ্মী ঘরে আছে ।

জয় । তাঁকে ডাকো ত । নিশ্চয় তাঁর সঙ্গে ঝগড়া করে' চলে' গিয়েছে ।

ধাত্রী । না গো না ! তার মুখে বা-টি নাই । সে মাটির মানুষ ! ছোটরাণীই তাকে মাঝে মাঝে এনি মুখঝামটা দেয় । বাপ—যেন তাড়কা রাঙ্গসী ! ছোটরাণীর মুখ ত নয় যেন তুবড়ি ! আবার যখন মান করেন—তখন তোলো—( দে-বাইন ) সুন্দর বিচ্ছবি অমন আমি কখন দেখি নি বাপু !

জয় । চোপ । মুখ সামলে কথা ব'লিস্ !

ধাত্রী । ওরে বাবা ! যেন কুস্তকর্ণ । খেতে এলো ! কেন ? ভয় কিসের ? তুই ছোটরাণী বলে' অজ্ঞান, মুই ত অজ্ঞান নই ! আর সে গোব ইষ্টিদেবতাও নয় যে, মুই তোব মত রাজ্য ভুলে তার জপে বোসবো !

জয় । ণাথ, তুই আশায মানুষ কবে'ছিস্ বলে' অনেক সহ্য করি । বেশী জালাস্ নে—যা, বড়রাণীকে ডেকে দে !

ধাত্রী । ডেকে দেবো না ! নিজে যাও না তাব ঘরে ! সে ত আর মোর মত তোমার কেনা দাসীটি নয়, আর তোমাব ঘবে খেটে খেতেও আসে নি—সেও রাজরাজড়া-ঘবেব মেয়ে ।

জয় । তুই মাঝি নে ?

ধাত্রী । ঈঃ—? চোখরাঙানী দেখ—যেন দুর্কস্ মুনি ! মার্কী নাকি ? তার আর আশ্চর্য্যই বা কি ! ণাশকে মোছলমানের হাতে সঁপে দিবে, বাড়ী এসে ধাইমাগীর উপব রাখ ! নজ্জাও নেই !

জয় । সবাই নিন্দে ক'চ্ছে মানি, কিন্তু ধাইমা তুইও—আমার প্রাণ যে কি ক'চ্ছে তুই জান্‌বি কি ?

ধাত্রী । জান্‌তে বাকিই বা আছে কি ?—যাহু করে'ছে গো—যাহু

করে'ছে। পেত্নী হ'য়ে ঘাড়ে চেপেছে! নৈলে ছেলি ভালো!—আচ্ছা, যাচ্ছি। বড়রানীকে ডেকে দিচ্ছি। কিন্তু তাকে যদি কক্ষি কৈবি, ত এই ঝটি তোর ঘাড়ে বসিবে দেবো; তা' মানুষ করে' থাকি আর যাই করে' থাকি—সতীলক্ষ্মীর অপমান সৈবো না।

প্রস্থান

জয়। যাছই করে'ছে। আমাকে তন্নয় করে'ছে! আর কিছুই ভালো লাগে না। সে এই নগর ছেড়ে চলে' গিয়েছে—সংসার শূন্য দেখ্ছি। চক্ষু অন্ধকার দেখ্ছি!

ধীরে ধীরে সরস্বতী প্রবেশ করিলেন

সরস্বতী। আমায় ডাক্ছিলে?

জয়। হাঁ—ছোটরানী কোথায় জানো?

সরস্বতী। না।

জয়। তোমায় কিছু বলে' যায় নি?

সরস্বতী। না!

জয়। তোমার সঙ্গে ( মস্তক নীচু করিয়া ) কোন বচসা হয় নি?

সরস্বতী। না।

জয়সিংহ কিয়ৎকাল নীরব রহিলেন। পরে কহিলেন—“এই কথা আমায় বিশ্বাস ক'র্তে বল, সরস্বতী?”

সরস্বতী। বিশ্বাস কর না কর, তোমার হাত! আমাকে জিজ্ঞাসা ক'র্লে, তাই ব'ললাম।

জয়। এর কারণ জানো কিছু?

সরস্বতী। না, ঠিক জানি না।

জয়। অনুমান ক'রেছো?

সরস্বতী। ক'রেছি।

জয়। কি অনুমান ক'রেছো?

সরস্বতী । ব'লতে পারি না ।

জয় । ব'লতে পারি না ? না, ব'লবে না ।

সরস্বতী । ভালো ! তবে তাই ! আমি ব'লবো না ।

জয় । সরস্বতী ! এই তোমার পতিভক্তি ! সে যা'ই হোক, আমার কথা শোন । আমি তার জন্তে দেশত্যাগী হ'তে হয় হব—তা' জানো বোধ হয় ?

সরস্বতী । বিশেষ জানি । দেশকে ত মুসলমানের পায়ে বিকিয়ে এসেছো ! তা'কে ছাড়বে—তা'র আর আশ্চর্য্য কি ?

জয় । দেশকে আমি বিকিয়ে আসি নি । সন্ধি করে'ছি !

সরস্বতী । একি সন্ধি বল, রাণা ? মুসলমান জাত পাঁচ শ' বছর ধবে' দেশ, জাতি, ধর্ম্মকে পীড়ন ক'লে । সেই মুসলমান জাতকে মাড়বার বীর সমরে পরাস্ত করে'ছিল—তার সঙ্গে এই সন্ধি !—তুমি রাণাপদের অবমাননা কবে'ছো ।

জয় । কা'র জন্ত করে'ছি—নিজেব জন্ত না জাতির জন্ত ?

সরস্বতী । ছোটবাণীর জন্ত !—তোমাব আর কিছু জিজ্ঞাসা করবার আছে ?

জয় । না ।

সরস্বতী । উত্তম—তবে আমি যাই ?

জয় । যাও—আমিও যাই !

সরস্বতী । যেরূপ অভিরূচি !—শোন নাথ, এক কথা বলে' যাই—যেখানে যাবে যাও । কিন্তু শান্তি পাবে না । যে উদ্যম প্রবৃত্তিভরে আজ আমাকে ছেড়ে, পুত্র ছেড়ে, রাজ্য ছেড়ে চলে' যাচ্ছ, সে প্রেম নয়, সে লালসা । প্রেমের গতি নির্ঝরিনীর মত স্থির, স্বচ্ছ, মস্থর ; বারি-প্রপাতের মত উচ্ছৃসিত, ফেনিল, দ্রুত নয় । আসল প্রেম চকিত বিদ্যুতের মত তীব্র নয়, জ্যোৎস্নার মত নিশ্চল মধুর !—এই কথা

মনে করে' নিয়ে যাও !—মনে রেখো ! অক্ষরে অক্ষরে মিলিয়ে দেখো ।

প্রস্থান

জয়সিংহ । জানি সরস্বতী, যে, এ প্রেম নয়, এ লিপ্সা ! এ আশায  
ধীরে ধীরে রাজ্যের মত গ্রাম ক'চ্ছে—ব্যাধিব বিষের মত সমস্ত শবীর ছেয়ে  
আসছে । এ টান আবর্তের টান । সব বুঝতে পাচ্ছি । কিন্তু উপায়  
নাই, উপায় নাই ।

বলিয়া উদ্ভ্রান্তভাবে চলিয়া গেলেন

### ষষ্ঠ দৃশ্য

স্থান—পুণ্যমালী দুর্গ । দুর্গাদাসের শয়নকক্ষ । কাল—প্রহর রাত্রি । শয়্যার উপরে  
উপবিষ্ট দুর্গাদাস একখানি পত্র পড়িতেছিলেন ।

দুর্গাদাস । এইরূপে আপনাব' সরল উদার ভ্রাতা সমরসিংহের মৃত্যু  
হয় । এদিকে আমাদের মহারাণী চিতারোহণে তাঁহার স্বর্গীয় স্বামীকে  
অনুগমন করিয়াছেন । ওদিকে জৈন কাপুরুষ রাণা জয়সিংহ মোগলদের  
সঙ্গে এক অবমাননাকর সন্ধি করিয়া, রাজ্য ছাড়িয়া, দ্বিতীয় মহিষীকে  
লইয়া জয়সমুদ্রের তীরে গিয়া বাস করিতেছেন । তাঁহার আচরণে,  
মহারাণীর স্বর্গারোহণে, আব বীর সমরসিংহের মৃত্যুতে রাজস্থান বিচ্ছিন্ন  
হইয়াছে ।—রাঠোর সেনাপতি ! আপনি দেশে ফিরিয়া আসুন ।  
আমাদের অপরাধ মার্জনা করুন । আমাদের সমবেত মিনতি রক্ষা  
করুন ।”—হঁ ! পত্রে শতাধিক সামন্তের দস্তখৎ ।”—এই বলিয়া পত্রখানি  
মুড়িয়া উপাধানতলে রাখিয়া দুর্গাদাস অধোবদনে কক্ষমধ্যে পাদচারণ  
করিতে লাগিলেন । এমন সময় শম্ভুজী কক্ষে প্রবেশ করিয়া মদিরাজড়িত  
স্বরে কহিলেন—“শুনেছো দুর্গাদাস !”

দুর্গাদাস চমকিত হইয়া উত্তর কবিলেন—“কি, মহারাজ ?”

শম্ভুজী । ঔরংজীবকে সমস্ত পার্বত্য প্রদেশ ত’তে তাড়িইছি । এসেছিলেন চাঁদ শম্ভুজীর সঙ্গে যুদ্ধ ক’র্তে ! জানেন না ।

দুর্গাদাস । কিন্তু, বিজাপুর আর গোলকুণ্ডার পতন হয়েছে না ?

শম্ভুজী । তা’তে আমার কোন হানি হয় নি । আমি এদিকে বিজাপুরের পশ্চিম প্রান্ত দখল করে’ বসে’ আছি । চাঁদ এদিকে এগিয়ে আসছেন, পিছনে শম্ভুজীব সৈন্য ; ওদিকে পিছিয়ে যাচ্ছেন, পিছনে শম্ভুজীব সৈন্য । ব্যতিব্যস্ত কবে’ তুলিছি । জানেন না চাঁদ—এ শম্ভুজী ! আব কেউ নয় ।

দুর্গাদাস । কিন্তু এ বকম উদ্দেশ্যহীন যুদ্ধে ফল কি ? অসুখমতি দিন, মহাবাজ । আমি রাজপুতসৈন্য এখানে নিয়ে আসি । আব মারাঠা রাজপুত মিলে ঔরংজীবের বিপক্ষে দাঁড়াই ।

শম্ভুজী । রাজপুত ! রাজপুত যুদ্ধ ক’র্তে জানে ? তাদের সাহায্যে প্রয়োজন নাই, দুর্গাদাস ! এক দিন মারাঠাই রাজপুত আর মোগলকে সমভাবে পেশগ ক’র্বে ।

দুর্গাদাস । মহাবাজ ! রাজপুতকে পরাজয় কবে’ মারাঠার গোবর বাড় বে না । তা’রাও হিন্দু, মারাঠাও হিন্দু ।

শম্ভুজী । তা’ বটে—দুর্গাদাস, তোমাব বিছানা যথেষ্ট নরম হয়েছে ত ?

দুর্গাদাস । রাজপুতের পক্ষে এ বিছানা যথেষ্ট নরম । আমাদের অনেক সময় অশ্বপৃষ্ঠই শয্যার কাজ কবে ।

শম্ভুজী । ঐ ত দুর্গাদাস, ঐ জাঘগাঘই তোমার সঙ্গে মেলে না । যুদ্ধও চাই, সঙ্গে সঙ্গে সন্তোগও চাই ।—দুর্গাদাস ! জীবনের জন্ত সব কঠোর জিনিসে আপত্তি নাই । কিন্তু বিছানাটি নরম চাই ।

—কাব্লেস্ থা—

নেপথ্যে । হজুর !

শম্ভুজী । সব তৈরী ?

নেপথ্যে । হাঁ, হুজুর !

শম্ভুজী । তবে এখন নিদ্রা যাও, দুর্গাদাস । আমি যাই ।

প্রস্থান

দুর্গাদাস । ( কক্ষে পদচারণা করিতে করিতে ) যোদ্ধা বটে মারাঠা জাতি ! অদ্ভুত অশ্চালনা, অদ্ভুত সমরকৌশল, অদ্ভুত সহিষ্ণুতা ! এর সঙ্গে যদি রাজপুত জাতির একাগ্রতা, ত্যাগ আর দৃঢ়তা পেতাম, কি না হ'তে পার্ত্ত ? না, তা' হবার নয় । ভারতের ভাগ্য সুপ্রসন্ন নয় ! হিন্দুজাতি যে বিচ্ছিন্ন হয়ে গিয়েছে ! আব এক হবার নয় ।

এই বলিয়া তিনি কক্ষমধ্যে পদচারণা করিতে লাগিলেন । সহসা দূরে আর্তস্বর

শ্রুত হইল । দুর্গাদাস কহিলেন

ওঃ ! কি তীব্র আর্তধ্বনি ! কি করুণ ! কি অভ্রভেদী ! আরো কাছে ! আরো কাছে !—এ কি ! আমার দ্বারের বাইরে যে ! এ যে নারীর কাতরোক্তি !—কি হৃদয়-ভেদী—

আলুলায়িতকেশী স্তম্ভবসনা এক নারী দৌড়িয়া সেই কক্ষে প্রবেশ করিলেন

নারী । রক্ষা কর ! রক্ষা কর !

দুর্গাদাস । ভয় কি ! ভয় কি, মা !—কে তুমি, মা !

তরবারি হস্তে শম্ভুজী ও তৎপশ্চাতে কাবলেস্ খাঁ প্রবেশ করিল

শম্ভুজী । পিশাচী ! শয়তানী ! তুমি তাকে দরজা খুলে দিয়েছো ?  
তুমি তার পলায়নের পথ পরিষ্কার করে' দিয়েছো ?

নারী । সে কুলনারী ।

শম্ভুজী । সে কুলনারী ; তোর তা'তে কি ?

নারী ভয়ে ভূপতিতা হইলেন । শম্ভুজী তরবারি হস্তে করিয়া তাহার দিকে ধাবিত হইলেন । দুর্গাদাস সহসা তাহার সম্মুখে আসিয়া কহিলেন—

দুর্গাদাস । শম্ভুজী !—মহারাজ !—এ কি ! অবলায় প্রতি আক্রমণ ।  
এও কি সম্ভব !

শম্ভুজী । চোপরও—সবে' যাও—

দুর্গাদাস । কখনও না । অবলায় প্রতি অত্যাচার দুর্গাদাস আজ  
পর্যন্ত) কখন দাঁড়িয়ে দেখে নাই । তরবারি কোষবদ্ধ করুন, মহারাজ ।

শম্ভুজী । জানো ও কে ?

দুর্গাদাস । উনি যেই হোন—উনি আমার মা ।

শম্ভুজী । সবে' দাঁড়াও, দুর্গাদাস !

দুর্গাদাস । প্রকৃতিস্থ হও, মহারাজ ! তুমি সুরাপান ক'রেছো !  
নইলে এ অবলায় প্রতি অত্যাচার তোমার দ্বারা সম্ভব নয় ।

শম্ভুজী । এখনো ব'ল্‌চি সবে' দাঁড়াও ।

দুর্গাদাস । কখন না ।

শম্ভুজী । তবে তরবারি নাও । জামি নিরস্ত্র শত্রুকেও বধ করি না ।  
তববারি নাও ।

দুর্গাদাস । এটুকু ত জ্ঞান আছে ! তবে নাবীর প্রতি অত্যাচার  
কেন ?—শোন, মহারাজ—

শম্ভুজী । তরবারি নাও । ( পদাঘাত করিয়া ) নাও !

দুর্গাদাস । তরবারি নেওয়ার প্রয়োজন নাই ।

এই বলিয়া তিনি শম্ভুজীর গলদেশ ধরিয়া ফেলিয়া দিয়া তরবারি কাড়িয়া দূরে  
নিষ্ক্রেপ করিলেন । পরে তিনি নিজের উষ্ণীষ খুলিয়া, তাঁহার হস্তদ্বয়  
বন্ধন করিলেন । কাব্‌লেস্‌ হুমোগ বুঝিয়া পলায়ন করিল ।

দুর্গাদাস । মহারাজ ! আপনার আতিথ্য গ্রহণ ক'রেছিলাম । ক্ষমা  
ক'র্বেন ! ( এই বলিয়া তিনি নিজের তরবারি লইয়া, পরে সেই নারীকে  
ক্রোড়ে উঠাইতে গিয়া, আবার ভূমিতলে রাখিয়া কহিলেন—) এ কি !  
বালিকা মরে' গিয়েছে ! শুদ্ধ আতঙ্কে মরে' গিয়েছে ।—মহারাজ !

এই ক্ষুদ্র নিরীহ কপোতীকে মার্কবার জন্ত তরোয়াল নিয়ে ছুটে-  
ছিলে !—তুমি মহাত্মা শিবাজীর পুত্র ! ধিক্ !

এই বলিয়া চলিয়া গেলেন

শম্ভুজী । কোন্ হায়া—পাক্‌ড়া পাক্‌ড়া—

বাহিরে অস্ত্রের শব্দ শব্দ

রক্তাক্ত কলেবরে দুর্গাদাস পুনঃপ্রবেশ করিলেন । সঙ্গে কাব্‌লেস ও সৈনিকগণ  
প্রবেশ করিল । কাব্‌লেস শম্ভুজীর বক্ষন মূল করিল

দুর্গাদাস । সব স্থির থাকো । আমি পালাচ্ছি না । পঞ্চাশ জনের  
বিপক্ষে একার আত্মরক্ষা সম্ভবে না । আর নিজেব প্রাণবক্ষার জন্ত  
স্বজাতীয়ের প্রাণসংহার কর্তে চাই না । একজন নারীর ধর্মরক্ষা কর্তে  
পেরেছি, এই যথেষ্ট পুরস্কার—যদিও তার প্রাণরক্ষা কর্তে পারলাম না ।  
ধরা দিচ্ছি ; বাঁধো । মে শাস্তি হয়, দাও ।

এই বলিয়া দুর্গাদাস তরবারি ভূতলে নিক্ষেপ করিলেন । হস্ত বাঁধিবার জন্ত আগাইয়া  
দিলেন । শম্ভুজীর ইঞ্জিতে কাব্‌লেস তাঁহাকে ভয়ে ভয়ে বাঁধিল

শম্ভুজী । দুর্গাদাস ! বড় স্পর্ধা তোমার ! তোমাকে পোড়াবো না,  
জীযন্তে গোর দেব ! কি শাস্তি দেব ? কি রকমে ম'র্তে চাও ?

কাব্‌লেস্ । মহারাজ ! মেহমানকে আপন হাত্‌সে জান হওয়া  
ঠিক নয় । আমি বলি, একে এর বড় দোস্ত ঔরঞ্জীবের হাতে দিই ।  
ফল দাঁড়াবে একই । তবে মহারাজের বুরা কামটা কর্তে হবে না ।

শম্ভুজী । হাঁ তা' বটে ! সেই ভালো । কাব্‌লেস্ ! ওকে ঔরঞ্জীবের  
হাতে দিয়ে এস । সেখানে দেওয়াও যা, ব্যাঘ্রের বিবরে ছেড়ে দিয়ে  
আসাও তাই ।

এই বলিয়া অত্যাচ্ছ হাশ্ব করিলেন

কাব্‌লেস্ । ( স্বগত ) সঙ্গে সঙ্গে কাব্‌লেসের কিছু নফা হয়ে থাক  
না । বহৎ ইনাম পাবো ।



দুর্গাদাস। উত্তম! আমি চ'ল্যাম ম'র্ভে! কিন্তু মনে রেখো, শত্ৰুজী! এই কথা বলে' যাই। তোমারও এক দিন এই দশা হবে— এই কাব্লেস্ খাঁরহ হাতে। যদি এখনও ভালো চাও—সুরা পরিত্যাগ কর। নাবীজাতিব সম্মান কথা। আব এই কাব্লেস্ খাঁকে বিশ্বাস কোবো না।

পট পরিবর্তন

### সপ্তম দৃশ্য

স্থান—আমেদনগর-প্রাসাদ; অন্তঃপুর কক্ষ। কাল—রাত্রি। সম্রাজ্ঞী গুলনেয়ার একাকিনী সেই কক্ষে পদচারণা করিতেছিলেন।

গুলনেয়ার। আমরা এসেছি এই দাক্ষিণাত্যে—কার উদ্দেশ্যে? লোকে জানে যে, ঔরঞ্জীব আকবরের উদ্দেশ্যে এসেছেন, বিজাপুর গোল-কুণ্ডা জয় ক'র্ভে এসেছেন; মারাঠা জাতিকে দমন ক'র্ভে এসেছেন।—মূর্খ তা'রা। এ সব ছোট চক্র ধুর্ছে বটে; কিন্তু এই ঘূর্ণিতচক্ররাজি ঘোরাচ্ছি—এখানে বসে' আমি! আমি সেদিকে তর্জনী না ফেরালে, শত আকবর, বিজাপুর, শত্ৰুজী, দিল্লীর সমগ্র প্রাসাদকে দাক্ষিণাত্যের দিকে টেনে আনতে পার্ত না।—কি প্রভূত শক্তি, কি দরাজ হাতে অপব্যয় করছি!—বাঁদি! সরাব।—দুর্গাদাস! দুর্গাদাস! তুমি যদি জান্তে—যদি জান্তে—আমি তোমাকে কি ভালোবাসি! যদি জান্তে কি মধুরতিলক, উত্তপ্তশীতল, তীক্ষ্ণকোমল প্রবৃত্তি আমার অন্তরে জাগিয়ে দিয়েছো! যদি জান্তে, তোমার উদ্দেশ্যে সমস্ত মোগল-সাম্রাজ্য মাড়বার থেকে দাক্ষিণাত্যে টেনে এনেছি!—আমাকে কি ভালোই বাসতে!—বাঁদি! সরাব। বাঁদী আসিয়া তাঁহার হস্তে সরাব দিল। গুলনেয়ার পান করিয়া অবহেলায় দূরে

পাত্র নিক্ষেপ করিলেন, উঃ! কি পিপাসা! দুর্গাদাস! আমি মদিরা পান ধরে'ছি কেন জান?—দুর্গাদাস। তুমি যদি আমায় আজ দেখ চিন্তে পারো কি না সন্দেহ! এত শীর্ণ হয়ে গিয়েছি! এ প্রবৃত্তির কি মহাজ্বালা! কি দুর্দমনীয় বেগ! কি মধুর উৎপীড়ন!

ঔরংজীবের প্রবেশ

ঔরংজীব। গুলনেয়ার!

গুলনেয়ার। জাঁহাপনা! বন্দেগি!

ঔরংজীব। গুলনেয়ার! বড় সুসংবাদ—দুর্গাদাস ধরা প'ড়েছে।

গুলনেয়ার। য্যা!—না পরিহাস?

ঔরংজীব। পরিহাস নয়, প্রিয়ে, সত্য কথা! কাব্লেস্ থা তাকে ধরে' এনেছে। তাঁকে ৩০০০ আসরফি পুরস্কার দিইছি। আর তাকে বলে'ছি যে, শম্ভুজাকে ধরিয়ে দিতে পারলে, এর দশগুণ পুরস্কার দেব।

গুলনেয়ার। সত্য কথা?—এত দিনে বুঝলাম, নাথ, তুমি আমায় ভালোবাসো! আমাদের দাক্ষিণাত্যে আসা, এত দিনে সার্থক হ'ল!

ঔরংজীব। কিন্তু গুলনেয়ার! তুমি সুরাপান করে'ছো।

গুলনেয়ার। হাঁ করে'ছি। এখন আর এক পেয়ালা এই দুর্গাদাসের ধরা উপলক্ষে পান কর'ব। বাঁদি—

ঔরংজীব। সে কি, গুলনেয়ার? সুরাপান আমার প্রাসাদ-কক্ষে!

গুলনেয়ার সগর্বে উঠিয়া দাঁড়াইয়া কহিলেন

গুলনেয়ার। তাই হ'য়েছে কি সত্রাট?

ঔরংজীব। জানো আমি সুরাপানের বিরোধী!

গুলনেয়ার। তুমি হতে পারো। আমি নই।

ঔরংজীব। তুমি নও—তুমি মুসলমান ধর্মের দীক্ষিত হও নি?

গুলনেয়ার । সে আমার মজ্জি ! আমার মজ্জি হ'লে এ ধর্ম ছেড়েও দিতে পারি !—ধর্ম ?—ধর্ম আচরণেব জন্ম আমি তৈইরি হই নি । আগার দিকে চাও দেখি, সম্রাট্ ! এই সুগোল কোমল বাহুযুগল দেখ ! এই সুদীর্ঘ ঘনকৃষ্ণ কেশদাম দেখ, এই তরল স্বচ্ছ স্বর্ণাভ বর্ণ দেখ । এ রূপ কি মসজিদে গিয়ে মাথা খুঁড়বার জন্ম তৈয়ের হয়েছিল ?—তুমি বড় ধার্মিক, জাঁহাপনা ! তবে আমাকে বিবাহ না করে' এক মোল্লানীকে বিবাহ কর নি কেন ?

ঔরঞ্জীব । কি বল্ছো, গুলনেয়ার—তুমি জানো না !

গুলনেয়ার । বেশ জানি ।—শোন !—দুর্গাদাস কোথায় ?

ঔরঞ্জীব । দিল্লীর খাঁর রক্ষায় ।—তাকে কি শাস্তি দেব জানি না ।

আগে—

গুলনেয়ার । তাকে কোন শাস্তি দেবে না । তাকে মুক্ত করে' দেবে !

ঔরঞ্জীব । সে কি ? সে কি হ'তে পারে ?

গুলনেয়ার । হ'তে যে বেশ পারে, তা' তুমি নিজেই বুঝতে পার্ছো । শুদ্ধ মুক্ত করে' দেবে না ! আমার সঙ্গে কারাগারে যাবে । আমি বল্‌বো দুর্গাদাসকে মুক্ত করে' দাও—আর তুমি স্বহস্তে তাকে মুক্ত ক'রে দেবে ।

ঔরঞ্জীব । তুমি কি বল্ছো জানো না, গুলনেয়ার ! তুমি প্রকৃতিস্থ হও । তুমি অত্যধিক সুরাপান করে'ছো । প্রকৃতিস্থ হও !

এই বলিয়া সম্রাট্ চলিয়া গেলেন

গুলনেয়ার । উদ্ভম ! আমি প্রকৃতিস্থ হ'ছি ।—দুর্গাদাস ! তোমাকে আমিই স্বহস্তে মুক্ত ক'রব । আমার সে কি গৌরব ! আমি তোমাকে স্বহস্তে মুক্ত করে' আমার বুকের কাছে টেনে এনে, আমার প্রেম ভিক্ষা স্বরূপ দেবো ! দুর্গাদাস ! আমি তোমায় দিল্লীর সিংহাসনে বসাবো ; আর আমি তোমার সম্রাজ্ঞী হব । কি সে সম্মান !—আর ঔরঞ্জীব !

তুমি ত এই মুঠোর মধ্যে । তোমায় নামাতে কতক্ষণ ?—দুর্গাদাস !  
তোমাব সব অপরাধ ক্ষমা কর্ণাম । এতদিন যে তীব্র লালসাব জ্বালায়  
আমায় জ্বালিয়েছো ; আমার হৃদয়েব পিঞ্জরে না এসে, বনে বনে, পর্বতে  
পর্বতে, উপত্যকায় উপত্যকায় আমাকে তোমার পশ্চাতে পশ্চাতে  
ছুটিয়েছ—সব ক্ষমা কর্ণাম । দুর্গাদাস । আজ তোমার সব দোষ ক্ষমা  
ক'ব্লাম ! উঃ আজ কি আনন্দ ।

শ্রুতান

### অষ্টম দৃশ্য

স্থান—শিবির-কারাগার । কাল—রাত্রি । শৃঙ্খলাবদ্ধ দুর্গাদাস ।

দুর্গাদাস । শেষে এ দশাও হ'ল । যে লাঞ্ছনা এত দিন বিজাতি  
বিধর্মী শত্রুর কাছে হয় নি, তা' আজ স্বজাতি স্বধর্মী হিন্দুব হাতে  
হ'ল !—শম্ভুজী ! তুমি ভেবেছো যে, মারাঠা এক দিন রাজপুত মুসলমানকে  
এক সঙ্গে পদদলিত ক'র্বে । তা হ'লেও দুঃখ ছিল না ! কিন্তু তা' হবে না ।  
দেখবে যে এক দিন মারাঠা, রাজপুত, মুসলমান এক সঙ্গে অন্য কোন  
জাতির পদতলে এসে লোটাবে । বিশ্বাসঘাতকতার শাস্তি আছেই  
আছে ।—কে কারাগারেব দরোজা খুল্লে না ?—কে ?

সুমজ্জিত গুলনেয়ার কারাগারে প্রবেশ করিলেন

দুর্গাদাস । এ কি অপরূপ সজ্জা ! এ কি রূপের জ্যোতিঃ !—কে  
আপনি ?

গুলনেয়ার ! আমি বেগম গুলনেয়ার !

দুর্গাদাস । বেগম গুলনেয়ার !

গুলনেয়ার । চিন্তে পার্ছে না, দুর্গাদাস ? আমাদের পূর্বে একবার

দেখা হ'য়েছিল। সে দিন আমি তোমাব হাতে বন্দী হ'য়েছিলাম। আজ তুমি আমাব হাতে বন্দী।

দুর্গাদাস। আপনি আমাব শাস্তি বিধান ক'র্তে এসেছেন ?

গুণনেয়ার। না, আমি তোমাকে মুক্ত ক'র্তে এসেছি।

দুর্গাদাস। প্রত্যাশকাবস্বরূপ ?

গুণনেয়াব। না।

দুর্গাদাস। তবে ?—সম্রাটের আজ্ঞায় ?

গুণনেয়াব। বেগম গুণনেয়াব সম্রাট ঔবংজীবের আজ্ঞার অপেক্ষা বাখে না। আমাব আজ্ঞাই তিনি এত দিন পালন করে' এসেছেন।

দুর্গাদাস। তবে ?

গুণনেয়াব। আমি তোমাকে মুক্ত করে' দিতে এসেছি, কারণ তুমি আমাব প্রাণেশ্বব।

দুর্গাদাস। এ কি পবিহাস ?

গুণনেয়াব। তোমাব খুব আশ্চর্যা বোব হ'চ্ছে, যে, আমি স্বয়ং ভাবতসম্রাজ্ঞী গুণনেয়াব, আর তুমি একজন রাজপুত সেনাপতি মাত্র ; আমি তোমাকে প্রাণেশ্বব বলে' ডাকছি ? হাঁ, আশ্চর্যা হবার কথা বটে ! তবে আমি সাধারণ নারীর মত কাজ কবি না। সম্রাজ্ঞী হ'য়ে একজন সামান্ত সেনাপতিকে “তুমি আমাব প্রাণেশ্বব” এ কথা এই ভাবে আমি ছাড়া জগতে আর কেউ ব'লতে পার্ত ? কিন্তু অদ্ভুতেই আমাব প্রবৃত্তি। সাধারণ যা', সামান্ত যা' তা' সম্রাজ্ঞী গুণনেয়াব করে না ! সে যখন ঘোড়া ছুটায়, রশ্মি ছেড়ে দেয় ; সামান্ত, সংযত, পরিমিত আনন্দ সে চায় না ; অসীমের—উচ্ছ্বালের রাজত্বে তা'র বাস !

দুর্গাদাস। কিন্তু—সম্রাজ্ঞী—

গুণনেয়াব। শোন, বাধা দিও না। আমি যাই করি তাই অদ্ভুত। এই প্রকাণ্ড মোগল-সাম্রাজ্য একটা প্রকাণ্ড বিস্ময় নয় ?—সে বিস্ময় আমাব

সৃষ্টি । এ সাম্রাজ্য সম্রাটের হস্তাক্ষর বটে, কিন্তু রচনা আমার ! আমার তর্জনী-উত্তোলনে সাম্রাজ্যে যুদ্ধ, আমার অভয়দানে সাম্রাজ্যে শান্তি ! আমার সহস্র দৃষ্টিতে এক একটা রাজ্যের উত্থান ; আমার ভ্রক্ষেপে এক একটা রাজ্যের পতন ! এতদিন এই হ'য়ে আসছে । যে দিন তোমার হাতে বন্দী হ'য়েছিলাম, সেদিন সে অবস্থা নিষতির কঠোর বিধান বলে' মেনেছিলাম ; কোন মানুষের কাছে মাথা হেঁট করি নি । সেইদিন তোমাকে ভালোবেসেছিলাম ! কিন্তু সে প্রেম জানাই নি ; কেন না, বন্দীভাবে যে তোমাব প্রেম ভিক্ষা ক'র, সেরূপ উপাদানে আমার প্রবৃত্তি গঠিত হয় নি । আজ তুমি আমাব বন্দী । এই আমাব প্রেমজ্ঞাপনের উপযুক্ত সময় । দুর্গাদাস । আমি তোমায ভালোবাসি !

দুর্গাদাস । বেগমসাহেবা ! আপনি কি ব'লছেন, বোধ হয় আপনি বুঝতে পাচ্ছেন না ।

গুলনেয়ার । সম্রাটকে ভয় করছ ? এসো । দেখবে সম্রাট আমাব দাস ; আমি তার দাসী নহি । তোমায দিল্লীর সিংহাসনে বসাবো । এসো !

দুর্গাদাস । বেগমসাহেবা । মাফ ক'র্বেন । অসহুপায়ে পৃথিবীর সম্রাট হ'তে চাই না !

গুলনেয়ার । সাম্রাজ্য চাও না ?

দুর্গাদাস । না, বেগমসাহেবা ! আপনি ফিরে যান ।

গুলনেয়ার । কি ? তুমি আমাকে চাও না ?

দুর্গাদাস । পরদারাকে আমরা রাজপুতজাতি মাতা বলে মানি । আপনার মর্যাদা আপনি না রাখেন, আমি রাখবো ।

গুলনেয়ার ক্ষণকাল স্তম্ভিত হইয়া নীরব রহিলেন । তাঁহার আপাদ-মস্তকে

উকরক্তস্রোত বহিতে লাগিল । তিনি বুঝিতে পারিলেন না যে,

তিনি আকাশে কি মর্ন্ত্যে । পরে তিনি কহিলেন—

গুলনেয়ার। কি দুর্গাদাস! তুমি আমার প্রেম প্রত্যাখ্যান ক'র্ছ—  
সম্রাট ঔরঞ্জীব যার ইচ্ছিতের অপেক্ষায় থাকে ?

দুর্গাদাস। বেগমসাহেবা! জগতে সকলেই ঔরঞ্জীব নয়। পৃথিবীতে  
ঔরঞ্জীবও আছে, দুর্গাদাসও আছে।

গুলনেয়ার! এ কি সম্ভব!—জানো দুর্গাদাস, তোমার পক্ষে এর  
ফল কি ?

দুর্গাদাস। জানি—মৃত্যু।

গুলনেয়ার। না, দুর্গাদাস তুমি পরিহাস ক'র্ছ।

দুর্গাদাস। জীবনে এর চেয়ে গম্ভীরভাবে কখন কথা কহি নাই।

গুলনেয়ার। কি! আমাকে উপেক্ষা ক'র্ছ? দুর্গাদাস, পূর্বে বলে'ছি  
গুলনেয়ার নতজানু হ'য়ে প্রেম ভিক্ষা কবে না; আশীর্বাদের মত প্রেম  
বিতরণ করে।—বেছে নাও—বেগম গুলনেয়ার কিম্বা মৃত্যু!

দুর্গাদাস। বেছে নিলাম—মৃত্যু।

গুলনেয়ার। মৃত্যু। তবে তাই হবে—আমি তোমাকে বধ ক'র্ব।  
গুলনেয়ারের কা'ছ একটা পাবে—হয় প্রেম, না হয় প্রতিহিংসা! যদি  
প্রেম না চাও, প্রতিহিংসা নেও—কামবক্স!

গুলনেয়ারের পুত্র কামবক্স প্রবেশ করিলেন

গুলনেয়ার। কামবক্স! বধ কর! একে বধ কর! এই মুহূর্তে বধ  
কর! চেয়ে রয়েছো যে!—বধ কর!

কামবক্স। কেন, মা? পিতার বিনা অনুমতি—

গুলনেয়ার। পিতার অনুমতি? আমার আজ্ঞার উপর পিতার  
অনুমতি—বধ কর এই মুহূর্তে। কি! আমার কথার অবাধ্য তুমি?  
( চীৎকার করিয়া ) বধ কর—বধ কর!

কামবক্স। ( ভরবারি বাহির করিতে করিতে ) উত্তম! তবে প্রস্তুত  
হও, বন্দী!

দুর্গাদাস । আমি প্রস্তুত ।

কামবক্স দুর্গাদাসের বধার্থে তরবারি উঠাইলেন । এমন সময় দিলীর খাঁ  
প্রবেশ করিয়া কহিলেন—

দিলীর । সাবধান, কামবক্স ! নহিলে—

পিশুলা কামবক্সের প্রতি লক্ষ্য করিলেন

গুলনেয়ার । কে তুমি ?

দিলীর । আমি মোগল সেনাপতি দিলীর খাঁ ।

গুলনেয়ার । কি ! তোমার স্পর্ধা যে, আমার আঞ্জার বিপক্ষে  
দাঁড়াও ?

দিলীর । দিলীর খাঁ কাউকে ভয় কবে না বেগমসাহেবা ! সে এমন  
সাধুতার অভেদ্য বর্মে আচ্ছাদিত যে, স্বয়ং ঐশ্বরকে ভয় করে না ; তুমি ত  
তুচ্ছ জীব ।—পাপীযসী ! নির্লজ্জা !—মনে কোরো না, আমি কিছু  
শুনি নাই । সব শুনেছি । ( পরে দুর্গাদাসের দিকে ফিরিয়া )  
দুর্গাদাস ! বীর ! জান্তাম যে তুমি মহৎ ! কিন্তু এত মহৎ স্বপ্নেও  
ভাবি নাই । আমি স্বহস্তে তোমার বক্সন মোচন করে' দিচ্ছি । ( বক্সন  
মুক্ত করিয়া ) চলে' এসো বাইরে—আমাব নিজের সর্বোৎকৃষ্ট অশ্ব  
তোমাকে দিচ্ছি । সঙ্গে পঞ্চশত অশ্বারোহী দিচ্ছি । দেশে ফিরে যাও !  
আমার আঞ্জায় কোন মোগলসেনানী তোমার কেশস্পর্শ ক'র্বে না ! চলে'  
এসো বীর ! বন্দেগি বেগমসাহেবা !

দুর্গাদাসের হাত ধরিয়া নিজ্জাস্ত হইলেন

গুলনেয়ার ও কামবক্স প্রস্তরমূর্তিবৎ দণ্ডায়মান রহিলেন



## পঞ্চম অঙ্ক

সংস্কৃত : ৫ অঙ্ক - প্রথম দৃশ্য

স্থান—পাহাড়ের উজানচল্লাতপ । কাল—রাত্রি । সিংহাসনারূঢ় আকবর । সম্মুখে  
নটকীগণ ।

### নৃত্যগীত

নীল গগন, চন্দ্রকিরণ, তারকাগণ রে ।  
হের নয়ন—হর্ষমগন চাক ভুবন রে ,  
নিদ্রিত সব কুজন-রব, নীরব ভব রে—  
মোহন নব হেরি বিভব মেদিনী তব রে ।  
বাহিত ঘন-স্নিগ্ধ পবন জ্যোৎস্না মগন মন রে—  
নন্দনবন-তুলা-ভুবন—মোহিত মন রে ।  
এই বলিয়া বন্ধনের অবস্থা দেখাইল

আকবর । কেযাবাৎ !—বাহবা !—সোভানাল্লা !—বাহবা বেহাগে  
কোমল মিথাস ! স্বর্গ যদি এই বকম হয়—তবে স্বর্গ বড় সুখের জায়গা ।  
সোভানাল্লা ! আবার নাচো ; আবার গাও ।

এই সময়ে সহাস্তমনে কাব্লেস্ খাঁ প্রবেশ করিল

আকবর । কে ? কাব্লেস্ খাঁ ! শত্ৰুজী কোথায় ?  
কাব্লেস্ । আর শত্ৰুজী ! সাহজাদা ! শত্ৰুজী—এই—  
এই বলিয়া কাব্লেস্ পতনের ভঙ্গী দেখাইল

আকবর । সে কি ?

কাব্লেস্ । কুপোকাৎ ।

আকবর । কুযোয পড়ে' গিয়েছে ? বেশী ধেয়েছিল বুঝি ।

কাব্লেস্ । না, সাহজাদা ! শম্ভুজী গ্রেপ্তার । চাঁদ এখন তোমার পিতার শিবিরে । হাতে—

এই বলিয়া বন্ধনের অবস্থা দেখাইল

আকবর । সে কি ?—অসম্ভব !

কাব্লেস্ । অসম্ভব টব নয়, সাহজাদা ! একেবারে ঠিক ।—এখন আপনার নিজের পথ দেখুন ।

আকবর । এ কি সত্য কথা, কাব্লেস্ ?

কাব্লেস্ । ( ঘাড় নাড়িয়া ) ভারি সত্য, সাহজাদা ! মিথ্যা কথা কাব্লেস্ খাঁ কদাচিৎ কয় । শম্ভুজী একেবারে গ্রেপ্তার । এখন আপনি কি ক'র্কেন ঠিক ক'রেছেন ? আপনার মুখ যে কালীবর্ণ হ'য়ে গেল !

আকবর নীরব রহিলেন

কাব্লেস্ । শুনুন, সাহজাদা ! আমার পরামর্শ যদি শুনতে চান— আপনি আমার সঙ্গে সঙ্গে সন্ন্যাসীদের কাছে আসুন ।

আকবর । ( ম্লান হাসি হাঁসিয়া ) সন্ন্যাসীদের কাছে ? তার চেয়ে ব্যাঘ্রের বিবরে যেতে রাজি আছি !

কাব্লেস্ । আমি ব'লছি, সাহজাদা—আপনি আমার সঙ্গে চলুন বাদসাহের কাছে । কোন ভয় নাই । তিনি আপনাকে কিছু ব'লবেন না । বরং কাবাব খেতে দেবেন । আমি জামিন হ'চ্ছি ।

আকবর । পিতার কাছে ?

কাব্লেস্ । হাঁ, আকবর ! পিতার কাছে ! পিতার কাছে !—কি বলেন ?

এই সময়ে দুর্গাদাস প্রবেশ করিয়া কাব্লেস্ খাঁকে কহিলেন—

দুর্গাদাস । বিশ্বাসঘাতক ! তোমার ষড়যন্ত্র-জালে নিরীহ আকবরকেও জড়াতে চাও ?

আকবর । এ কি ! এ যে দুর্গাদাস !

কাব্লেস্ । তাই ত ! এ যে—

কল্পিত

দুর্গাদাস । কাব্লেস্ ! তোমার অভিলাষ পূর্ণ হয় নি । আমি জীবিতাবস্থায় ফিরে এসেছি । আমায় শত্রু করে ধরিয়ে দিয়েছিলে, ষায় আসে না । আমি তোমার কেউ নই । কিন্তু শেষে তুমি তোমার আপন প্রভু শত্রুজীকেও ধরিয়ে দিয়েছো !—কৃতব্র ! নরপিশাচ !

কাব্লেস্ । না মশায়—আমি না—মহারাজ—

দুর্গাদাস । তুমি নও ? কাব্লেস্ ! মহারাজ শত্রুজী তোমার পরামর্শে এক নবোঢ়া ব্রাহ্মণ বালিকাকে হরণ ক'র্ত্তে দুর্গেব বাহির হ'য়ে-  
ছিলেন কি না ?—সত্য বল ; মিথ্যা ব'লে নিস্তার নাই ।

কাব্লেস্ । ( কাঁপিতে কাঁপিতে ) এজ্ঞে ।

দুর্গাদাস । আর তুমি আগেই সে সংবাদ কুমার আজীমকে দিয়েছিলে কি না ? তার পরে কুমার আজীম ৫০০ মোগল সেনানী নিয়ে এসে মহাবাজকে বন্দী কবেন ।—কেমন ? ঠিক কি না ?

কাব্লেস্ । এজ্ঞে !

পলায়নোচ্চত

দুর্গাদাস । ভাগো মাৎ ।

এই বলিয়া দুর্গাদাস কাব্লেস্ খাঁর গলা টিপিয়া ধরিয়া কহিলেন—

কাব্লেস্ খাঁ ! আল্লার নাম করো ।

কাব্লেস্ । মাফ্ করো খোদাবন্দ—আমি আপনার কুত্তা ।

এই বলিয়া সেই ভয়বিহ্বল কম্পিতকলেবরে কাব্লেস্ খাঁ দুর্গাদাসের চরণ ধরিল ।

দুর্গাদাস । যাও, তোমায় বধ ক'র্ব না । আমার হাত তোমার হত্যায় কলঙ্কিত ক'র্ব না । তুমি শত্রুজীর পরকাল খেয়ে শেষে তার ইহকালও খেলে । নরকেও তোমার স্থান নাই—যাও ।

বলিয়া পদাঘাত করিয়া কাব্লেস্ খাঁকে দূর করিয়া দিলেন । কাব্লেস্

চলিয়া গেলে দুর্গাদাস আকবরকে কহিলেন—

সাহজাদা ! একদিন আমি শত্রুজীকে ব'লেছিলাম যে, এই সূরা আর এই নারীই তোমার সর্বনাশ ক'র্বে । আর সে সর্বনাশ সাধন ক'র্বে

এই কাবুলেস্ থাঁ।—অবিকল তাই হ'ল!—সুবরাজ! এই দৃষ্টান্ত হ'তে শিক্ষা লন। পূর্বেও অনেক বার ব'লোছি, আজ আবার ব'লছি—দিন থাকতে সুরা আর নারী পরিত্যাগ করুন! বড় ভয়ঙ্কর নেশা এই দুই।

আকবর। বড় অধিক বিলম্ব, দুর্গাদাস! বড় অধিক বিলম্ব!

দুর্গাদাস। কিছুই বড় অধিক বিলম্ব নয়, কুমার! কেবল প্রবৃত্তি যত অধিক দিন আসন দখল করে' থাকে ততই তা'কে তাড়ানো দুষ্কর হয়। আপনি উচ্চবংশজাত, উচ্চশিক্ষিত উচ্চহৃদয় ব্যক্তি; আপনি চেষ্টা করলে কি এ পাপ ঝেড়ে ফেলে দিতে পারেন না?

আকবর ক্ষণেক নিস্তব্ধ থাকিয়া পরে ধীরে ধীরে কহিলেন

আকবর। দুর্গাদাস! তুমি ঠিক বলে'ছো। আমি এ নেশা পরিত্যাগ কর'ব। শুধু এই নেশা নয়। সংসারের নেশা পরিত্যাগ কর'ব। সব পরিত্যাগ কর'ব।

দুর্গাদাস। সে কি, সাহজাদা?

আকবর। হাঁ, বীর! সব পরিত্যাগ কর'ব। জীবনে ঘৃণা হ'য়ে গেছে। পরের গলগ্রহ হ'য়ে বেড়াচ্ছি, তবু বিলাসে মজ্জিত হ'য়ে আছি। এ কি সাধারণ মানসিক দুরবস্থা! সেটা আজ যেমন অনুভব কর'ছি, তেমন আর কখন অনুভব করি নাই।

বলিয়া মস্তক নত করিলেন

দুর্গাদাস। শুনুন, সাহজাদা! আমার সঙ্গে মাড়বারে চলুন—আমি জীবিত থাকতে আপনার কোন ভয় নাই।—চলুন।

আকবর। না, দুর্গাদাস, আমি মাড়বারে যাবো না। আমি মক্কায় যাবো। অনেক দিন তোমাদের গলগ্রহ হ'য়েছি। তোমায় অনেক ক্রেশ দিয়েছি। ক্ষমা কোরো। আমাকে রক্ষা কর্তে তুমি স্বদেশ, স্বজন ছেড়েছো। আমার জন্ত তুমি ভ্রাতা হারিয়েছো, নিজে ম'র্তে ব'সেছিলে।

দুর্গাদাস। সে আমার ধর্ম, কুমার! কর্তব্য মাত্র!

আকবর । কর্তব্য ! আমি মক্কায গিয়ে ঐ রকম কর্তব্য পালন ক'র্তে শিখবো । অনেক পাপ করে'ছি ; সর্বকাৰ্য্যে অবহেলা করে'ছি ; বিলাসে মজ্জিত হ'য়ে কালক্ষেপ করে'ছি ; পিতার বিদ্রোহী হ'য়েছি ; স্ত্রীহস্তা হ'য়েছি ; নিজের জন্তু ছেনে শুনে তোমার সর্বনাশ করে'ছি, শেষে শত্ৰুজীর মৃত্যুর কারণ হ'লাম । যাই, দুর্গাদাস ! আমার জন্তু এত করে'ছো, আব একটা কাজ কর । তুমি দেশে ফিরে যাও—আমার রাজ্যযাকে দেখো ! তাকে দেখো, দুর্গাদাস ! তোমার হাতে তাকে সঁপে দিয়ে গেলাম ।—তবে যাই, বিদায় দাও ।

বলিয়া আকবর দুর্গাদাসের কর ধারণ করিলেন ।

পটক্ষেপণ

### দ্বিতীয় দৃশ্য

স্থান—জয়সমুদ্রের ত্রদতীরে প্রাসাদ । কাল—মায়াহ । জয়সিংহ ও কমলা প্রাসাদের বারান্দায় দাঁড়াইয়া কথা কহিতেছিলেন ।

জয়সিংহ । কমলা, তুমি বিক্রম হ'যো না । তোমার জন্তু আমি দেশ ছেড়েছি, রাজ্য ছেড়েছি, পুত্র ছেড়েছি !

কমলা । কে ছাড়তে বলে'ছিল ?

জয় । তুমি ।

কমলা । কোন জন্মেও নয় । আমি বলে'ছিলাম মাত্র যে, বড়রাণী আর ছোটরাণীর মধ্যে যা'কে চাও, একজনকে বেছে নাও ; একত্রে দু'জনকে পাবে না ।

জয় । আমি তোমাকে নিইছি । বড়রাণীকে ছেড়েছি ।

কমলা । কিন্তু রাজ্য ছাড়তে আমি বলি নি । রাজ্য বড়রাণীর ছেলে অমরসিংহের হাতে সঁপে দিয়ে আসতে বলি নি । আমার পুত্র কি কেউ নয় ?

জয় । ও ! এই নিযে তোমার সঙ্গে বড়রাণীর ঝগড়া ! তা' এত দিন মুখ ফুটে বল নি কেন, কমলা ? বড়রাণী পুত্রের অমঙ্গল আশঙ্কায়, কলহের কারণ সেদিন প্রকাশ করে নি । এখন বুঝতে পারছি । —কমলা ! বাজ্য অমবসিংহের ! কিন্তু আমি তোমার । অমবসিংহ জ্যেষ্ঠপুত্র । শাস্ত্র-অনুগারে জ্যেষ্ঠপুত্র রাজ্যের অধিকারী ।

কমলা । আমার চেয়ে তবে তোমার শাস্ত্র বড় ?

জয় । কমলা ! একদিন আমাব কাছে সব শাস্ত্রের চেয়ে তুমি বড় ছিলে ।

কমলা । তবে ? তোমাব কি ইচ্ছা যে, তোমার মৃত্যুব পরে আমি অম্বের জন্ত বড়রাণীর দুয়ারে ভিখারী হব ?

জয়সিংহ স্তম্ভিত হইয়া ক্রণেক নীরব রহিলেন , পরে ধীরে ধীরে কহিলেন—

জয় । এত ভবিষ্যৎ চিন্তা তোমার আছে, কমলা ? আমি ত তা' কখন ভাবি নি—তবে তোমার চিন্তা তোমাব পুত্রের জন্ত নয় ; নিজের জন্ত ?

কমলা । নিজের জন্ত চিন্তা কি এতই গর্হিত হ'ল, রাণা ! কে চিন্তা করে না, মহারাজ—

জয় । কৈ ! আমি ত কখন করি নি রাণি ! আমি রাণা রাজসিংহের পুত্র । আমি মনে ক'লে কি না হ'তে পার্তাম ? যশ, মান, অর্থ, প্রভুত্ব, বিলাস পরিত্যাগ করে'—জাতির ধিক্কার নিয়ে আমি তোমার জন্ত বনবাসী হ'যেছি । ভবিষ্যৎ ত দূরের কথা, আমি তোমার জন্ত বর্তমান ছেড়েছি ।

কমলা । আমার জন্ত ছেড়েছো ? না আমার রূপের জন্ত ? তুমি আমায় বিয়ে ক'রেছিলে আমাব জন্ত নয়, আমার রূপের জন্ত । আমি তোমায় বিয়ে করে'ছিলাম তোমার জন্ত নয়, তোমার রাজ্যের জন্ত ।

জয় । আমার রাজ্যের জন্ত ? এ কি গুন্‌ছি ঠিক ? এতদিন কি তবে স্বপ্ন দেখেছিলাম ! আমি যে ভেবেছিলাম তোমার হৃদয় পেয়েছি । আমি

ভেবেছিলাম যে, তোমার এই রূপ-বৈভব তুমি স্বেচ্ছায় আমায় দান ক'রেছো। তোমার সেই দানের মোহেতে মুগ্ধ হ'য়েছিলাম। কমলা! আমার বড় সুখস্বপ্ন ভেঙে দিলে! কমলা! কমলা! জানো না তুমি আমার কি সর্বনাশ ক'লে!

কমলা। আমি তোমার সর্বনাশ কর'লাম, না তুমি আমার সর্বনাশ ক'লে?

জয়। রাণি! তোমার রূপের জন্ত তোমায় ভালোবাসি? কৈ সে রূপ? আর ত দেখতে পাচ্ছি না। কোথা থেকে এক জ্যোতি এসে তোমার মুখে প'ড়েছিল; চলে' গেল! এখন তোমার মুখে সে রূপের কঙ্কাল মাত্র দেখছি। নারী!—রূপ কতক ঈশ্বর দেন, আর কতক রমণী নিজে সৃষ্টি করে। নারীর উজ্জ্বল হৃদয়ের প্রতিভা তা'র মুখে এসে পড়ে' এক নূতন রাজ্য রচনা করে; বাইরের রূপ তা'র কাছে কিছুই না। না রাণি! শুধু তোমার রূপের জন্ত তোমায় ভালোবাসি নাই, তোমার জন্তই ভালোবেসেছিলাম।

কমলা। মিথ্যা কথা।

জয়। রূপ? সংসারে কি রূপের অভাব আছে, নারী? যেখানে অককার জ্যোৎস্নার ঐন্দ্রজালিক খেলা শশুক্ষেত্রের তরঙ্গায়িত শ্যামল বৈভব, আকাশের অবাধ নীল প্রসার যেখানে যেদিকে চাই সেই দিকে সৌন্দর্য্য, সুগন্ধ, সঙ্গীত; যেখানে আকাশের হৃদয় ফেটে সৌন্দর্য্যের বৃষ্টি-ধারা দিবারাত্রি ঝরে' প'ড়'ছে, পৃথিবী ফুঁড়ে পুষ্প ঝঞ্ঝারে সৌরভে সৌন্দর্য্যের উৎস উঠ'ছে; সে বিশ্বসংসারে রূপের জন্ত তোমার কাছে গিইছিলাম? কৈ তোমার সে রূপ, কমলা? কোথা থেকে এসেছিল? কোথায় চলে গেল?

কমলা। এখন তোমার অভিপ্রায় কি?

জয়। অভিপ্রায়! জানি না। মোহ ভেঙে গিয়েছে। কিন্তু বড়

অকস্মাৎ—সময় দাঁড়।—রূপ—রূপ! বাইরের রূপ। হৃদয়হীন  
নাবীর রূপ—

এই সময়ে দৌবারিক প্রবেশ করিয়া অভিবাদন করিয়া কহিল—

দৌবারিক। মহারাণা। বাজমন্ত্রী সাক্ষাৎ চান।

জয়। রাজমন্ত্রী।—এখানে!—যাও, এইখানেই নিয়ে এসো।

দৌবারিক চলিয়া গেল

জয়সিংহ। কিন্তু এতদিন, কমলা—কি বকম করে', কি উপাবে  
তোমার কদর্য চিত্তকে সুন্দর আবরণে ঢেকে বেখেছিলে? ঘুণাক্ষরেও  
জ্ঞাপ্তে পারি নি যে, তুমি এত কুৎসিত। যাও কমলা ভিতরে যাও,  
তোমার প্রতি আমার ক্রোধ নাই। তুমি বড় আশায় নিবাস হ'য়েছো,  
আমিও বড় আশায় নিরাশ হ'য়েছি। ভিতরে যাও।

কমলা যাইতে যাইতে ভাবিলেন—“বুঝি যা' ছিল তাও হারানাম।”  
—বলিয়া চলিয়া গেলেন।

জয়। এবই জন্ত সব ছেড়েছি। লক্ষ্মীকপিণী সবস্বতীকে ছেড়ে'  
এসেছি! সরস্বতি! এখন বোধ হয় তোমায কিছু কিছু চিন্তে পাচ্ছি।  
সেদিন সত্য বলে'ছিলে—‘এ প্রেম নয়, এ মোহ একদিন ভেঙ্গে যাবে।’  
সরস্বতি! তুমি সব সময়েই সত্য কথা বলে'ছিলে; কিন্তু এই সত্য সব  
চেয়ে সত্য!

এই সময়ে মন্ত্রী প্রবেশ করিলেন

জয়। কি মন্ত্রী! বাজ্যের সংবাদ কি?

মন্ত্রী। মহারাণা! আমি ইস্তফা দিতে এসেছি।

জয়। সে কি! কি হ'য়েছে মন্ত্রী?

মন্ত্রী। কি হ'য়েছে! রাণার পুত্র আমার যথেষ্ট অবমাননা  
ক'রেছেন। আমি রাজসংসারে চাকরি' করে' বুড়ো হ'য়ে গেলাম। কিন্তু  
এমন অপমান আমার কখন হয় নি।



জয় । কি অপমান ক'বেছ ?

মন্ত্রী । কুমার অমরসিংহ এক উন্মাদ হস্তী খুলে সহবে ছেড়ে দেন । তাঁতে কয়েক পুর্ববাসীর প্রাণনাশ হয় । আমি তা'তে তাঁকে তিরস্কার ক'বায়, তিনি আমায় মাথা মড়িয়ে, গাধার পিঠ চড়িয়ে সহর প্রদক্ষিণ করিয়ে এনেছেন

জয় । এতদূর । অমর জানে যে, আমি তোমায় তাঁর অভিভাবক কবে' রেখে এসেছি ?

মন্ত্রী । তাঁর যে পিতৃভক্তি বিশেষ আছে, তা' কোন কাজেই প্রকাশ পায় না ।

জয় । চল । কাল আমি রাজ্য ফিরে যাবো । এ বিষয়ে যথাবিহিত ক'বা যাবে । এখন গৃহ চল ।—নারী । নাবী । এতখানি ভাগ ক'তে পাবো ?—হাঁ, এখন বুঝতে পাচ্ছি ।

এত ব' কথা নিজ্জালু হইলেন

### তৃতীয় দৃশ্য

স্থান—কোয়েলার দুর্গশিখর । কাল—সোণা রাত্রি । অজিত ও রাজিয়া একট বেদীর উপর বসিয়াছিলেন ।

রাজিয়া । কি সুন্দর চাঁদ উঠ'ছে, দেখ অজিত ! ঐ যে দেখ'ছো পূর্বদিকে একখানা কালো মেঘের উপর দিবে উঠ'ছে । মেঘের উপরটাব ধারে ধারে কে যেন তরল স্বর্ণরেখা বুলিয়ে দিবে গিয়েছে । মেঘখানার নীচে সব গাঢ় কালো । চাঁদের সিকি ভাগ মেঘের উপবে দেখা যাচ্ছে । কি শিথল কি শান্ত, কি স্থিৰ । কি সুন্দর দেখ'ছো অজিত !

অজিত । না, আমি কেবল তোমাকে দেখ'ছি ।

রাজিয়া। তা' হ'লে অত্যন্ত ভুল ক'র্ছ। এ পৃথিবীতে চারিদিকে এত দেখ'বার জিনিস রয়েছে, তা' ছেড়ে আমাকে দেখ'ছো ? কিন্তু সুন্দর এই পৃথিবী ! আমার মনে হয় যে, এই পৃথিবীটা একটা অশ্রান্ত অনন্ত অব্যাহত সঙ্গীত। এই নীলিমা তার অন্তলোম, এই শ্যামলতা তার বিলোম। আলোক তার গ্রহ, অন্ধকার তার সম, পর্বতে পর্বতে তাব শ্বাস, তরঙ্গে তরঙ্গে তার মূর্ছনা ! কি সুন্দর এই পৃথিবী, অজিত !

অজিত। আমি সব চেয়ে তোমার মুখই সুন্দর দেখি।

রাজিয়া। সব চেয়ে আমার মুখ তুমি সুন্দর দেখ ? অপরিষ্কৃত গোলাপের ব্রীড়া-রক্তিম চাহনির চেয়ে সুন্দর ? বেলাবিলীন লহরীলীলার চেয়ে সুন্দর ? ঐ কৃষ্ণমেঘান্তরিত শরচ্চন্দ্রের চেয়ে সুন্দর ?—অজিত ! তুমি অত্যন্ত বালক।

অজিত। আমি আর বালক নই বলে'ই তোমার মুখ সব চেয়ে সুন্দর দেখি। বুঝেছি এখন, রাজিয়া, জগতের শ্রেষ্ঠ সার সৌন্দর্য্য নারী। আর নারীর শ্রেষ্ঠ সৌন্দর্য্য তুমি।

রাজিয়া। আমি ! আমি তা' বিশ্বাস করি না।

অজিত। রাজিয়া ! বিশ্বাস কর না, কারণ, রাজিয়া ! তুমি আমায় ভালোবাসো না।

রাজিয়া। ভালোবাসি না ? জানি না ভালোবাসা কাকে বলে, অজিত ! তবে যা'কে ভালোবাসা যায়, তাকে যদি সর্বদাই দেখতে ইচ্ছা করে ; যদি তা'কে দেখলে, তা'র স্বর শুন্লে, হৃদয়ের তন্ত্রী বেজে ওঠে ; তবে আমি তোমাকে ভালোবাসি !

অজিত। বাসো, রাজিয়া ? সত্য কথা ?

রাজিয়া। মিথ্যা কথা বলতে ত শিখি নি।

অজিত। প্রাণাধিকে !

হস্ত ধরিলেন

রাজিয়া। প্রিয়তম ! বলিয়া গাহিলেন—

এসো এসো বঁধু বঁধি বাহ ডোরে, এসো বৃকে করে' রাখি ।

বৃকে ধরে' মোর আধ ঘুমঘোরে হুখে ভোর হ'য়ে থাকি ॥

মুছে যাক্ চক্ষে এ নিপিল সব,                      প্রাণে প্রাণে ভাজ করি অনুভব,

মিলিত হৃদির মুহুগীতিরব—আধ নিমীলিত আঁখি ।

বহুক বাহিরে পবন বেগে,                      ককক গর্জন অশনি মেঘে,

রবি শশী তারা হয়ে যাক্ হারা, আধারে ফেলুক ঢাকি ;

আমি তোমার বঁধু, তুমি আমার বঁধু. এই শুধু নিয়ে থাকি ।

বিধ হ'তে সব পুষ্প হয়ে যাক্—আর যা' রহিল বাকি ।

গাহিতে গাহিতে রাজিয়া অজিতের বাহুবিলীন হইলেন ঠিক এই সময়ে

মুকুন্দদাস প্রবেশ করিলেন

মুকুন্দ । মহারাজ !—বলিয়াই অজিতকে রাজিয়ার বাহুলগ্ন দেখিয়া  
পশ্চাদগমন করিতেছিলেন । অজিত তাঁহাকে বাইতে দেখিয়া ডাকিলেন—

অজিত । কি মুকুন্দদাস ? বিশেষ কোন সংবাদ আছে ?

মুকুন্দ । হাঁ, মহারাজ ! সেনাপতি দুর্গাদাস দাক্ষিণাত্য হ'তে ফিরে'  
এসেছেন ।

অজিত । কে ? দুর্গাদাস ফিরে' এসেছেন ? কোথায় তিনি ?

মুকুন্দ । বাইরে ।

অজিত । চল !—না, তাঁকে এখানেই নিয়ে এসো ।

মুকুন্দ । যে আজ্ঞা ।

এহান

অজিত । যাও, রাজিয়া, এখন নিজের কক্ষে যাও !

রাজিয়া চলিয়া গেল

অজিত । দুর্গাদাস ফিরে' এসেছেন ! আমার রক্ষক, দেশের ভরসা  
দুর্গাদাস ফিরে' এসেছেন ; এতে একটা উল্লাস না এসে মনে এক থটকা  
লাগছে কেন ? এ কি চিন্তা, যাতে আমার চিরসঞ্চিত ভক্তি স্নেহ  
কৃতজ্ঞতাকে আবিল করে' দিচ্ছে ! না, এ অত্যন্ত অল্পচিত ! না, এ  
প্রবৃত্তিকে মন থেকে দূর কর'ক ।

রাজপুত্রসামন্তদ্বয়, মুকুন্দদাস ও শিবসিংহ সমভিব্যাহারে দুর্গাদাস প্রবেশ করিলেন

দুর্গাদাস । মহারাজ ! ভৃত্য ফিরে' এসেছে । বহুদিনের সঞ্চিত আশা আমার—কুমারকে মহারাজ সঙ্ঘোধন ক'র্ত্তে কণ্ঠ আনতে রুদ্ধ হ'য়ে আসছে । মহারাজ, অভিবাদন করি ।—বলিয়া তাঁহার পদচুম্বন করিলেন ।

অজিত । ভক্ত-বন্ধু ! আমাব প্রিয়তম সেনাপতি ! কুশল ত ?

দুর্গাদাস । হাঁ, আপাতকুশল । মহারাজ ! তবে আপনি নিজেই সামন্তদেব দেখা দিয়েছেন ?

অজিত । হাঁ, আমি নিজেই সামন্তদের দেখা দিয়েছি ।

মুকুন্দ । প্রভু ! আমি বহুদিন ধবে' তাতে সম্মত হই নি ; ব'ল্যাম 'প্রভুর বিনা-অনুমতি তা' হবে না ।' কিন্তু সামন্তরা ছাড়লে না, ব'ল্লেন 'মহাবাজকে দেখ'বো । কোন কথা শুন'বো না ।'

দুর্গাদাস । তা' উত্তম হ'য়েছে —তা'রা মহারাজের যথোচিত অভ্যর্থনা করে'ছে ?

মুকুন্দ । অভ্যর্থনা ! সে কি অভ্যর্থনা ! চৈত্র সংক্রান্তিতে মহারাজ তাঁর সামন্তদের দেখা দিলেন । সেখানে দুর্জনশাল, উদয়সিংহ, তেজসিংহ, বিজয়পাল, জগৎসিংহ, কেশরী—আরো বহু সামন্ত উপস্থিত ছিলেন ! তাঁরা মহারাজকে ঘিরে জয়ধ্বনি ক'র্ত্তে লাগলেন । গৃহে গৃহে শঙ্খধ্বনি, উল্লাস-চীৎকার ।—প্রভু ! সে এক অপূর্ব দৃশ্য !

দুর্গাদাস । উত্তম । এ দিকে যুদ্ধের সংবাদ কি, শিবসিং ?

শিব । ঔরঞ্জীব মহম্মদ সাহাকে যশোবন্তসিংহের এক পুত্র বলে' যোধপুরের রাজা নামে খাড়া করে'ছিলেন । তার আপনিই মৃত্যু হয় । যোদা হরনাথ সূজায়েৎ খাঁকে কচ পর্য্যন্ত তাড়িয়ে নিয়ে গিয়েছে । মহারাজ স্বয়ং আজমীরে গিয়ে সেফি খাঁকে পরাস্ত করে'ছেন ।

মুকুন্দ । সব শুভ । সব শুভ, সেনাপতি । তবে সমরসিংহের যে শোচনীয় মৃত্যু হ'য়েছে, তা'তে সমস্ত জয় উৎসবগীন হ'য়েছে ।

অজিত । সেনাপতি । জয়সিংহের পুত্র অমরসিংহ তা'র পিতার বিপক্ষে বিদ্রোহ কবে'ছে । জয়সিংহ মাড়বারেব সাহায্য প্রার্থনা কবে'ছেন । সেনাপতি ! তুমি সসৈন্তে জয়সিংহের সাহায্যে যাও ।

দুর্গাদাস । যে আজ্ঞা, মহারাজ । কালই প্রত্যয়ে যাবো ।—কোথায ?

শিব । সে পীড়িত । নইলে সকলের আগে সে এসে প্রভুর পদ বন্দনা ক'র্ত্ত ।

দুর্গাদাস । পীড়িত ! কি পীড়া ? কোথায সে ?

শিব । ভিতবে বরে শুয়ে । বিণেষ কিছু নয় । জ্বর, সামান্য জ্বর ।

দুর্গাদাস । চল—তা'কে দেখে আসি—

এই বলিয়া সকাল বাহির হইয়া গেলেন

### চতুর্থ দৃশ্য

স্থান—দক্ষিণাত্যে মোগলশিবির । কাল—প্রভাত । ঔরংজীব ও দিলীর খাঁ দাঁড়াইয়া কথোপকথন করিতেছিলেন ।

ঔরংজীব । দিলীর খাঁ । আকবর তা' হ'লে পারস্য দেশে চলে' গিয়েছে ।

দিলীর । হাঁ, জাঁহাপনা ! একখানা ইংরাজ জাহাজ করে' ধোঁয়া উড়িয়ে সেই দিকে চলে' গেলেন ! সেখান থেকে—শুন্তে পেলাম—তিনি মক্কায যাবেন ।

ঔরঞ্জীব। (দীর্ঘনিশ্বাস ফেলিয়া) তার শিক্ষাব জন্ত এত ব্যয়, যত্ন, শ্রম, সব নিষ্ফল হ'ল।

দিলীব। না, জনাব! সে শিক্ষাব যা কিছু ফল আজ দেখা গেল। শিক্ষা না হ'লে অনুতাপ হোত না।

ঔরঞ্জীব। দিলীব খাঁ। আমিও মক্কায যাবো। আমাব জীবনের কাজ শেষ হয়েছে। একটা মাত্র বাকি আছে। বাজিয়ার উদ্ধাব সাধন করা। তুমি যদি দুর্গাদাসকে মুক্ত কবে' না দিতে, হয় ত বা যাবাব আগে সে কার্য উদ্ধাব ক'র্তে পার্তাম।

দিলীব। দুর্গাদাসকে ভয় দেখিয়ে?—না, সম্রাট—তা' হোত না। ভয় কা'কে বলে, তা' সে বীৰ জানে না। সে রাত্রিকালে কামবন্ধ যখন দুর্গাদাসের মাথাব উপব তরবাবি উঠিয়েছিল, তখন দুর্গাদাস যে কি বুক ফুলিয়ে দাঁড়িয়েছিল জনাব।—সে দৃশ্য ভুলবো না। হঠাৎ তাব মাথা যেন শৈলশিখবেব মত সোজা হ'ল। তা'ব বক্ষ আকাশেব ত্রায় প্রশস্ত হ'ল। তা'কে এত উচ্চ, এত আয়তবক্ষ আর কখনো দেখি নি জনাব!

ঔবন্দীব। হাঁ, দিলীব! দুর্গাদাস মহৎ। সে বিষয়ে সন্দেহ নাই; কিন্তু—

দিলীব। জাঁতাপনা। দেখ্ছি যে, কর্তব্যের জন্ত রাজপুত জাত শুদ্ধ ম'র্তে ভয় পায় না, তা' নয়, তা'তে যেন সে একটা গর্ব অনুভব করে। আব সেই বাড়পুত জাতির মধ্যে সেরা রাজপুত দুর্গাদাস।

ঔরঞ্জীব। স্বীকাব করি, দিলীব খাঁ!—তবে বাজিযাকে পুনঃ প্রাপ্তিব আশা ছবাশা?

দিলীর। ছরাশা নয়। আমি সে কাজ উদ্ধাব করে' দিতে পারি, জনাব—যদি আমায় সম্রাট এ বিষয়ে অবাধ অধিকার দেন।

ঔরঞ্জীব । কি উপায়ে ?

দিল্লীর । জাঁহাপনা ! আমি জানি, এই রাজপুত জাতকে, বিশেষ এই দুর্গাদাসকে, কি রকম করে' চালাতে হয় । তা'র আত্মমর্যাদার উপর নির্ভর করুন, সে পুষ্পের মত কোমল । তা'কে ভয় দেখাতে চান, সে লৌহবৎ দৃঢ় ।

ঔরঞ্জীব । উত্তম । তোমার ওপর অবাধ ভার দিলাম । আমার মাথার ঠিক নেই । আমি বুদ্ধিব দোষে মোজামকে শত্রু করে'ছি, আজীমকে লোভী করে'ছি, আকবরকে বিদ্রোহী করে'ছি, কামবক্সকে পিশাচ তৈয়ের কবে'ছি ! অথচ বুদ্ধির দোষ যে কোন্‌খানে, সেইটে বুঝতে পাবি না ।

দিল্লীর । ঐ ত, জনাব ! বুদ্ধিব দোষ কোন্‌খানে তাই যদি বোঝা গেল তা' হ'লে ত বুদ্ধিব দোষ কেটেই গেল ।

এই সময়ে কাব্লেস্‌ খাঁ প্রবেশ করিয়া অভিবাদন করিল

ঔরঞ্জীব । কি কাব্লেস্‌ খাঁ ?

কাব্লেস্‌ । আশ্চর্য ! শস্ত্রজীকে গাধার পিঠে চড়িয়ে সহর ঘুরিয়ে নিয়ে আসা হ'য়েছে । কাফেব চৌচিয়ে ব'লতে ব'লতে এসেছে 'আমায় কেউ বধ কর ।' কেউ সাহস করে নি ।—তা'কে এখন এখানে নিয়ে আস্বো, খোদাবন্দ ?

ঔরঞ্জীব । নিয়ে এসো ।

কাব্লেস্‌ । আমার ইনামটা, খোদাবন্দ !

ঔরঞ্জীব । দেব, কাব্লেস্‌ ! দেব, প্রচুর পুরস্কার দেব ।

কাব্লেস্‌ সেলাম করিতে করিতে প্রস্থান করিল

ঔরঞ্জীব । দিল্লীর খাঁ ! জীবনে আর আমার স্পৃহা নাই ! আমার উত্তম গিয়েছে । আমার মেরুদণ্ড ভেঙ্গে গিয়েছে ।—( পরে ক্ষণেক নিস্তব্ধ থাকিয়া ) যা কখন ভাবি নি সম্ভব—আমার সম্রাজ্ঞী, ভারতের

অধিশ্বরী—তা'কে কি না দিযোঁছিলাম ? দিলৌর ! এ কখন ভাবি নি—স্বপ্নেও ভাবি নি ।

দিলৌর । জাঁহাপনা ! আমি বরাবর দেখে এসেছি যে যেটা কখন ভাবা না যায়, সবার আগে সেইটেই ঘটে ।

পিঞ্জরাবদ্ধ শম্ভুজীকে লহয়া, আজীম, কাব্লেস্ ও প্রহরীবা প্রবেশ করিল

ঔরংজীব । এই যে মারাঠা বীর ! কেমন মহারাজ ! কোরাণের আর কুৎসা ক'র্বে ? মস্জিদ অপবিত্র ক'র্বে ? মোল্লার অপমান ক'র্বে ? কি ? কথা নেই যে ?

কাব্লেস্ । হুজুর ! ও উত্তর দেবে কেমন করে' ? কোরাণের নিন্দে করার দরুণ ওর জিভ কেটে দিযেছি ।

ঔরংজীব । মারাঠা বীর ! এখনো বল, কোরাণ গ্রহণ ক'র্বে ? এখনও যদি বল, তোমার জীবনদান করি ।

শম্ভুজী ঔরংজীবের উদ্দেশে পিঞ্জরের গরাদেতে পদাঘাত করিলেন

কাব্লেস্ । এই ভাংলো বুঝি ! জাঁহাপনা—একে জলদি বধ করুন । একে বধ করুন নইলে—

ঔরংজীব । যাও, এক্ষণি এর ছিন্ন মুণ্ড আমার সম্মুখে নিয়ে এসো ।

শম্ভুজীকে লহয়া আজীম, কাব্লেস্ ও প্রহরিগণ প্রস্থান করিল

ঔরংজীব । দিলৌর খাঁ ! কথা ক'চ্ছ না যে ?

দিলৌর । এর পরে আমার আর কিছু কইবার নাহি, বীরের প্রতি বীরের এই যোগ্য ব্যবহারই বটে !

ঔরংজীব । যদি শম্ভুজী কোরাণ গ্রহণ ক'র্ত্ত আমি তা'কে ক্ষমা ক'র্ত্তাম ।

দিলৌর । যদি শম্ভুজী এই সময়ে মৃত্যুভয়ে কোরাণ গ্রহণ ক'র্ত্তেন, আমি তাঁকে ঘৃণা ক'র্ত্তাম ।—জনাব ! আপনি কি ইচ্ছা করেন যে, কেউ তার বিবেকের বিরুদ্ধে ইসলাম ধর্ম গ্রহণ করে ?



ঔরঞ্জীব। দিলীর খাঁ, এই ইসলাম ধর্ম প্রচারেব জন্যই এই রাজ্যভার নিষেছি। এরই জন্য পিতাকে কারাগারে বদ্ধ করে'ছি, ভ্রাতাকে হত্যা করে'ছি। জানেন!

দিলীর। জানি, সম্রাট্! আপনি সরল ধার্মিক মুসলমান বলে' এখনো আমি আপনার পাশে দাঁড়িয়ে আছি। আপনাকে কপট বিবেচনা ক'লে' বহুদিন পূর্বে বান্দা বিদায় নিত। কিন্তু সম্রাট্! বাহুবলে কি ধর্মপ্রচার হয়? তরবারির অগ্রভাগে বিশ্বাস স্থাপিত হয়? পদাঘাতে বাজভক্তি তৈয়ের হয়? মহারাজাধিরাজ! এখনো বলি, শেষবার বলি—ফিকন। এখনো হিন্দুবিদ্বেষ পরিত্যাগ করুন। হিন্দু মুসলমান এক হোক; মন্দিরে মসজিদে স্বাধীনভাবে আল্লার ও ব্রহ্মার নাম নিনাদিত হোক; এক সঙ্গে দামামা শব্দধ্বনি উঠুক। হিন্দু মুসলমান একবার জাতিদ্বেষ ভুলে, পবম্পরকে ভাই বলে' আলিঙ্গন করুক, দেখি সম্রাট্! সেদিন হিমালয় হ'তে কুমারিকা পর্য্যন্ত এমন এক সাম্রাজ্য স্থাপিত হবে, যা' সংসাবে কেহ কখন দেখে নাই।

ঔরঞ্জীব। হিন্দু মুসলমান এক হবে, দিলীর খাঁ?

দিলীর। কেন হবে না সম্রাট্? তা'রা এতদিন একই আকাশের নীচে, একই বাতাস সেবন করে', একই জল পান করে', একই ভূমিজাত শস্য খেয়ে আস্ছে। এখনো কি তা'দের প্রাণ এক হয় নি? তা'রা একবার ধর্মভেদ, জাতিভেদ, আচারভেদ, ভুলে, নতজানু হ'য়ে, করযোড়ে ভক্তিবাস্পগঙ্গাদ্বারে এই শ্যামলা সূজলা ভারতভূমিকে একবার প্রাণভরে' মা বলে' ডাকুক দেখি সম্রাট্!

ঔরঞ্জীব। দিলীর খাঁ! তুমি স্বপ্ন দেখছো।

দিলীর। আমায় মাফ ক'রবেন, জাঁহাপনা! আমি স্বপ্নই দেখছিলাম বটে। কিন্তু বড় সুখের স্বপ্ন।—ভেঙ্গে গেল!

ঔরঞ্জীব। (স্বগত) তা, যদি হোত। তা' যদি হোত।—না,

বড় অধিক বিলম্ব । এ বয়সে আর নতুন উদ্দেশ্য নিয়ে—রঙ্গভূমিতে নামতে পারি না । ( প্রকাশে ) দিলীর খাঁ, আমি বুঝতে পারছি না যে, আমি কি ক'ছি—আমি যন্ত্রবৎ কাজ কবে' যাচ্ছি । ভাবতে পারছি না—সব ঝাপসা দেখছি । মাথা ঘুরছে । দিলীব ! আমি আর সে ঔরংজীব নই—আমি তা'র কঙ্কাল মাত্র ।

দিলীর । এখন কিছু দেবী আছে, জনাব । এখনো সে কঙ্কালের উপর মা'সটুকু বুলছে ; ঝরে' পড়ে নি । তবে তার বড় বেশী দেবীও নাই ।

এই সময়ে কাব্লেস্ শত্ৰুজীর ছিন্ন মুণ্ড এক রৌপ্যপাত্রে আনিয়া সত্রাটের পদতলে রাখিল । সঙ্গে রঙাক্ত আজীম ও প্রহরিগণ

ঔরংজীব । শত্ৰুজীর মুণ্ড !—যাও, নিয়ে যাও ।

দিলীর । দাবার রক্তে যে রাজত্বের আবস্ত হ'য়েছিল, এই বীরের বক্তে সেই রাজত্বের শেষ হ'ল ।

এই বলিয়া দিলীর খাঁ চলিয়া গেলেন

কাব্লেস্ । জাঁহাপনা ! আমাব ইনাম ?

ঔরংজীব । তোমার পুরস্কাব ? এই যে—প্রহবীদিগকে কহিলেন “বাঁধো ।”

কাব্লেস্ । যাঁ—আমাকে—

প্রহরীরা কাব্লেস্ খাঁকে বন্ধন করিল

ঔরংজীব । আজীম । একে বাইরে নিয়ে যাও—এর মুণ্ড নিয়ে এসো ।—কাব্লেস্ খাঁ । আমরা অনেক সময়ে বিশ্বাসঘাতকের সাহায্য নিতে বাধ্য হই বটে । কিন্তু অন্তরে তাদের ঘৃণা করি—যাও, যেখানে তোমার মুনিব শত্ৰুজী গিয়েছে ।

কাব্লেস্ । আজ্ঞে, জাঁহাপনা !

ঔরংজীব । যাও ।

বলিয়া চলিয়া গেলেন

আজীম । চল কুত্তা !

কাবলেস্ । দোহাই সাহজাদা সাহেব । আমায় মার্কেন না । আমি  
আপনার গোলাম হ'বে থাকুবো । আপনাব—

আজীম । চল নেমকহাবাম—

বলিয়া যষ্ট প্রহার করিলেন

কাবলেস্ । মারো, মারো, মাবো—জুতা মারো—নাথি মারো—  
তা'র পরে নাথি মে'রে তাড়িয়ে দাও—শুধু একেবারে মে'রে ফেলো না—  
দোহাই ।

### পঞ্চম দৃশ্য

স্থান—যোধপুরের প্রাসাদ । কাল—রাত্রি । অজিতসিংহ ও শ্যামসিংহ

শ্যাম । মহাবাজ বিবাহ করে'ছেন তবে রাণার ভ্রাতুষ্পুত্রীকে ?

অজিত । হাঁ, মহারাজ । সেনাপতি দুর্গাদাস সম্প্রতি উদয়পুরে  
গিয়েছিলেন । সেখান থেকে এ বিবাহেব প্রস্তাব নিয়ে আসেন । আমি  
তা'তে স্বীকার হই ।

শ্যাম । মহারাজ । এ বড় সৌভাগ্য যে, আজ মেবারের ও  
মাড়বারেব ঘর মিলিত হ'ল । গজসিংহের কন্যাটিও শুনিছি পরম  
রূপবতী ।

অজিত । কিন্তু কাঠের পুতুল ; নেহাৎ বালিকা ।

শ্যাম । ঐ কাঠের পুতুলই একদিন রক্তমাংসে গড়ে' আসবে । কিছু  
ব'লতে হবে না, মহারাজ ।

অজিত । একটা কথাও কৈতে জানে না ।

শ্যাম । শিখবে ! মহারাজ, শিখবে ! মেয়েমানুষ টিয়াপাখীর

জাত—সীতারাম পড়ান, তা'ও প'ড়বে, আবার রাধাকৃষ্ণ পড়ান, তা'ও পড়বে। মহারাজ। রাণা শুন্ছি তাঁ'র ছোটরাণীকে ত্যাগ ক'রেছেন। কথা কি সত্য ?

অজিত। হাঁ, মহারাজ। তিনি তাঁ'কে মাসোযাবা দিচ্ছেন।

এই সময়ে দুর্গাদাস প্রবেশ করিলেন

শ্রাম। কি দুর্গাদাস। সাহজাদা কোথায় ?

দুর্গাদাস। আমি তাঁ'কে সেনাপতি সূজাযেৎএব হাতেই দিয়েছি। আপনার হাতে দেওয়ার চেয়ে তা'ব হাতে দেওয়াই শ্রেয় মনে ক'রলাম।

শ্রাম। কি আমাদের কি বিশ্বাস হ'লো না ?

দুর্গাদাস। মহারাজ। সত্য ব'লতে কি—বিশ্বাস ঠিক হ'লো না। কিন্তু একই কথা ত। তাঁ'কে সত্রাটেব সমীপে আপনি নিয়ে গেলেও যা', সূজাযেৎ নিয়ে গেলেও তা'।

শ্রাম। হাঁ—না—হাঁ—তা' বেশ করে'ছেন। সাহজাদীকে তাঁ'র হাতে দেওয়াও যা', আমার হাতে দেওয়াও তা'।

অজিত। সাহজাদী। কোন সাহজাদী ? দুর্গাদাস ?

দুর্গাদাস। আকবর সাহেব কন্যা বাজিয়া উৎ উন্নিসা। তাঁ'র বিনিময়ে আমি মাড়বারপতির জন্ত তিনটি জনপদ বিনা যুদ্ধে লাভ করে'ছি।

অজিত। কি দুর্গাদাস ? তুমি কি ব'লতে চাও, দুর্গাদাস যে, তুমি আমার—তুমি বাজিয়াকে মোগলের হাতে ফিরিয়ে দিয়েছো ?

দুর্গাদাস। হাঁ, মহারাজ। তা'কে ফিরিয়ে দিয়েছি।

অজিত। ( ক্ষণেক স্তব্ধ রহিলেন। পরে কহিলেন ) তাঁ'কে মোগলের হাতে ফিরিয়ে দেবার তোমার অধিকার কি, সেনাপতি ?—রাজা আমি ! আমার অনুমতি না নিয়ে—

শ্যাম । আমিও তাই সেনাপতিকে বলে'ছিলাম, মহারাজ ! যে মহারাজের অনুমতি না নিয়ে—

অজিত । তবে তুমিও এই চক্রান্তেব মধ্যে আছে, বিকানীরপতি ?

দুর্গাদাস । অনুমতি নিই নাই, কাবণ অনুমতি চাইলে পেতাম না, মহারাজ ! আব আকবর আব তাঁর পবিবাব আমার আশ্রয় নিয়েছিলেন । মহাবাজের আশ্রয় নেন নি ।

অজিত । তোমাব এতদূর স্পর্ধা দুর্গাদাস ! ভেবে'ছা—

ক্রোধে তাঁহার কণ্ঠ কঁদে হহল

দুর্গাদাস । শুনুন, মহাবাজ । স্পষ্ট কথা বলি । আমি জেনেছি যে আপনি সাহজাদীর প্রণয়মুগ্ধ । এ কথা আমি যোদিন দাফনাত্য হ'তে ফিরে আসি, সেদিন মুকুন্দদাসের কাছে শুনি । তা'র পব নিজেও লক্ষ্য ক'রেছি । এ প্রেম কোন পক্ষেরই শুভ নয় । কারণ আপনাদেব বিবাহ হ'তে পারে না । আমি সেই জনহ উদয়পুরে আপনার বিবাহের প্রস্তাব করি । সেখানেই এই বিকানীরপতি সাহজাদীকে ফিবিয়ে দেবার প্রস্তাব করেন । আমি তা'তে সম্মত হই ।

অজিত । সম্মত হও ! প্রচুব উৎকোচ নিয়েছ বুকি, সেনাপতি ?

দুর্গাদাস । উৎকোচ মহারাজ । তা' যদি নিতাম—না ক্ষমা কর্কেন মহাবাজ । আমি অন্তায় ব'লতে যা'চ্ছিলাম ।

অজিত । ক্ষমা !—দুর্গাদাস ! এই উৎকোচ নেওয়ার অপরাধে তোমাকে মাড়বার থেকে চিরনির্বাসিত ক'লাম ।

দুর্গাদাস । যে আজ্ঞা, মহারাজ !

এই বলিয়া দুর্গাদাস সেলাম করিয়া প্রস্থান করিলেন

অজিত । চক্রাস্ত—চক্রাস্ত—একটা প্রকাণ্ড চক্রাস্ত !

শ্যাম । মহারাজ ! আমি এব মধ্যে নেই—আমি বলে'ছিলাম !

অজিত । দূর হও—

বলিয়া শ্যামসিংহকে পদাঘাত করিয়া দূর করিয়া দিলেন

অজিত । রাজিয়া ! তবে তোমায় হারালাম ! জন্মেব মত হাবালাম !  
আর তোমার জন্ম আমি দুর্গাদাসকেও হারালাম !

বলিয়া সেই কক্ষমধ্যে পদচারণা করিতে লাগিলেন

কাশিম দ্রুতপদক্ষেপে সেই কক্ষে প্রবেশ করিল

কাশিম । রাজা । মহাবাজ দুর্গাদাস কোথায় ?

অজিত । তিনি বাজ্য পরিত্যাগ কবে' গিয়েছেন ।

কাশিম । তিনি নিজে গিয়েছেন, না তুই তাড়িয়ে দিয়েছিস্—শ্যাম-  
সিংহের মুখে যা' শুন্লাম, সত্য ?

অজিত । হাঁ, আমি তা'কে নির্বাসিত কবিছি ।

কাশিম । তা বুঝিছি । কেন তাড়িয়েছিস্, রাজা ?

অজিত । উৎকোচ—ঘুষ নেওয়ার জন্ম ।

কাশিম । ঘুষ ?—মহাবাজ দুর্গাদাস ঘুষ নিবেছে ?—ভ্যালারে ভ্যালার !  
ওকথা মুখেও আন্নি ! দুর্গাদাস ঘুষ নিবেছে ! দুর্গাদাস ঘুষ নিলে তোর  
মত একটা মহাবাজা হতি পার্ত্ত না ? সে ইচ্ছা ক'লে তোকে পায়ে ঠেলে  
দিয়ে ঘোষণাপুরের রাজা হয়ে ব'স্তি পার্ত্তো না ? দুর্গাদাস ঘুষ নেবে ?  
হাঁবে নেমকহারাম ! যে তোরে একদিন জান দিয়ে বাঁচিয়েছে ; ধড়ের  
রক্ত দিয়ে এই পঁচিশ বছর ঢাণের জন্ম লড়েছে, তার এই বুড়ো বয়সে তুই  
তাড়িয়ে দিলি—পরের ছুয়ারে ভিক্ষে মেগে খাতি ! এই তোর ধর্ম হ'লরে  
নেমকহারাম ?

অজিত । কাকা—

কাশিম । খব্দার ! আর মোরে কাকা বোলে ডাকিস্ না । মুই  
এমন নেমকহারামের কাকা নই ! মুই আর তোর রুটি খাতি চাই

পঞ্চম অঙ্ক

দুর্গাদাস

না। মুঠও যাবো। খাটি খাবো। খাটি ভিক্ষে মেগে আমার  
মহারাজ দুর্গাদাসকে খাওয়াবো। তা'ব কিম্বত তুই কি বৃষ্টি রে  
নেমকহারাম!

বলিয়া কাশিম চলিয়া গেল

অজিত কোন কথা না কহিয়া বিপরীত দিকে নিষ্ক্রান্ত হইলেন

### ষষ্ঠ দৃশ্য

স্থান—ঔরঙ্গাবাদ রাজপ্রাসাদ। কাল—অপরাহ্ন। গুলনেয়ার একাকিনী দ্বিতলকক্ষের  
মধ্যে দাঁড়াইয়াছিলেন। সম্মুখে রাজভৃত্য।

গুলনেযাব। কি? সম্রাট ব'ল্লেন ফুস'ৎ নাই?

ভৃত্য। হাঁ, বেগমসাহেবা! বাদশাহ মক্কায় যাবার আয়োজন ক'চ্ছেন।  
এখানে আসবার তাঁর ফুস'ৎ নাই।

গুলনেযার। আচ্ছা যাও!

ভৃত্য চলিয়া গেল

এতদূর! আমি সম্রাটকে আমার পুত্রের বিজাপুর গমন রহিত ক'র্ত্তে  
ব'ললাম—উত্তর এলো 'তাঁকে যেতেই হবে।' সম্রাটকে ডেকে পাঠলাম—  
উত্তর এলো ফুস'ৎ নেই! ..ছ' মানুষের যখন পতন হয়, এই রকমই হয়  
বটে! সময় বদলেছে। কিন্তু আমি এ কথা আজ নীরব হ'য়ে গুললাম!—  
আশ্চর্য্য! আমি কি সেই গুলনেযার? বিশ্বাস হ'চ্ছে না। দেখি—  
(আঘনায় গিয়া নিজমূর্ত্তি দেখিয়া কহিলেন) একি! সত্যই ত, আমি  
সে গুলনেয়ার নই। চক্ষু কোটরে সঁদিয়েছে; গণ্ড বসে' গিয়েছে;  
চুল সব পেকে গিয়েছে। আমি ত সে গুলনেয়ার নই!—কে আমি?  
(চীৎকার করিয়া) কে আমি?

এই সময়ে রাজিয়া প্রবেশ করিয়া ডাকিল—

রাজিয়া। সম্রাজ্ঞী!

গুলনেয়ার । কে ? রাজিয়া ! কি বলে' ডাকলে ? সম্রাজ্ঞী ? আমি তবে সম্রাজ্ঞী ! আমি তবে সেই গুলনেয়াব ।

রাজিয়া । ঠান্দিদি—

গুলনেয়াব । রাজিয়া ! আমার পানে চেয়ে দেখ্ দেখি—সত্য সত্য বল্—আমি সেই গুলনেয়ার কি না ?

রাজিয়া । ঠান্দিদি । তুমি সেই গুলনেয়ার কি না জানি না । কিন্তু তুমি আমাব সেই ঠান্দিদি !

গুলনেয়াব । সত্য কি, রাজিয়া ? চিল্লে পাচ্ছিস ? সত্য কবে' বল্ দেখি—চিল্লে পাচ্ছিস ? সেই একদিন আমায় দেখেছিলি ভারতসম্রাজ্ঞী গুলনেয়াব—ভাবতসম্রাট্ যা'ব রূপা-কটাঙ্কের জন্ত লালায়িত হোত ; শত রাজ্য জনপদ অনক্ষ্যে যা'র বোধকুঞ্চিত ক্রভঙ্গ সভয়ে লক্ষ্য ক'র্ন্ত ; দৃঢ়মুষ্টি-বদ্ধরূপাণ দশ লক্ষ সেনানী যা'ব তজ্জনীর দিকে ইঙ্গিতেব অপেক্ষায় চেয়ে থাকতো ! আর আজ আমি—সম্রাট্‌এব উপেক্ষিত, বাজন্তবর্গেব ধিক্কৃত, বিশ্বের বর্জিত । আমি সেই গুলনেয়াব কি ? চে'য় দেখ ভালো কবে' ।

রাজিয়া । ঠান্দিদি । তুমি আমাব সেই ঠান্দিদি ! জগৎ তোমায় বর্জন কবে, ককক । আমি তোমায় আঁকড়ে থাকবো ।

গুলনেয়ার । কেন, রাজিয়া ? আমি তো'র কবে কি ক'বেছি ?

রাজিয়া । কিছু কব নাই । কাবণ ঠান্দিদি আমার সমহুঃখিনী । আমিও অভাগিনী—ভালোবেসেছি ।

গুলনেয়াব । তুই ভালোবেসেছিস ? কাকে, রাজিয়া ? কিন্তু আমার মত বেসেছিস্ কি ? আমার মত—ভালোবাসার তুষানলে জলেছিস্ ? একটা সাম্রাজ্য তা'র জন্ত বিলিয়ে দিইছিস্ ? পরে তা'র দ্বারা প্রত্যাখ্যাত হইছিস্ ?—না, রাজিয়া ! তুই এ দাহ কল্পনাও ক'র্ন্তে পারিস না—সেইদিন হ'তে আমাব সব শেষ হ'য়েছে । আজ যা দেখছিস্, সে



গুলনেয়ার নয় ; তার কবাল । আর আমি সে গুলনেয়ার নেই—সব  
গিয়েছে !

এই সময়ে বাঁদী প্রবেশ করিয়া রাজিয়াকে ডাকিল—

বাঁদী । সাহজাদী । আসুন !

বাজিয়া । দাঁড়া, যাচ্ছি একটু পবে ।

বাঁদী । না, সাহজাদি ! বাদসাহেব হুকুম নেই ।

গুলনেয়াব । কি হুকুম নেই, বাঁদি ?

বাঁদী । সাহজাদীকে এখানে আসতে দেওয়া—( এই বলিয়া বাঁদী  
বাজিয়াকে কহিল ) চলুন ।

রাজিয়া বাম্পাকুললোচনে গুলনেয়ারের মুখের দিকে চাহিলেন

গুলনেয়ার । যাও !

রাজিয়া চলিয়া গেলেন

গুলনেয়াব । আমি আজ এতই হেয় । নিজের পোস্তীর সঙ্গে কথা  
কইবারও যোগ্য নহি ! একটা বাঁদিও চোখ রাঙিয়ে যায় ! না, এর শেষ  
ক'র্ত্তে হবে । ভৃত্যেবও ধিক্কৃত হয়ে গুলনেয়াব এ রাজ্যের পশ্চাৎকক্ষে  
বাস ক'র্ত্তে না । এ রাজ্যে সম্রাজ্ঞী হ'য়ে প্রবেশ করে'ছিলাম ! সম্রাজ্ঞী  
হ'য়ে এখান থেকে যাবো ।

গাহিতে গাহিতে নৃত্য সহকারে একদল বৈরাগী নীচে রাস্তা দিয়া চলিয়া গেল

গীত

জীবনটা ত দেখা গেল শুধুই কেবল কোলাহল ।

এখন যদি সাহস থাকে, মরণটাকে দেখ'বি—

ওরে মরণটাকে দেখ'বি, ওরে মরণটাকে দেখ'বি চল ।

পড়ে' আছে অসীম পাথার, সবাই তাতে দিচ্ছে সঁতার

অঙ্গ এলে অবশ হ'য়ে, সবাই যাবে রসাতল ।

উপরে ত গর্জে ঢেউ সে, দণ্ডমাত্র নয়'ক স্থির;  
 নীচে পড়ে' আছে অগাধ স্তব্ধ সিন্ধুনীর ;  
 এতদিন ত ঢেউয়ে ভেসে, দিগ্গি সাতার উপর দেশে—  
 ডুব দিয়ে আজ দেখুনো, নীচে কতখানি গভীর জল ।

গুণনেয়ার । ঠিক বলে'ছে 'ডুব দিয়ে আজ দেখবো নীচে কতখানি  
 গভীর জল।' ব্যস্! তাই হোক । কিসের ভয় ? সেই ভালো । ১  
 আজ আত্মহত্যা কর'ক ।

এই সময়ে কামবক্স সেই কক্ষে প্রবেশ করিয়া কহিলেন—

কামবক্স । মা ! আমি বিদায় নিতে এসেছি ।—এখনি বিজাপুবে  
 যাচ্ছি । পিতার আদেশ ।

গুণনেয়ার । হাঁ, শুনেছি । তোমার পিতার আদেশ । আম বাধা  
 দেবার কে ? যাও ।

কামবক্স গুণনেয়ারের চরণ স্পর্শ করিলেন । গুণনেয়ার শুদ্ধ ঈষৎ মস্তক  
 হেঁট করিলেন । পরে কহিলেন—

কামবক্স, এই আমাদের শেষ দেখা পুত্র ।

কাম । কেন মা ?

গুণনেয়ার । কেন ? কারণ আমি ম'ক্ক—আমি ম'ক্ক—আমি  
 আত্মহত্যা কর'ক !

কাম । সে কি, মা ! জানি মা তোমার মন উত্থিত হ'য়েছে ! কিন্তু—

গুণনেয়ার । ম'ক্ক কেন ? জান্তে চাও ? তবে শুন । যতদিন আমি  
 সম্রাজ্ঞী হ'য়েছিলাম—ততদিন বেঁচে'ছিলাম ! যতদিন শাসন করে'  
 এসেছিলাম—বেঁচে'ছিলাম ! যতদিন মাথা উঁচু করে' গর্বে থাকতে  
 পেরেছিলাম—বেঁচে'ছিলাম । আজ সম্রাটের তাম্বিল্য নিয়ে, ভৃত্যের  
 ধিক্কার নিয়ে, পুত্র-প্রপৌত্রের করুণা নিয়ে, মাটিতে মুখ লুকিয়ে গুণনেয়ার  
 থাকতে চায় না !

কাম। আবার সে দিন আসবে। মা, পিতার মার্জনা ভিক্ষা কর।

গুলনেয়ার। কি, কামবল্ল ? মার্জনা ! আমি মার্জনা ভিক্ষা ক'রব ? আমার পুত্র না তুমি ?—কামবল্ল ! সূর্য্য যে গবিমায় উঠে সেই গরিমায় অস্ত যায়।—যাও ! কিন্তু ফিরে এসে তোমার মাকে আর দেখতে পাবে না !

কাম। মা—

গুলনেয়ার। চুপ ! কোন কথা নয়। আমি স্থিরপ্রতিজ্ঞ ! জেনো, ক্রব জেনো, আমাদের ইহজগতে এই শেষ দেখা—যাও—

। কামবল্ল ধীরে অবনত মুখে চলিয়া গেলেন।

গুলনেয়ার। সূর্য্য অস্ত যাবার অধিক বিলম্ব নাই। বাঁদি !—না, কেউ নাই। একটা দাসীও আজ আমার আত্মার অপেক্ষা করে থাকে না। স্বেচ্ছায় চলে' যায়। গিয়েছে—আমাব গরিমা বৈভব সব গিয়েছে। আমিও যাই।

এই বলিয়া গুলনেয়ার সেখান হইতে নিষ্ক্রান্ত হইলেন। ক্ষণপরে ঔরঞ্জীব

জনৈক পরিচারিকার সঙ্গে সেখানে আসিয়া উপস্থিত হইলেন

ঔরঞ্জীব। কৈ সম্রাজ্ঞী ?

বাঁদী। জানি না। এখানেই ত ছিলেন। বোধ হয় ভিতরে গিয়েছেন।

ঔরঞ্জীব। খবর দাও।

বাঁদী চলিয়া গেল

ঔরঞ্জীব। দুর্গাদাস ! আমি তোমার কাছে বাহুবলে পরাজিত হ'য়েছিলাম, কিন্তু তা'র চেয়ে এই পরাজয় অধিক। তুমি গুলনেয়ারের মত নারীকে মুঠোর মধ্যে পেয়ে ফিরিয়ে দিয়েছো, গুলনেয়ারের মত সম্রাজ্ঞীর প্রেম প্রত্যাখ্যান করে'ছ। তুমি মহৎ ! দিল্লীর খাঁর অহুরোধ,

আর তোমার সম্মানে, আজ গুলনেয়ারকে ক্ষমা ক'র—সত্য কথা, দিলীর খাঁ—মক্কায় যাবার আগে এক উগ্র, উচ্ছ্বল নারীর প্রতি আর ক্রোধ রাখি কেন ?

গুলনেয়ার অধিকতর সজ্জিতভাবে প্রবেশ করিলেন

গুলনেয়ার। কে ? কে, সম্রাট ? এত অমুগ্রহ যে ?

ঔরংজীব। সম্রাজ্ঞী !

গুলনেয়ার। চূপ। আর আমি সম্রাজ্ঞী নই। যতদিন তোমায় শাসন করে'ছিলাম, ততদিন আমি সম্রাজ্ঞী ছিলাম। আজ আর আমি সম্রাজ্ঞী নই। আমি শুধু গুলনেয়ার।—কি বলবে বল।

ঔরংজীব। একি গুলনেয়ার ? এর মধ্যে তোমার এত পরিবর্তন ! একি ! তোমায় চেনা যাচ্ছে না যে !

গুলনেয়ার। সম্রাট ! আমার গৌরবের সঙ্গে সঙ্গে আমার রূপেরও সমাধি হ'য়েছে। এখন এখানে কি মনে করে' সম্রাট ? বল ? অধিক সময় নাই ! আমি ম'র্ত্তে যাচ্ছি। আমি বিষ পান করে'ছি !

ঔরংজীব। সে কি ? বিষ পান করে'ছো গুলনেয়ার ? কেন ?

গুলনেয়ার। কেন ? জিজ্ঞাসা করছ ? স্ববির শীর্ণ ঔরংজীব ! তোমার তাচ্ছিল্য নিয়ে আমি জীবন ধারণ করব মনে করে'ছিলে ? তোমার কৃপা ভিক্ষা করে' বেঁচে থাকবো ভেবেছিলে ? ঐ সূর্যের পানে তাকাও, তার পরে আমার পানে চাও—বল দেখি, দেখে বোধ হয় না কি যে, আমরা দুই ভাই বোন ! সম্রাজ্ঞী হ'য়ে দিগন্তরেখায় উঠেছিলুম, সম্রাজ্ঞী হ'য়ে দিগন্তরেখায় অস্ত যাচ্ছি !

ঔরংজীব। গুলনেয়ার ! আমি এসেছি আজ তোমায় ক্ষমা ক'র্ত্তে। তোমার যা' কেড়ে নিয়েছিলাম, সব ফিরিয়ে দিতে।

গুলনেয়ার। ক্ষমা !

ঔরঞ্জীব । তোমায় আর ভালোবাসতে পারি না, গুলনেয়ার ! তুমি জানো না গুলনেয়ার ! যে তুমি আমার সর্বনাশ করে'ছো । আমার আশা, উদ্যম, প্রেম, বিশ্বাস এক মুহুর্তে এক সঙ্গে ভেঙ্গে দিয়েছো । যৌবনে এ সব ভেঙ্গে আবার ঘোড়া লাগে । কিন্তু বার্ককে যা' ভাঙ্গে, আর ঘোড়া লাগে না । আমার সব গিয়েছে । আমিও ম'র্তে যাচ্ছি । এখন তোমায় আর ভালোবাসতে পারি না । আমার সে শক্তি নাই । কিন্তু তোমায ক্ষমা ক'র্তে পারি ।

গুলনেয়ার । ক্ষমা ?—সত্ৰাট ! তুমি আমায় ক্ষমা ক'র্বে ?

ঔরঞ্জীব । নীচ শ্রেণীর লোকে কুলটা স্ত্রীর পৃষ্ঠে কুঠার মারে । সাধারণশিক্ষিত লোকে তা'কে পরিত্যাগ করে । মহৎ ব্যক্তি ক্ষমা করে ।

গুলনেয়ার ! ( ব্যঙ্গস্বরে ) কি মহৎ তুমি ! কি সত্ৰাট ! গুলনেয়ার কখনো কাউকে ক্ষমা করে নি ; সে কারো ক্ষমা চাহেও না ।

ঔরঞ্জীব । তুমি ভুল বুঝেছ, গুলনেয়ার । আমি মহৎ নহি ! তবে দিল্লীর খাঁ মহৎ । আমি এখন যন্ত্রবৎ কাজ করে' যাচ্ছি । দিল্লীর খাঁ আমায় তোমাকে ক্ষমা ক'র্তে ব'লেছে । তাই তার অনুরোধ আর—

গুলনেয়ার । দিল্লীর খাঁর অনুরোধে ? যাও, সত্ৰাট ! তোমার ক্ষমা আমি চাই না । আমি নরকে নেমে যাচ্ছি—সঙ্গে হৃদয় পূর্ণ করে' নিয়ে যাচ্ছি—সেই হুর্গাদাসের প্রতি তীব্র অসীম বিরাত ভালোবাসা । যদি তা'কে পেতাম, আমি তা'কে একখণ্ড মেঘের মত, আমার সেই ভালোবাসার ঝঞ্জা দিয়ে, ঘিরে, টেনে' সঙ্গে করে' নিয়ে যেতাম ; তা'কে সেই ঝ্পার আলায় তিলে তিলে তুষানলের মত দগ্ধ ক'র্তাম । তাকে পাচ্ছি না । কিন্তু বুঝি এক-দিন কোথাও পাব । তখন তা'কে দেখবো । ঔরঞ্জীব ! বিশ্বসংসারে বুঝি কেহ কেহ আছে, যা'দের ভালোবাসা প্রতিহিংসার মত প্রবল, উদ্ভাম, আলাময় ! জেনো আমি সেই নারী ।—আমার মাথা ঘুর্ছে, আর পাচ্ছি না । আমি ম'র্ছি । কোন দুঃখ নাই আমার, ঔরঞ্জীব !

পড়ে'ছি বলে' কোন দুঃখ নাই। উঠেছিলাম—পড়ে'ছি। ষাড়া মাটি কামড়ে পড়ে' থাকে, তারা পড়ে না। কোন দুঃখ নাই। যদি নারী হ'য়ে জন্মগ্রহণ করে'ছিলাম, পুরুষকে বেখেছিলাম মুঠোর মধ্যে। যদি সম্রাজ্ঞী হ'য়েছিলাম—সাম্রাজ্য শাসন ক'রেছিলাম! যদি ভালোবেসেছিলাম— ভালোবাসা দান ক'রেছিলাম! ভিক্ষা কবি নি!—কোন দুঃখ নাই। একদিন ম'র্তে হবেই। তবে দিন' থাকতে মরানি ভালো; ঐ সূর্য্য অস্ত গেল—আমিও যাই।...

বলিয়া ভূপতিত হইলেন

ঔবংজীব। যাও, গুলনেয়ার! তুমি অন্ততপ্ত চিত্তে মর নাই। মরণের পরপাবে বোধ হয় তোমার অন্ততাপ আবস্ত হবে! কিন্তু আমার অন্ততাপ মৃত্যুর পূর্বেই আবস্ত হ'য়েছে।

### সপ্তম দৃশ্য

স্থান—আগ্রার আসাদের যমুনালগ্ন অলিন্দ। কাল—সন্ধ্যা। দিলীর থা

এবং একজন কর্মচারী কথা কহিতেছিলেন।

কর্মচারী। সম্রাটের মৃত্যু হ'য়েছে?

দিলীর। হাঁ, মোবারেক! বড় শোচনীয় মৃত্যু সে। তাঁ'র শয্যাপার্শ্বে তাঁ'র একজন পুত্রও ছিল না—তাঁ'র বেগম ছিল না।—একা আমি! বড় শোচনীয় মৃত্যু!

কর্মচারী। তাঁ'র মক্কায যাবার কথা ছিল না?

দিলীর। হাঁ! কিন্তু আর যাওয়া হয় নাই। মৌলতাবাদে তাঁ'র মৃত্যু হয়। মৃত্যুর সে দৃশ্য আমি ভুলনো না। অন্ততপ্ত হৃদয়ের অর্ধ-সুপ্ত অবস্থার সেই মন্যভেদী ক্রন্দন “ক্ষমা কর মারাঠা, ক্ষমা কর রাজপুত, ক্ষমা কর পাঠান।” তার পর ম'র্কার পূর্বে মুহূর্তেই সেই

ভয়বিহ্বল ভগ্ন উক্তি “ঐ সম্মুখে মৃত্যুর কৃষ্ণ সমুদ্র। তাতে তরী ভাসিয়ে দিলাম।” শেষে ‘হো আল্লা বলে’ সেই মর্ষভেদী চীৎকার—সে দৃশ্য ভুলবো।

কর্মচারী। বড শোচনায।—এখন সম্রাট কে হন বলা যায় না!

দিনীব। যুদ্ধ বেধেছে, মোজাম আব আজীমে। ফল জগদীশ্বর জানেন।

কর্মচারী। আপনি সাহজাদী বাজিযাকে এখানে নিয়ে এসেছেন?

দিনীব। হাঁ, মোবারক। সাহজাদীর আজ পিতা নাই, মাতা নাই—কেহ নাই। তাঁ’র মত দুঃখিনী কে?—এখানে তাঁ’কে এক বৃদ্ধা পরিচারিকার কাছে বেঁধে যেতে হ’চ্ছে।

কর্মচারী। আপনি কোথায় যাবেন?

দিনীব। আমি যাবো একবার দুর্গাদাসের উদ্দেশে।

কর্মচারী। কেন?

দিনীব। প্রয়োজন আছে। এখন চণ বাসবে যাই।

উভয়ের নিজস্ব

উদলানুভাবে ধীরে ধীরে সেখানে রাজিযা প্রবেশ করিলেন

রাজিযা। আমি তাঁ’কে ভালোবেসেছিলাম। তাঁ’তে কি অন্যায় হ’য়েছিল? কে আমাদের বিচ্ছিন্ন ক’লে? কেন ক’লে?—এত সুখ তাঁ’দের মৈল না!

পরিচারিকা প্রবেশ করিল

পরিচারিকা। ওগো সাহাজাদি!

রাজিযা। সে দিন আমাদের সেই আবুগিরি দুর্গে শুভ্র জ্যোৎস্নালোকে পর্বতপাদমূলে দেখা হো’ল—কেন আমাদের দেখা হো’ল, অজিত?

পরিচারিকা। ঐ সেই আবার বিড়ির বিড়ির করে ব’কছে। বলি, ও সাহজাদী!

রাজিযা। অজিত! অজিত! তাঁ’র নামটিও কি মিষ্ট! অজিত!

পরিচারিকা। না, ও এখনও উত্তর দেবে না। আমি এখন যাই।  
সাহজাদীর রকমই আলাদা।

বলিয়া চলিয়া গেল

রাজিষা। সন্ধ্যাব বাতাস বইছে—কোকিল ডাকছে। নীলসলিলা  
যমুনা নদী প্রাসাদমূল বেঁঠন ক'রে যাচ্ছে। আকাশ কি নিশ্চল, কি নীল!

তবে, আর কেন বহে মলয়পবন, আর কেন পাখী করে গান?

আজি, হৃদয়কুঞ্জে সুখমধুমাস হ'য়ে গেছে যবে অবসান।

আজি, চলে' গেছে এক সঙ্গীত, ছিল ছেয়ে যা আকাশ ভুবনে—

আমার নয়ন হইতে নিভে গেছে জ্যোতি, হৃদয় হইতে গেছে প্রাণ।

গাহিতে গাহিতে প্রস্থান

## অষ্টম দৃশ্য

স্থান—পেশোলা হৃদতীরের প্রাসাদ। কাল—মধ্যাহ্ন। দুর্গাদাস একাকী দাঁড়াইয়া  
সে দৃশ্য দেখিতেছিলেন।

দুর্গাদাস। ব্যর্থ হ'য়েছি। পার্লেমেন্ট না এ জাতিকে টেনে তুলতে।  
মোগল সাম্রাজ্য থাকবে না বটে, কিন্তু এ জাতি আর উঠবে না।

জয়সিংহ ও সরস্বতী আসিয়া পদবন্দনা করিলেন

সরস্বতী। ভিতরে আসুন, দেব। জল গ্রহণ করুন! দ্বিপ্রহর  
অতীত হ'য়েছে।



দুর্গাদাস । যাচ্ছি চল, মা !

জয় । এখানে আপনাব কোন কষ্ট হ'চ্ছে না ?

দুর্গাদাস । কষ্ট ? রাণার আতিথ্যে আমি পরম সুখে আছি ।

জয় । আমার আতিথ্য ব'লবেন না । সরস্বতীর আতিথ্য । সরস্বতীই এ স্থান পছন্দ করে দিয়েছে । সরস্বতীই এ ক্ষুটিক হর্ম্য তৈয়ার করিয়েছে । যে দিন আপনি আমাদের অতিথি হ'য়ে এক নির্জন স্থানে থাকবার ইচ্ছা প্রকাশ করেন, সেই দিন সে নিজে এখানে এসে সমস্ত বন্দোবস্ত কবেছে । এখানে প্রতিদিন সে আপনার জন্ম নিজে পাক করে ।

দুর্গাদাস । অসীম অনুগ্রহ মহারানীর !

সরস্বতী । অনুগ্রহ ? অনুগ্রহ ব'লবেন না । দেব ! এ দীনের অর্ঘ্য, ভক্তের নৈবেদ্য । রাজস্থানে কে আছে, রাঠোর দুর্গাদাসের নামে যার বক্ষ স্ফীত না হয়—শির গর্বে উন্নত না হয় ? যদি একান্ত ভাগ্যবলে, পূর্বজন্মের পুণ্যফলে এই দেবতাকে অনিধি স্বরূপে পেয়েছি, পূজা করে' সাধমেটাবো ।

দৌবারিকের প্রবেশ

দৌবারিক । মহারাজ ! দ্বারে মোগল-সেনাপতি দিলীর খাঁ রাঠোর সেনাপতির সাক্ষাৎ চান ।

দুর্গাদাস । দিলীর খাঁ ! সে কি ? দিলীর খাঁ ?

দৌবারিক । হাঁ, সেই নামই ত ব'ল্লেন !

দুর্গাদাস । যাও, পবন সমাদরে নিয়ে এসো । (সরস্বতীকে কহিলেন)  
—যাও, মা, ভিতরে যাও । আমরাও আসছি এখনি ।

মহারানী সরস্বতী অন্তঃপুরে চলিয়া গেলেন

দুর্গাদাস । দিলীর খাঁ এলেন ? অর্থ কি ?

জয় । বুঝতে পারছি না ।

দিলীর খাঁ প্রবেশ করিলেন

দিলীব । বন্দেগি বীব দুর্গাদাস ! আমায় মনে পড়ে ?

দুর্গাদাস । আমাব জীবনদাতাকে বিস্মৃত হব কি রূপে ? আস্থন, আমার আজ পরম সৌভাগ্য । কিন্তু এখানে কি অভিপ্রায়ে, সেনাপতি ?

দিলীব । তীর্থদর্শনে, দুর্গাদাস । তোমাদের হিন্দুদের মধ্যে কাশী, হবিদ্বাব, সেতুবন্ধ বামেশ্বর, এই সব তীর্থ আছে না ? যেখানে যাত্রীবা মাঝে মাঝে গিয়ে ধন্য হ'য়ে আসে ? আমিও মর্কবার আগে তোমায একবার দেখতে এসেছি ।

দুর্গাদাস । ( ক্রণেক নীবব বহিলেন ; পবে কহিলেন )—দিলীব খাঁ ! আমি সামান্ত মানুষ ; সাধ্যমত নিজের কর্তব্য কবে' এসেছি মাত্র ।

দিলীব । এ পাপযুগে তাই কয়জন কবে, দুর্গাদাস ? যে যুগে ভ্রাতাকে তা'ন অংশ হ'তে বঞ্চিত কবে' আনন্দ ; সূত্র স্বার্থেব জন্ত স্বজাতিদ্রোহ কবে' পবিতৃপ্তি ; যে যুগে তোষামোদ, পীড়ন, মিথ্যাবাদ, প্রতারণা, চাবিদিকে ছেয়ে পড়ে'ছে ; সে যুগে তোমার মত ত্যাগী দেখে আত্মা শুদ্ধ হয় । যে প্রভুর জন্ত প্রাণপণ করে, দেশেব পায়ে সর্কস্ব অর্পণ করে, আশ্রিতকে রক্ষা কর্তাব জন্ত দেশ ছাড়ে, অপ্সরা সত্নাজ্ঞীর অবৈধ প্রেম প্রত্যাখ্যান করে, প্রপীড়িত অবলাব প্রাণরক্ষার্থে নিজের বুক আগিয়ে দেয়, শেষে আশ্রিতা কুমাবীব ধর্ম বক্ষাব জন্ত নিরকাসিত হয়, সে রূপ চরিত্র তোমাদের পুবাণেই কয়টা আছে, দুর্গাদাস ?

দুর্গাদাস । পুবাণে কেন, দিলীর খাঁ ? তাব চেয়ে উচ্চ চরিত্র দেখতে চাও যদি, নিজের চরিত্রের সন্মুখে দর্পণ ধর ।

দিলীর । আমার ?

দুর্গাদাস । হাঁ, দিলীর খাঁ, তোমার । আরও দেখতে পেতে দিলীর, যদি আজ কাশিম এখানে থাকতো—তোমারই জাত ভাই কাশিম ।

কাশিমের প্রবেশ

কাশিম। কৈ! মহারাজ কৈ? এই যে!

আত্মমি প্রণত অভিবাদন করিল

দুর্গাদাস। এ কাশিম যে? কি আশ্চর্য্য। কাশিম, তুমি এখানে খুঁজে এলে কেমন করে?

কাশিম। খুঁজে খুঁজে আলাম মহাবাজ। কত জায়গায় তল্লাস করে'ছি, তাব আন কি ব'লবো, মহাবাজ!

দুর্গাদাস। তুমি কা'কে মহাবাজ ব'ল'ছ, কাশিম?

কাশিম। যা'কে চিবকাল বলে' আসছি, মহারাজ।

দুর্গাদাস। না, কাশিম। তোমাব আব আমাব মহারাজ এখন যোধপুবাধিপতি অভিতসিংহ।

কাশিম। তা'ব নাম কর্বেন না মহারাজ। সে নেমকহারাম—

দুর্গাদাস। কাশিম! তুমি কাব কাছে এ কথা ব'লছো মনে রেখো।

কাশিম। জানি। মোব ছাবতাব কাছে কথা ব'লছি। তবু বে-হক কথা চুপ করে' শুনে যাতি পার্বো না। যা'কে আপনি বুকেব মদ্দি করে' মানুষ করলে, যা'র কামে বেগাক ছানটা দিলে, যা'কে তাব মা ছাওয়ালের মত দেখতো, সেই তা'কে যে বুড়োব সে, মাফ ক'র্বেন মহারাজ—গলা ধরে' আস্ছে, আব ব'লতে পার্বো না।

জয়সিংহ। কাশিম! ইস্লাম ধর্ম্ম ত তোমাব মত মানুষ তৈরি কবে?

দুর্গাদাস। সব ধর্ম্মেরই এক কথা, এক মহানীতি শিক্ষা দেয়, মহারাণা! তবু যদি কেউ মানুষ না হয়—সে ধর্ম্মেব দোষ নয়। মুসলমান ধর্ম্মে কাব্লেস্ খাঁও আছে।

দিলীর। আর হিন্দুধর্ম্মে শ্রামসিংহও তৈরী হয়, দুর্গাদাসও তৈরী হয়।

কাশিম। তবে, হুজুর, মোর এক আর্জি আছে।

দুর্গাদাস। কি কাশিম?

কাশিম। শুন্ছি যে হুজুর আজ রাণার রুটি খায়ে মানুষ। তা' ত হতি পারে না!

দুর্গাদাস। কি হ'তে পারে না?

কাশিম। মোর জান থাক্তি মহারাজ ত আর একজনের দরোজায় যাবে না। তা' ত মুই জান থাক্তি ণাখবো না।

জয়। সে কি! তুমি কি ক'র্তে চাও, কাশিম?

কাশিম। কি ক'র্তি চাই? শোন রাণা, মুই মহারাজকে খাওয়াবো।

জয়। কেমন করে'?

কাশিম। যেমন করে' পারি। মজুর খেটে খাওয়াবো—ভিক্ষা মেগে খাওয়াবো।

জয়। তুমি কি পাগল হ'য়েছো, কাশিম! তুমি পাবে কোথা থেকে?

কাশিম। যেখিন থেকে পাই। যদি আজ রাণী বেঁচে থাক্তো, দুর্গাদাসকে পরের দুঘোরে ভিখারী হতি হোত না। তিনি নেই, কিন্তু মুই আছি। মুই খেটে খাওয়াবো—খুদ কুঁড়া যা পাই খাওয়াবো—

জয়। তা' কি হয়?

কাশিম। হয় না? দেখ, মহারাজ দুর্গাদাস! তোমার যেমন মনে লেয় করো! বেছে লাও, মহারাজ! রাণার ফেলে-দেওয়া রাজভোগ খাবা? কি মোর পূজোয় দেওয়া খুদ কুঁড়া খাবা? বেছে লাও, রাণার পায়ের তলায় থাক্বা? না, মোর মাথায় থাক্বা? যেটা লেবা বেছে লাও।

দুর্গাদাস। ঠিক বলে'ছো কাশিম! দুর্গাদাস তোমার দেওয়া খুদ কুঁড়োই থাকে। (এই বলিয়া দুর্গাদাস উঠিয়া কাশিমকে আলিঙ্গন করিয়া কহিলেন)—ভাই কাশিম! আজ হ'তে আমরা দুই ভাই। (পরে দিলীরকে কহিলেন)—দেখ, দিলীর খাঁ, কি উচ্চ!

দিলীর। সত্য কথা বলেছিলে, দুর্গাদাস! দাঁড়াও, তোমরা দু'জনেই আজ আমার সম্মুখে দাঁড়াও; একবার নয়নভরে' দেখি—ঈশ্বর! তোমাব স্বর্গে যারা দেবতা আছেন শুনি, তাঁরা কি এঁদের চেয়েও বড়?

### যবনিকা পতন